


CIMANYINU

 Nudi mwa kusòmbaayi. Mwoyi wenu awu mu dinda emu, nwênù bônso! Ndi ne disanka dya kwikala mu mudimu wa Mukalenge mu dinda emu, mwalukile pa... Ncivwa mene mumanye ne netwalukile anyi katwakwalukila to, kadi Mukalenge nyewu walongololu mushindu, nenku nyewu tudi baalukile bwa disangisha leelu ewu. Mpindyewu tudi tutekemena bikondo bya dicyonkomoka leelu ewu, mu dinda emu, mu dileesona edi dya kalaasa kaa Dyalumingu, mu Dîyi. Nenku diloolo edi nekwikale cyakabidi midimu ya dyondopa, ne mudimu wa meesa a Mukalenge wikalà mwa kudilonda.

² Nenku mpindyewu tudi ne—ne dilambula dya mwânà, ngeela meeji ne. . . Mwaneetu Neville mmufume ku dingambila ne muntu kampanda uvwa ne mwanende wa mu diboko wa kulambula. Nenku bu yêyè mwa kulwa ne mwânà awu pa dîbà edi, mpindyewu. Nenku mwaneetu wa balume neashaale, anyi kampanda wa kudibo aku, ku cisanji cya orgue anyi cya pyànô, ku cimwe cya ku byôbi. Nenku dîbà adi nebalwe ne mwânà wa mu diboko awu. Netwënzè mudimu wa dilambula awu; bwa twâmòna mwa kupita buludi, ne lukasa lwônso, ku Dîyi.

³ Bwalu, tudi banange bwa—bwa kuneemenena ku Dîyi. Aci ki—aci ki cintu cya mushinga, kufila dîbà dyetu menemene ku Dîyi dya Mukalenge. Pa nanku tudi ne kusakidila kwa manza tente bwa mpunga ewu wa kudisangishaku neenu bônso kaaba aka leelu ewu, ne bwa . . . ne mudimu ewu—ewu.

⁴ Ndi ne cya kwikala mutupakane. Abi bidi anu bilenga, mwaneetu wa bakaji. Mwawa—mwawa—mwawa mwele meeji ne ki civwàku. Pàmwäpa cidi anu ditupakana cyanaana. Eyo. Mpindyewu, ndi nwela twasakidila, wa manza tente, nansha nanku. Pàmwäpa eci, ngeela meeji ne ncilwile kudi muntu mukwabo kampanda, cilwile kudi muntu mukwabo kampanda, nenku ncitwale anu lutatu lwa mushindu kampanda.

⁵ Mpindyewu bantu bônso badi badyumvwaku bîmpè menemene anyi? [Disangisha didi dyamba ne: “Amen.”—Muf.] . . .? . . . Twasakidila kudi Nzambi!

⁶ [Mwaneetu Neville udi wamba ne: “S’ki yêyè ulwàlwa naabo ewu.”—Muf.] Mpindyewu, kaa, eyowa’s, s’ki bânà bakese mbôbô aba. Mfwilaayiku luse. Mfwilaayiku luse. Eyo, udiku mwa kulwa anyi, wêwè mukulu? [“Eyowa’s, mukalenge.”]

⁷ Ee, twânà twa bakaji tubidi, tukese tulenga’s we, twânà twa bakaji twa mèsù mafiikuluke! Huh? Abi’s mbilenga be. Dyende nganyi? Tangila kuneeku wè! [Maamù udi wamba ne: “Jennifer Lee.”—Muf.] Jenny? [“Jennifer Lee.”] Jennifer Lee. Dîna dya ndekeelu nganyi? [“Serept.”] Serept. Nudi baa penyi, Mwaneetu

wa bakaji Lee? [“Versailles, Illinois.”] Versailles, Illinois. Bilenga kaayipu’s we!

⁸ Mpindyewu, mu Bible. Mpindyewu, pa ciibidilu, batu—batu ne cintu paaci ne ndibatiiza dya bânà’s; twètù katùtu twitabuuja dibatiiza dya bânà to, bwalu bôbò kî mbanji kwenza mpekaatu to, bwalu bacidi bânà bikole. Kadi tutu twitabuuja dilambula dya bânà kudi Mukalenge. Mpindyewu mukulu ne mêmè netutenteketele mwânà mukese wa mu diboko ewu byanza. Muwâmbì ne, n’Jenny? [Mwaneetu Neville udi wamba ne: “Jennifer.”—Muf.] Jennifer. Eyo.

Twinyikaayi mitu yetu.

⁹ Taatù wa mu Dyulu, patudi tulwa mu dinda emu ne mwânà mukese wa bakaji ewu apa, udi ubiikidiibwa ne Jennifer ewu, kûdi Wêwè, maamù ne bananga bende mbafume nende ntanta mule, bwa kulambudiibwaye kudi Mukalenge. Tudi bamanye ne Wêwè wâkatentekela bânà bakese baa bu nunku ewu byanza Byebe, mu matuku Ebe Wêwè, ne—ne kwamba ne: “Lekelaayi bânà bakese balwe Kûndi, ne kanubakandiki to, bwalu mudi bôbò aba emu ki mudi Bukalenge bwa mu Dyulu.” Mpindyewu twètù nyewu tuKupeeshaye, bwa nsòmbelu wa mudimu, mu Dînà dya Yesu Kilisto. Amen.

¹⁰ Mwânà mukwabo wa bakaji mutekete dyende nganyi? [Maamù udi wamba ne: “Connie Lynn.”—Muf.] Connie Lynn. Eyo, Connie mwânà, udi, udi umfikisha mêmè ku didyumvwa anu bu ne ndi mukese’s. Kaa, udi ne bwôwà anyi? Kaa, ndi mmona ne kabyakukumbana nanku to, maamù. Eyo.

Twinyikaayi mitu yetu.

¹¹ Mukalenge Yesu, maamù nyewu ututwadila Connie mwânà ewu mu dinda emu, mu mudimu wa dimulambula kudi Wa bukole bwônsò. Wêwè ngudi mumupeeshe mwânà ewu, bwa kumukoleshaye, nenku nyèyè ewu ulwa nende Kûdi Wêwè, ne mwakunyende wa bakaji. Nyewu ndomba, Taatù wa mu Dyulu, bwa Wêwè kwikalaku ne luse. Beneshaku famiye ewu. Beneshaku mwânà mutekete wa bakaji ewu. Patudi twètù tumutentekela byanza apa, mu Dînà dya Yesu Kilisto, tutu tuKupeeshaye bwa nsòmbelu wa mudimu. Amen.

Nzambi akubeneshe, ne bânà beebe bakese abu.

Ekelekele, twäpeci bânà bakese bààbûngì mpindyewu!

¹² Mwânà mukese wa balume ewu dyende nganyi? [Maamù udi wamba ne: “Joel Lee Watson.”—Muf.] Joel Watson. [“Joel Lee.”] Joel Lee Watson. Mwânà wa balume bulenga kaayi’s we, ne mèsù manene a bleu! Ekelekele! Nudi bônsò baa penyi? [“Eastman, mu Géorgie.”] Baa ku Géorgie. [“Um-hum.”] Mvwa anu ndyambidila ne nudi baa ku Sud. Ncivwa mumanye ne to. . . [“Ee, kwetu ndwà ku Tifton kwaka. Ndwa kwine aku’s.”] Kaa, eyowa. Kaa, wetwawu! Ewu’s, mmwânà wa balume mukese mulenga wa ku

Géorgie, díbà adi, huh? Eyo, mukalenge. Eyowa's, mukalenge, abi's mbilenga be. Ùdi pende mwa kwakula's, yèyè ewu. Kì mmômò anyi wèwè mwânà?

Twinyikaayi mitu yetu.

¹³ Taatù wa mu Dyulu, nyewu tulwa ne mwânà mukese wa balume munangiibwe ewu, padi maamù ne taatù biimane kaaba aka bwa—bwa kutwa mushinga disangila dyabo apa. Wèwè ngudi mubapeeshe mwânà wa balume mukese ewu bwa kumukoleshabo, kadi nyewu bamwaluja Kùdi. Ncifwanyine kwikala cintu cya—cya mmwenekelu mulenga kaayi, cyenze bu Ana, wa kale awu, wâkasambila bwa kupeta mwânà; ki—ki Nzambi kumupeesha mwânà awu, kadi yèyè kumwaluja ku ntempelu wa Nzambi, bwa kumulambula. Enzaku, Mukalenge, bwa ne mwânà mukese wa balume ewu ikalèku musadidi Webe, bwa tatwëndè ne mamwëndè kubeneshiibwabo, ne kwikalabo ne bukole bwa mubidi ne dikanda bwa kumukoleshabo. Nenku swaku bwa yèyè alaale abooboke, ikale ne nsòmbelu wa dyèsè, ne ikale musadidi Webe, patudi tuKulambulaye apa, mu Dîna dya Yesu Kilisto. Amen. (Anubeneshe!) Nwâmuvwijaayikù mulume wa nsongo, pàmwâpa muprofeta mukwabo wa kânâkânà bu Samwele.

¹⁴ Mpindyewu bâna bakese babidi balenga baa balume mbôbò aba. Ekelekele! Basatu bajima's, díbà adi? Ee, awu's mfamiye mujima's. Dyebe nganyi? [Mwânà wa balume awu udi wamba ne: "Michael."—Muf.] Michael. Kadi dyebe peebe? [Mukwabo mwânà wa balume awu udi wamba ne: "Paul."] Paul. Mênà malenga kaayi's we! Kadi dyebe peebe? [Mwânà wa bakaji awu udi wamba ne: "Debbie."] Debra. Aci's ncilenga bulelela. Michael, ne Paul, ne Debra. Kadi dîna dyebe dya ndekeelu nganyi? [Taatù udi wamba ne: "Ellis."] Ellis? ["Eyowa."] Ee, aci's mfamiye mukese mulenga wa dikema, mûndi mêmè nnwambila.

¹⁵ Nudi bamanye's, pândi mêmè mmona bâna bakese mushindu awu, citu misangu yònsò cingaaluja anu pâncivwà mwânà mukese apu. Nenku mpindyewu díyi dya kale ditubo bamba, nudi bamanye's, ditu ne: "Badi banudyata pa makàsà mpindyewu, nebanudyate pa mwoyi pashiishe," kadi mêmè ncyèna ngiitabuujja ne nebiikale nanku patudi tubalambula kudi Mukalenge to. Tudi bambule bujitu mwaba ewu, ne Nzambi ngudi muteeke bwalu ebu mu cyanza cyebe. Yèyè mmukuvwije muyiishi. Ntu misangu yònsò anu ngamba pa bidi bitangila bayiishi bakaji, nudi bamanye's, kadi maamù ne maamù yònsò mmuyiishi; s'ki disangisha dyende ndyòdi edi, nwamonu's, bwa kukoleshaye bâna bakese aba mu mushindu mujaalame, padi taatù muye ku mudimu apu. Nenku nudi bapete bujitu bwa kwambula. Nzambi anubeneshe bònsò babidi. Nudi ne kaafamiye kakese kalenga.

¹⁶ Taatù wetu wa mu Dyulu, nyewu tulwa ne Michael mwânà, udi umweka bu mwanaabute ewu. Ne nyewu tumumentekela byanza, mu dimulambula, kudi Yesu Kilisto. Famiye wende mmulwe ne bânà bakese bwalu Wêwè udi muteeke cyòci eci mu bukubi bwabo—bwabo, ne bôbò mbamanye ne kabeena bakumbana to, padiku kakuyi dikwacisha Dyebe, pa nanku mbalwe ne famiye wabo mukese ewu, bwa kubalambula.

¹⁷ Mpindyewu nyewu nKupeesha Michael mwânà ewu, bwa nsòmbelu wa mudimu, mu Dîná dya Yesu Kilisto. Bya mwomumwe kabidi, tudi tutentekela Paul mwânà byanza, ne biikale tulambula mwoyi wende kudi Yesu Kilisto, bwa nsòmbelu wa mudimu bwa butumbi bwa Nzambi. Kabidi ne Debra mwána ewu, tudi tumumentekela byanza, Taatù, bwa dimulambula, bu civulukilu cya Yesu Kilisto, Wâkatentekela bânà bakese byanza, wamba ne: “Balekelaayi balwe Kûndi; kanubakandiki to.” Swaku bwa nsòmbelu wa mwânà mutekete wa bakaji ewu abeneshiibwe mu Bukalenge bwa Nzambi.

¹⁸ Beneshaku taatù ne maamù, ne swaku bwa kwikalabo ne mwoyi, balaale babooboke ne nsòmbelu wa dyèsè, too ne ku dimona dya bânà baabo balela mu mudimu wa Nzambi. Tudi tulomba dibenesha edi bwa butumbi bwa Nzambi, patudi tubalambula mu Dîná dya Yesu Kilisto apa. Amen.

Anubeneshe! Akubeneshe! Nudi kaafamiye kakese, kalenga be. Eyowa’s.

¹⁹ Cintu kaayi...Nudi bamanye meeji ândi mêmè ngeela anyi? Bânà batekete baa bakaji bakaadi, mbalwe kulengela mpindyewu kupita muvwabi pâncivwà mêmè mwânà mutekete. Eyowa’s, mukalenge. Mêsù manene bulengawu! Dyende nganyi? [Maamù udi wamba ne: “Joanna.”—Muf.] Joanna. Ne dîná dyebe dya ndekeelu didi...[Taatù udi wamba ne: “Blair.”] Blair, Joanna Blair. Nwênù bàdi batàngidiie paanyima pàapa bàba, kî nciipòpî anyi? Eyowa’s, mukalenge. Nenu maalu kaayi’s wêwè, Joanna, huh? Ne ndambu wa cyena-bundù’s, uh-huh, anu ne ndambu wa cyena-bundù. Kaacintu kakese kalenga kaa dikema.

Twinyikaayi mitu yetu.

²⁰ Taatù wetu wa mu Dyulu, famiye wa ba-Blairs ewu nyewu mupete dipà mu disangila dyabo, Joanna mwânà ewu. Kadi tudi bamanye ne matuku mmabi, adi Sataana mwikale ku nseke yònsò, bwa kucincimikangana, nangananga bânà baa bakaji batekete aba. Ne bôbò mbamanye ne kî mbakumbane bwa—bwa kumukolesha mu mushindu mujaalame to. Kadi paabo mbaswe bwa akoleshiibwe mu mushindu mujaalame, ne bwa—bwa kwikalaye musadidi Webe. Nenu badi bakolesha mwânà wa bakaji mukese ewu bwa kukupa Wêwè luumu. Nenu mpindyewu nyewu balwe nende, bwa dimulambula, kûdi Wêwè. Nyewu tumumentekela byanza, mu Dîná dya Yesu Kilisto,

patudi tulambula Joanna Blair mwânà ewu kudi Bukalenge bwa Nzambi, bwa butumbi bwa Nzambi. Amen.

Akubeneshe, Mwaneetu Blair. Mukalenge ikale neenu.

²¹ Wetwawu mu dinda emu, mukalenge! [Taatu udi wamba ne: “Wetwawu!”—Muf.] Ewu mmwânà wa balume bulengaye! Ê, maalu kaayi wêwê’s? Ee, ekelekele, s’udiku mufwanyine kumweka bîmpè menemene bu wêwè mwa kukudimuka mu *nunku* ewu’s. Eyowa’s, mukalenge. Wêwè’s udi ne katù kakese, kalenga, kîmpè be, ne kwîsù bipetàngàne. Huh? Dyende nganyi? [“Daniel Mark.”] Daniel Mark. Kadi dyebe dya ndekeelu? [“Mark Kardum.”] Hardum. [“Kardum.”] Kardum, Daniel Mark Kardum.

²² Utu wa muneemu mu nyungulukilu emu anyi, Mwaneetu Kardum? [Mwaneetu Kardum udi wamba ne: “Mpindyewu, mu cimenga cya Melkerk.”—Muf.] Eyowa’s, mukalenge. Utu wa penyi? [“Mémè ntu wa mu Ditunga dya New York.”] Ditunga dya New York, muntu’s n’Yankee, bulelela. [“Eyowa.”] Ee, s’nditunga dinene. Mémè ntu ne baa kwetu basòmbèlemù. Taatu mukwabo mmusòmbèle mu Plattsburgh. Kaa, ntu mupicishepicisheku kapeepa mu New York amu bikole. Nênyemù bwa disangisha dyanyi dyàlondà, mu New York City, ku The Stone Church aku. Eyo.

²³ Mpindyewu, dyende m’Mark, s’mmuwâmbi’s? [Taatu udi wamba ne: “Daniel Mark.”—Muf.] Daniel Mark, mwânà mukese wa balume bulengaye!

Twinyikaayi mitu yetu.

²⁴ Mukalenge Yesu, nyewu tulwa ne Daniel Mark mwânà Kûdi, bwa dilambula dya nsòmbelu wende. Mmufidiibwe mu byanza bya taatu ne maamù, bwa kukoleshabo mwânà mukese ewu mu mibelu ya Nzambi. Nenu mbamanye ne kî mbakumbane to, pa nanku nyewu badi balwa nende kûdi Wêwè, Mukalenge, bwa Wêwè kubenesha nsòmbelu wende. Nenu, mpindyewu, bu mutudi twètù bamanye ne dituku ndibi, ditudi ne mwoyi edi. Nyewu tumona bânà bakese aba, katuyi anu bamanye ne maalaba mmubalamine cinyi to, kadi, cyònsò ciikalaku aci, tudi tukweykelabu Wêwè mu cianza. Tudi tutentekela mwânà mukese wa balume ewu byanza, biikale tulambula mwoyi wende Kûdi, bwa nsòmbelu wa mudimu mu Bukalenge bwa Nzambi, mu Dîna dya Yesu mmutudi tulomba emu. Amen.

²⁵ Nzambi akubeneshe, mwaneetu wa balume. Mmwânà wa balume mulenga be. Akubeneshe, wêwè Mark mwânà.

Kaa...bwelaayi naabo muneemu, bwelaayi
naabo muneemu,
Bùmùshaayi mu myaba ya mpekaatu;
Kaa, bwelaayi naabo muneemu, bwelaayi
naabo muneemu,
Lwâyi ne bânà bakese kudi Yesu.

Aci's ncilenga be! Twasakidila, mwaneetu wa bakaji.

²⁶ Mbanganyi bavwa kaaba aka mu dyalumingu, bavwabo basambidile mu dyalumingu dishaale, badi bumvwe bipeta ne bumvwe ne mbondopiibwe? Elaayi byanza byenu muulu, nwênù bavwabo basambidile abu. Kaa, ekelekele, tangilaayi kuneeku numone's, pamwe ne muntu ne muntu yònsò wa kudibo.

²⁷ [Mwaneetu Neville udi wamba ne: "Aleluuyah! Aci's ncilenga's! Nzambi atumbe! Nkaavwa muumvwe bacyamba, lumingu lujima elu."—Muf.] Eyowa's, mukalenge. Ne mèmè paanyi, mvwa muumvwe. Ndi muswe anu kwikala musòmbè cyanaana, nteeleja, nwamonu's.

²⁸ Nwamonu's, cintu kampanda cidid munkaci mwa kwenzeka, cîngàànwàmbilâ pashiishe, musangu kumpala, nwamonu's, ncyà—ncyà butumbi ne cilenga be. Ne bu twètù mwa... Netwakule pa bwalu abu, mu disangisha kampanda dikwabo, nudi bamanye's, musangu kumpala. Cicidi anu cibangilaku ne kwenzeka, nenku tudi ne kusakidila kwàbûngì bwa bwalu abu.

²⁹ Nenku mvwa muye ku Kentucky kwaka, bu mûntù ngenza kukuya ku cidimu ku cidimu, nya kuntwaku. Mvwa mukuye ne bamwe baa ku balunda baanyi. Ne kabitu anu bwa dikatwa dya buluwà bwa nshindi patupu to, ne nwênù biine nudi bamanye aci, nwamonu's.

³⁰ Pa nanku tudi anu munkaci mwa kupicila mu cikondo cya butumbi, nenku tudi ne kusakidila kudi Mukalenge!

³¹ Bikengela nye mpindyewu, bidi bikengela bwa ngaalukile kumbelu paanyima paa disangisha edi. Ne pashiishe, nenku tudi... Pashiishe nêngààlukilè mpicile cyakabidi apa, paanyima paa cikondo kampanda, mu diya dya ku New York bwa disangisha kampanda. Nenku twètù bapete mpunga wa kwanji kwimana ndambu, mona's, netwi—netwikale ne disanka dya kwenzaku dikwabo disangisha mwaba ewu mu tabernacle emu.

³² Ne pashiishe nebikengele bwa mèmè kwalukila, mu diya dya ku Shreveport. Ne pashiishe twalukile kumbelu, biikale ne kiipacila kaa kwikala apa mu cikondo cyònsò cya diikisha aci, bu Mukalenge mwa kwanyisha, ngaalukila ne famiye. Ne pashiishe—ne pashiishe ndi muswe ku- . . .

³³ Pashiishe disangisha dyanyi nedyenzekele mu Phoenix, mu ngondo wa kumpala. Ndisangisha dya ku cidimu ne ku cidimu kuntwaku bwa Beena Kilisto baa Kantu-ku-byanza. Nenku bu lumingu lujima anyi matuku dikumi kumpala kwa cyôcì aci, nênteetè bwa—bwa kufucila cilumyana cya cinene aci... Beena Dîná dya Yesu abu; pa ciibidilu civwa m'Mwaneetu wa balume Garcia, ne mwaneetu wa balume wa—wa beena Espagne kuntwaku mbavwa ne mwaba munene, mulenga wa dikema kuntwaku. Bòbò mbadi bafume ku diwibaka. Wòwò awu newikale ne myaba ya binunu byàbûngì bya bantu bàsòmba, mucikàle anu ne bupya bwawu, kadi kaadisangisha

kaabo kiikale kakese bikole. Mbangambile ne ndi mufwanyine kuwufucila dîbà dyònsò naka dîndi mwa kuswa adi. Pamutu paa mêmè kubanga anu—anu ngenda nyunguluka cyanaana, ngenda anu nyungulukangana mu cibandabanda amu, ku ekeleeziya ne ku ekeleeziya, ngeela meeji ne nêngiikalè anu mwa kusangisha cintu cyònsò aci mu disangisha dimwepele dya cikòngò cinene, nudi numona's, ne pashiishe kudiyenzela muntwamu.

³⁴ Ne dîbà adi tudi mwa kufucila ntempelu awu. Tuyaaya mpindiyewu bwa kajandula ní tudi mwa kucyenza, ne pashiishe kwenza Cibilu cya Beena Kilisto baa Kantu-ku-byanza aci. Pashiishe, pamba maalu a dyamwamwa dya mbú kukumbanawu apu, netuteete bwa kulongolola masangisha mu Sud mwònsò amu, bwa ngondo wa kumpala, ne ngondo mwibîdî, ne ngondo mwisâtù, mu bitupa bya malaba a Sud mwònsò amu. Nenuku pashiishe—pashiishe netuye...bwalu, twètù babange mpindiyewu ne bakabwele mu Afrike...Nwamonu's, mu cikondo cya Noël emu, bwabo bôbò, mmatuku a ngondo anaayi a ngondo wa mwandamutekete. Nwamonu's, kudi—kudi mvula ne kuulu kubi, nenku kamwena mushindu wa kubwelamu mu cikondo aci nansha, pa nanku cikondo cilenga menemene cya dibwelamu mpaanyima. Nenuku dîbà adi tudi baswe kubangila, twètù bapete mushindu, mu Norvège, ne kupweka twenda tunyunguluka buloba bujima, ne kukwata mudimu too ne mu Afrike, bwa kajikijila muntwamu, bu Mukalenge mwa kwanyisha.

³⁵ Kadi nwatusambidilaayiku mpindiyewu. Ne twètù tudi banunange, bwa aci nudi bamanye. Pa nanku tudi batekemene byàbûngî bya biyiila ne panshi, bipite ne byònsò bitudi twètù bafwanyine kwenza, anyi mene kwela meeji ne Mukalenge mmufwanyine kwenza aci.

³⁶ Nenuku tudi twitabuuja ne, diloolo edi, nekwikale mudimu munene wa dyondopa. Ngeela meeji ne nekwikale... Nényiishè anu kakese menemene, bwalu netwikale ne meesa a Mukalenge diloolo edi. Nenuku mu tusunsa bu makumi abidi anyi makumi asatu nanku awu, pashiishe netwènzè mulongo wa babeedi, ne—ne pashiishe dyakamwe paanyima paa cyôci aci, netwikale—netwikale ne meesa a Mukalenge. Nenuku tudi tunujingila difika dilenga bwa kushaalaku neetu; netwikale ne disanka. Twètù katùtu ne—ne meesa a Mukalenge a tusungulujangana to. Mbwa mwena kwitabuuja yònsò, mwena kwitabuuja yònsò.

³⁷ Nenuku kumpala kwa mêmè kubala Mufundu, ndi ndikonka ní tudiku mwa kwinyika mitu yetu katanci kakese cyanaana. Nêndombè mulunda wanyi mulenga, Mwaneetu Lee Vayle, ní udiku mwa kutulombola mu mwaku wa disambila, bwa Nzambi wabeneshaku Dîyî Dyende. Mwaneetu Vayle, udi mwa kutwenzelaku cyôci aci anyi?

[Mwaneetu Lee Vayle udi mpindyewu usambila—Muf.]
Amen. Enzaku nanku, Mukalenge. Enzaku nanku, Mukalenge.
Enzaku nanku, Mukalenge. Eyowa's, Mukalenge. Amen.

³⁸ Mpindyewu kakuyi tuseku to, ne kaneemu kònsò tudi tuseemena ku Dìyì. Mpindyewu ndi muswe kubala, mu dinda emu, mu Ekesoode nshapita wa 12, mwikale mbangila ku mvensa wa 12, wa 12 ne wa 13, njikija nende. Nenku teleejaayi ne ntema mpindyewu. Ne pashiishe kumpala kwa meesa a Mukalenge diloolo edi, nwâbalaayi nshapita wa 12 wa—wa Ekesoode, nshapita mujima awu; bwalu mvensa wa 11 mwaba ewu cidì anu didilongolola dya ku lwendu cyanaana, ne meesa a Mukalenge kumpala kwa kwasa lwendu. Nenku tudi baswe kuseemena ku cyôcì eci ne kaneemu kaa menemene mpindyewu. Mpindyewu mvensa wa 12 wa nshapita wa 12:

*Bwalu nêmpicilè mu ditunga dya Ejipitu bufuku ebu,
ne nêntuutè baanaabute bônso mu ditunga dya Ejipitu,
ne ku bantu ne ku bimunà; ne nêmfilè dilumbulwisha
dyanyi bwa kulwisha tunzambi twônso twa Ejipitu:
mêmè ndi MUKALENGÈ.*

*Nenku mashi neikale kunudi bu cimanyinu pa nzubu
unudi nusanganyiibwa awu; nenku pângaàmònà mashi,
nêmpicilè pamutu peenu, ne cipupu aci kacyakulwa
pambidi peenu bwa kunubutula to, pângaàtuutà ditunga
dya Ejiipitu.*

³⁹ Mukalenge asweku abeneshe Dìyì Dyende dya Cijila!

⁴⁰ Mpindyewu ndi muswe kupatula cyena-bwalu mwômò amu, mwaku mukese, umwepele cyanaana wa maleeta ataanu ne: *Cimanyinu. Cimanyinu.* Ndi muswe kwakula pa mwaku awu, anyi kulongesha dileesona edi dya kalaasa kaa Dyalumingu, pa mwaku ewu wa *cimanyinu*. Bible mmwambe mwaba ewu ne: “Nenku mashi neikale cimanyinu kunudi.” Nenku tudi baswe kukwata mudimu ne mwaku ewu *cimanyinu*.

⁴¹ Mpindyewu katwena bamanye to, pândì ntangila ntanku, ne paakumbana dîbà, ee, eyi kî. . . Ndi ne Mifundu yàbûngì, yàbûngì menemene mifunda kaaba aka. Pa nanku kabiya. . . Nenku mwikale mumanye ne ncyakwikala neenu to bwa cikondo kampanda. Kadi mmunyi mutwamanya ne ewu kî mmusangu wa ndekeelu wikala bamwe baa kutudi mwa kudisangisha? Pa nanku tuditacishaayi bwa kuseemenaKu anu ne kaneemu kònsò. Ndi mumanye ne mbikole. Mukalenge mmutupeku dinda dilenga mpindyewu, kabidi—kabidi, bwa mudimu, dilenga dya dikema. Nenku tuteetaayi bwa kubumbakajila meeji etu mpindyewu pa kantu ne kantu katudi—katudi twamba, bwa ne. . . piikalamu cintu kana cyònsò cidì Mukalenge mufwanyine kuswa bwa nwênù kumanya, bwa cyafidiibwa kunudi.

⁴² Ne twètù katwena twimana kaaba aka anu bwa kutumonabo to. Kacya katütukù tulwa mwaba ewu anu bwa bakwabo

kumonabo ne mbilàmbà kaayi bitudi bavwale to, anyi, tudi—tudi tulwa kaaba aka mbwa bwalu bumwepele, mwasambidibo kudi mwaneetu wa balume amu ne: “Tudi kaaba aka mbwa kuteeleja Dîyi, Dîyi dilwalwà kutudi adi.” Citudi baswe n’Cyôci aci, bwalu ki cintu cimwepele ciikalàku ne mushinga kutudi, ne cintu kampanda ciikalàku cya mushinga wa menemene, cintu kampanda ciikalàku—ciikalàku mwa kutukwacisha.

⁴³ Ne twètù tudi cisamba cidi munkaci mwa kupùnga ne lufu. Bantu bônso bayaaya batangile ku Cyendelele. Nenku tudi bapeebwe ndambu wa cikondo ewu mbwa kwangata mapangadika etu pa ne netuye batangile luseke kaayi. Ne njila mwine udi kumpala kwetu; tudi mwa kwangata anyi elu luseke anyi lwalwa lwônso lutudi baswe kusungula alu. Ki mushindu wakateekaYe Adama ne Eva ngwôwô awu, ne wôwô mushindu awu ngudiYe ututeeka twètù.

⁴⁴ Tudi ne cya kuvuluka ne, citudi twenza nansha ciikàle cinganyi, anyi nansha twètù mwa kutuuta dyakalenga dya bishi, mu nsombelu emu, katuyi ne Kilisto to tudi bajimije bintu byônso nkòong. Pa nanku piikalaYe, paanyima paa . . . Piikalabi ne Yèyè ki cyônso cidiku cidi cikengela kwindila, nanku’s tudi bafwanyine kwikala bantu baa batambe kukutakana bu twètù mwa kubenga kuCiitaba, kwikala, ne—ne kuCinanga mu ndondo. Kabiya anu kuCiitaba cyanaana to, kadi udi ufika ku cintu kampanda cinene citambe aci. Paayima paa wêwê mumane kuCipeta, kuCyângàci kadi kuCiteeka pa citàmbà to. Bidi bikengela kukwata naaCi mudimu.

⁴⁵ Mbyenze bu mudi kuya kudi ngangabuka bwa kapeta bwanga bwa dinwa, kadi kulwa kubuteeka pa citàmbà. Wêwê muye kakeba bwanga bwa kunwa, nwaku bwanga abu. Piikalaku disaamà dikutacisha, ne bwanga ebu paabu ne cya kukukwacisha, nwaku bwôbô budiye ukupeesha abu; kabidi anu mushindu udiye wamba bwa kubufila awu, bwalu misangu mikwabo anu ndambu wa tusunsa cyanaana tudi tufila dishiilangana dyàbùngi mu mushindu wûdi ubufila awu. Ne netumanye munyi ne . . .

⁴⁶ Kadi mu ebu bwalu, leelu ewu, anu katanci kakese cyanaana kaa dipangandika dyebe nkafwanyine kulongolola bwalu bwa kwebe kûyaayà kwa Cyendelele. Wêwê ùCyângàtè anu mushindu udiYe ukupeeshaCi awu.

Cimanyinu: “Mashi neikale kunudi bu cimanyinu.”

⁴⁷ Mpindyewu, dyambedi, cimanyinu ncinyi? Mmwaku utubo bangata pa ciibidilu munkaci mwetu twètù baakudi ba Anglais, nangananga muneemu mu Amerike. Cimanyinu cidi . . . Cya bushuwa, nkonkamyaku udi wamba ne cimanyinu ncimanyishilu, ncimanyishilu cya mushinga wa lwendu, mushinga mufuta, nwamonu’s; bwa ne—ne mushinga wa lwendu

awu, anyi mushinga wa difuta awu, mushinga udi mulombiibwe awu ùkaadi mufuciibwe.

48 Bu mudi mushinga wa lwendu mu njila wa kawulu anyi wa nuya ku bis. Ubwelamu ne ufuta mushinga webe—webe wa lwendu, ne pathiishe bakupeesha cimanyinu, ne cimanyinu aci kwêna mwa kukwataku naaci mudimu bwa cintu cikwabo nansha cimwe to anu mu njila wa kawulu awu. Nenku ncimanyinu, bwa kumpanyi wa njila wa njanja awu ne, wêwê udi mufute mushinga webe wa lwendu. Ncimanyinu, ne kwêna mwa kukwataku naaci mudimu bwa cintu cikwabo nansha cimwe to. Kacyena cikumbanaku bwa njila mukwabo nansha umwe to. Cidi cikumbana anu bwa yêyê njila awu nkaayende. Nenku cidi—cidi ncimanyinu.

49 Mpindyewu bwa apa, citudi twamba eci, mwaba utudi tubangila ewu, Nzambi ngudi wambila Izaleela ne: “Mashi a mwânà wa mukooko adi ncimanyinu kunudi.” Mwânà wa mukooko wa Izaleela, mushipa awu, ki cimanyinu civwa Yehowah mulombe. Civwa ne cya kwikala mashi. Nzambi nguvwa mwenze cimanyinu ne mucipeeshe Izaleela. Nenku cimanyinu cikwabo nansha cimwe kacyakukumbanaku to, nwamonu’s, kacyena mwa kwitabiibwaku to.

50 Bwa baa pa buloba, Cidi ndikutakana pa dikutakana. Kadi, bwa Nzambi, Cidi nnjila umwepele. Cintu cimwepele cidiYe ulomba n’Cimanyinu aci. Cidi ne cya kwikalaku. Ne wêwê kwêna mwa kupeta Cimanyinu padi mushinga wa lwendu kawuyi mufuta to, dîbà adi udi ne Cimanyinu aci mu cianza cidi cikupeesha dyêsê dya—dya mpicishe—mpite. “Nêmmônè Mashi, Nêmpicilè pamutu peenu.” Ncikondo kaayi’s we, cya ne, ndyêsê kaayi’s we, dya kumanya ne udi mwambule, munda mwebe amu, Mpicishe—mpite awu. “Pângààmônà Mashi, Nêmpicilè pamutu peenu.” Ki cintu cimwepele ciikalaYe mwa kwitaba. Kî ncîngà cintu ciikalà mwa kwangata kaaba kaaCi to; kaciyi cipinganyi to, kaciyi dingumba to, kaciyi cintu cikwabo nansha cimwe to. Bikengela anu Cyôci aci. Nzambi mmwambe ne: “Anu Aci nkaayaaci ki cîNgààmônà.”

51 Nansha byôbî ne bavwa baakane bishi, bavwa bîmpè baa bishi, nansha balonge tulaasa twa bishi, nansha bavwale bilâmbà bya bishi, cimanyinu aci ncivwa cintu cimwepele. “Pângààmônà cimanyinu aci, Nêmpicilè pamutu peenu.” Mashi ngavwa cimanyinu cya ne—ne dilomba dya Yehowah divwa dikumbajiibwe, bwa ne divwa dyenjiibwe. Mashi avwaku bu cimanyinu. Mashi ngavwa cimanyinu aci. Nwamonu anyi? Mwoyi ùvwà. . .

52 Nzambi uvwa mwambe ne: “Dituku diwakudya, dituku adi ndiwafwa.” Kadi kuvwa mwoyi wa mupinganyi ùvwà mwangaciibwe pa kaaba kaa mwoyi wa mwena kwitabuuja. Nzambi, mu luse, wakiitaba mupinganyi wa mwoyi wa

muntu mukooyike awu. Paakadikooyisha mwan'Ende awu ne mpekaatu, wa kubenga kwitabuuja Diyì, dibà adi Nzambi, mubanji mu luse, wakenza mupinganyi; nenku, mbwena kwamba ne, bivwa bikengela bwa cintu kampanda cifwe pa kaaba kende. Cintu cikwabo nansha cimwe kacivwaku mwa kukumbana to.

⁵³ Ki bwa cinyi bimuma bya pommes ne bya pêches bya Kaayina, ne bikwabo abi, kabyakakumbana to. Byakakengela mwoyi kampanda uvwa ne mashi munda mwawu, ne mwoyi wakapatuka mu mulambu awu, nenku mpindyewu mashi avwa ncimanyinu cya ne diyì dituma dya Nzambi divwa dyenjiibwe. Mpindyewu, civwa Nzambi mulombe ncinyi? Mwoyi; ne mashi avwa aleeja ne kuvwa ne cya kwikala mwoyi kampanda mupatuke. Pa nanku mashi avwa ncimanyinu cya ne mwoyi wakafidiibwa, cya ne cintu kampanda civwa cifwe, dilomba dya Nzambi; cya ne mwoyi kampanda uvwa mufidiibwe, ne mashi avwa meediibwe panshi. Nenku mashi avwa bu cimanyinu, cya ne mwoyi uvwa mupatuke. Mwoyi wà nyama ùvwà Nzambi mwambe ne bikengele wàngaciibwè awu, mashi awu ngàvwà bu cimanyinu. Nwamonu anyi?

⁵⁴ Mukuukwidi mwena—mwena—mwena kwitabuuja awu uvwa ufwanyikijiibwa ne mulambu wende, ku cimanyinu aci. Ncyêna njinga bwa kushaala ntanta mupitepite bule pa mêyi makese a diteela aa to, kadi, bwalu mbya wêwè mufwanyine kwangata disangisha dyônsò nkòong pa dimwe dya ku wôwò awu, kadi ndi muswe kwanji kwimana katanci mwaba ewu bwa kwamba cyôci aci. Bivwa bikengela bwa mwena—mwena—mwena bwa kwitabuuja awu kufwanyikijiibwaye ne mulambu wende. Nwamonu anyi? Byôbi ne civwa anu mulambu cyaanaana ne—ne mwikàle mwenzela mwaba kampanda pambelu pàapa, yêyè's ukaavwa muwufile; kadi bivwa bikengela bwa yêyè kwikala mufwanyikijiibwemu. Bwa kwamba menemene, bivwa bikengela bwa kwanjiye kutentekapu byanza byende, dyambedi, bwa kudifwanyikijaye ne mulambu wende. Nenku pashiishe mashi avwa alaabiibwa mwaba uvwaye mwa kwimana mwinshi mwa mashi. Mashi avwa ne cya kwikala kumutu kwende. Nenku aci civwa ncimanyinu cya ne yêyè uvwa mudifwanyikije ne, mmupiile, ne mufile cijaadiki cya ne mupinganyi kampanda uvwa kawuyi mwenze bwalu uvwa mwangate kaaba kende.

⁵⁵ Ncimfwanyi kaayi cilenga's we! Kaa, mupikudiibwe's we! Nwamonu's, cilumbu cikaavwa cikoshiibwe ne bwakane, ne dilomba dya bwakane bwa cijila bwa Nzambi dikaavwa dikumbajiibwe. Nenku Nzambi kwambaYe ne: "Mpindyewu Nèndombè mwoyi webe," ne piine apu, mpavwa mwo—mwo—mwoyi mwenze mpekaatu. Pashiishe mupinganyi ùvwà kawuyi mwenze bwalu kwangatawu kaaba kende. Nenku civwa nnyama wa mwikàle ne mashi; kî ncimuma cya pomme, anyi cya pêche to. Kakuyi mpatà to aci's bivwa bikengela kuvwijaci bwalu

bwa dimiinu dya nyoka butooke tòò kudi muntu ne muntu's, bwa ne civwa mmashi. Nenku miine mashi aa, àvwà kaàyi mwa kufumina ku cimuma kampanda awu, akafumina mu mupinganyi ùvwà kawuyi mwenze bwalu to. Nenku mwoyi uvwa mupatuke, wòwò paawu—wòwò paawu, pa kaaba kende, ne mashi avwa cimfwanyi cya ne nyama uvwa mufwe ne mashi avwa mapatuke.

⁵⁶ Ne mukuukwidi mu kulaaba kwa mashi kumutu kwende aku, uvwa uleeja ne uvwa mufwanyikijiibwe mu bupikudi, bwalu mmudifwanyikije ne...ku mulambu awu, mudiswikakaje yèyè mwine ne mulambu awu, ne mashi avwa bu cimanyinu.

⁵⁷ Bilenga kaayi—kaayi's we! Ncimfwanyi kaayi's we! Cyòci's ncifwanyikijilu cipwangane cya Kilisto, cya menemene, mwena kwitabuujja leelu ewu mwimane mwinshi mwa Mashi meela panshi, mudifwanyikije ne Mulambu awu. Cipwangane anu menemene ne—ne mwaci mwònsò, cya muvwa Kilisto, kayi—kayi nyama to...Nudi numona's, nya—nyama kampanda uvwa mufwe, kadi ùvwa...

⁵⁸ Cintu cidi citambe kwikala kaciya cyenze bwalu citudi twètù naaci, ngeela meeji, ncifwanyine kwikala, nya—nyama, mwànà wa—wa mukooko. Pààkajingà Nzambi kufwanyikija Yesu Kilisto, WàkaMufwànyikija ne Mwànà wa mukooko. Ne paswileYe kudifwanyikija Yèyè mwine, WàkaDifwànyikija ne nyuunyi, Nkuci. Ne nkuci nnyuunyi wa mutambe kwikala kayi mwenze bwalu ne mutambe kwikala wa mankenda ku mwoyi wa bukwanyunyi bwònsò, ne mwànà wa—wa mukooko ki udi mutambe kwikala wa kayi mwenze bwalu ne mutambe kukezuka ku mwoyi wa bukwanyama bwònsò. Pa nanku nudi numona ne pavwa...

⁵⁹ Yesu wakabatijjiibwa kudi Yone, ne Bible mmwambe ne: “Ne—ne yèyè kumona Nyuma wa Nzambi, mufwanangane ne nyuunyi wa nkuci, upweka pambidi Pende.” Ki bwa cinyi bu ne bivwa...Bu ciikàle mbwa wa diitu, anyi bu ciikàle nyama mukwabo kana yònsò ewu, ngiikadilu wa—wa nkuci kavwaku mufwanyine kubwelakana kushaala cintu cimwe ne ngiikadilu wa mbwa wa diitu to, nansha ngiikadilu wa—wa nyuunyi wa nkuci kavwaku mwa kubwelakana kushaala cintu cimwe ne wa nyama mukwabo kana yònsò ewu to pa kuumusha wa mwànà wa mukooko. Nenku ngiikadilu yibidi ayi yakasangila, dîbà adi yivwa mwa kupetangana ewu ne ewu.

⁶⁰ Mpindyewu nudi numona didyanjila-kulongolola anyi? Civwa mmwànà wa mukooko paakalwaye mwaba awu. Nwamonu anyi? Nwamonu anyi? Kùdì...Civwa mmwànà wa mukooko paakalwabo—paakalwabo nende. Civwa mmwànà wa mukooko. Yèyè wakalediibwa mwànà wa mukooko. Yèyè wakakoleshiibwa, mwànà wa mukooko. Nwamonu ayi?

61 Nenu, ki bwa cinyi, ki mushindu umwepele wa Nyuma mulelela udi mwa kwakidila Diyì, udi mwa kwakidila Kilisto. Bakwabo bônso nebateete, baakateeta bwa kuMupeta, ne kuteeka Nyuma wa Nzambi pambidi paa mbwa wa diitu, nwamonu's, wa ciji, mubi, wa lwonji. Kaakushaala pòpù to. Nyuma Mwimpè udi anu ubuuka umba uya. Yèyè kaakushaalu to.

62 Anji ambaayibi tũng bu ne Nkuci awu mmutuuluke, kadi, pamutu paa Yèyè kwikala Mwânà wa mukooko, kuvwa kwikàle nyama kampanda wa cyanaana? Nunku's mMutuute milela mwalukile's. Nwamonu anyi? Kadi paakasanganaYe ngiikadilu awu uvwaYe mwa kubwelakana kushaala cintu cimwe nende, s'Cyakashaala anu Umwe.

63 Ne dîbà adi—adi—adi Nkuci wakalombola Mwânà wa mukooko, nenku, monaayi, Wàkalombola Mwânà wa mukooko too ne ku cishipeelu. Mpindyewu, Mwânà wa mukooko wakatumikila Nkuci awu. Nwamonu anyi? Kwônso kuvwaYe uMulombola aku, nkuvwaYe muswe kuya.

64 Ndi ndikonka, leelu ewu, padi Nzambi utulombola ku—ku nsòmbelu wa badilambule mu kaabujima ne wa diMukwacila mudimu, ndi ndikonka nyuma yetu dîbà adi ní kayituku yitomboka mîngà misangu, yileejaku ndambu ne, ndi anu ndikonka ní tudi bânà baa mikooko's? Nwamonu anyi? Nwamonu anyi? Mwânà wa mukooko utu ne butumike.

65 Mwânà wa mukooko utu mudifidi bu mulambu. Katu—katu yèyè—katu yèyè wangata, unana bidi bu byende to. Udi mwa kumulaadika panshi kadi kukosa myòsà ya pambidi pende ayi. Ki cintu cimwepele cidiye pende naaci ncyôcì aci. Kacya kèna—kèna yèyè wambaku cintu nansha cimwe pa bwalu abu to; ùdi yèyè anu ulekelela byônso bidiye naabi. Ki mwânà wa mukooko nyèyè awu. Ùdi ufila byônso kudi wende. . . ùpèèshangana byônso cyanaana, udifila yèyè mwine ne cyônso cidiye.

66 Nenu mushindu awu ki udi mwena Kilisto mulelela, padiye. . . ùdifila bu mulambu yèyè mwine, kayi ucyuka kantu nansha kamwe bwa buloba ebu to, kadi mwikàle ufila byônso bidiye naabi kudi Nzambi. Nwamonu anyi?

67 Nenu mpindyewu ewu nguvwa m'Mwânà wa mukooko mupwangane, Kilisto awu. Ne pashiishe ku mashi meela panshi a mwânà wa mukooko ewu, mwânà wa mukooko wa mu mubidi wa mu Ejipitu awu, mashi akalaabiibwa, ne, paakalaabiibwawu apu, avwa bu cimanyinu, dîbà adi Mashi a ewu Mwânà wa mukooko avwa mafwanyine kwikala bu cinyi? Nwamonu anyi? Cimanyinu cya ne twètù tudi bafwe ku twètù biine ne badifwanyikije ne Mulambu wetu. Nwamonu anyi? Dîbà adi, Mwânà wa mukooko ne—ne ôwò—ôwò Mashi awu ne muntu mwine bidi bilwa bidifwanyikije pamwe, Mulambu ne mwena kwitabuuja. Wamonu's, wèwè udi mumanyishiibwe kudi

nsòmbelu webe, kudi Mulambu webe awu. Aci nci di cikuvwija cyùdi aci.

⁶⁸ Dìbà adi mashi avwa cimanyinu, anyi didifwanyikija. Mashi avwa amanyisha ne mukuukwidi uvwa mushipe mwânà wa mukooko, ne mwitabe mwânà wa mukooko awu, ne mudilaabe yêyè mwine cimanyinu, cya ne kavwa ne bundu to. Kavwa ucyuka bwa muntu uvwa ucimona to. Ûvwa muswe bwa muntu yònsò kucimonaye, ne civwa citeekiibwe mu mushindu wa ne muntu ne muntu yònsò uvwa upita awu uvwa mwa kumona cimanyinu aci.

⁶⁹ Nwamonu's, bantu bààbûngì batu baswe kwikala beena Kilisto, kadi batu—batu—batu baswe kucyenza mu musokoko bwa muntu nansha umwe kayi mufwanyine—kayi mufwanyine kumanya ne mbeena Kilisto to. Anyi, beena—beena dyabo batubo baya naabo mu lunyaanya abu, bamwe baa kudibo mbafwanyine kwela meeji ne: “Ee, mpindyewu, mona, mêmè—mêmè—mêmè's ndi muswe kwikala mwena Kilisto, kadi nci tu muswe bwa *Kampanda* acimanye to.” Nwamonu anyi? Ee, mpindyewu, nudi numona's, aci kî mbwena Kilisto to.

⁷⁰ Bidi bikengela bwa bwena Kilisto kuleejabu Cimanyinu cyabu patooke, nwamonu's, bantu bitwilangane, mu nsòmbelu wa bantu bitwilangane, ku bìrô, mu mùsèèsù, padiku ndululu, cintu kana cyònsò, mu ekeleeziya, myaba mikwabo yònsò. Mashi ki Cimanyinu, ne Cimanyinu cidi ne cya kuteekiibwa, nwamonu's, bwa cyanaana (kacyena) nansha cipungidi ciine kacyena ne bwenzeji to.

⁷¹ Mashi ngavwa cimanyinu, anyi dimanyishiibwa kampanda, ciikàle cimanyisha ne muntu ewu wapikudiibu. Mpindyewu, ee, monaayi, bôbô bavwa ne, bavwa bapikudiibwe kumpala kwa nî ncinyi nî ncinyi kwenzekaci. Ku diitabuuja nkwakalaababo mashi awu. Nwamonu's, kumpala kwa cyòci aci kwenzekaci mu bulelela, mashi akaavwa malaabiibwe ku diitabuuja, biikàle biitabuuja ne necyenzeke. Nwamonu anyi? Kumpala kwa cijji cikole cya Nzambi aci kupicilaci mu ditunga amu, bivwa bikengela bwa mashi kulaabiibwawu, dyambedi. Dìbà divwa dimanè kupita pàvwà cijji cikole cimanè kudituuta.

⁷² Mpindyewu tudi ne dileesona mwaba awu ditudi pàmwápa, bafwanyine bulelela kunutwadila mu meeji, bwa katanci cyanaana. Tangilaayi, *kumpala* kwa kwenzekaci, bwalu nekulwe cikondo ciwikala kuyiku mwa kulaaba Mashi to.

⁷³ Mwânà wa mukooko awu wakashiibwa ku dìbà dya diloolo, paanyima paa mulamiibwe munda mwa matuku dikumi ne anaayi. Ne pashiishe mwânà wa mukooko awu wakashiibwa ne mashi akalaabiibwa ku dìbà dya diloolo. Nudi nucyumvwa anyi? Cimanyinu kacyakulwaku ku diikalaku to anu too ne paakalwa dìbà dya diloolo.

⁷⁴ Nenku edi ndîbà dya diloolo dya cikondo citudi ne mwoyi eci. Edi ndîbà dya diloolo bwa—bwa Ekeleeziya. Edi ndîbà dya diloolo bwanyi mêmè. Edi ndîbà dya diloolo dya Mukenji wanyi. Nkaadi mfwa. Nkaadi nya. Nkaadi ngenda mpatuka, pa dîbà dya diloolo dya Evanjeeliyo. Nenku tudi balwe bapicile mu dibingishiibwa, ne bikwabo, kadi edi ndîbà didi dikengela bwa Cimanyinu kuteekiibwaci. Mvwa munwâmbile mu dyalumingu dishaale ne mvwa ne cintu kampanda cîmvwà muswe kunwambila; s'ki cyôci eci. Dîbà dinudi anu kanuyiku—kanuyiku mwa kunaya naaCi to. Bikengela anu cyenjiibwe. Piikalaciku ne cya kwenjiibwaci, bikengela kwenjiibwa mpindyewu. Bwalu, tudi mwa kumona ne cijji cikole cikaadi pabwîpî ne kupicila mu ditunga, ne cyônsò cidî kacyi mwinshi mwa Cimanyinu aci necibutuke. Mashi, Ôwò ngadi akumanyishisha. Monaayi.

⁷⁵ Bwalu, mwoyi wa nyama kawuvwa mwa kwalukila pa muntu to. Pavwa mashi ediibwa panshi, mwoyi uvwa upatuka, mu bushuwa bwa bwalu, bwalu bivwa byenza cintu cimwe. Nenku pakaavwa mashi a mwoyi mapatukemu, bu mwabi ne mwoyi uvwa mushiilangane ne mashi. . . Mpindyewu, mashi adi mmwengûngû wa mwoyi, kadi mwoyi ncintu kampanda cya cishiilangane ne mashi, kadi mwoyi udi usanganyiibwa *munda* mwa mashi. Nenku mwoyi wa nyama kawuvwa mwa kwalukila pa mukuukwidi to. Pavwaye wela mashi a mwânà wa mukooko ewu panshi, bivwa bikengela kulaabayê mwengûngû awu, bwalu mwo—mwoyi ukaavwa muye ne kawuvwa mwa kwalukila to.

⁷⁶ Bwalu, kawuvwa mwa kulwa pa muntu to, bwalu mwoyi wa nyama kawutu ne musuuka to. Nyama katu mumanye ne udi butaka to, ne udi—udi anu. . . Katu mumanye mpekaatu to. Kî mmumanye nansha mukese to, ki bwa cinyi ncintu cidî ne mwoyi kadi kî mmusuuka udi ne mwoyi to. Ki bwa cinyi, mwoyi wa nyama awu kawuvwa mwa kwalukila pa mwoyi wa muntu to, bwalu kawuvwa ne musuuka munda mwa mwoyi awu to. Mpindyewu, kudi mwoyi kampanda, mashi kampanda; mwoyi kampanda, ne musuuka kampanda munda mwa mwoyi awu; musuuka udi nngiikadilu wa mwoyi. Ki bwa cinyi, kavwa ne nngiikadilu wa musunguluke to, yêyê uvwa nyama, ki bwa cinyi mashi avwa bu cimanyinu cya ne mwoyi uvwa mufidiibwe.

⁷⁷ Kadi mu mwaba wa butumbi ewu, mwinshi mwa cipungidi eci, kudi dishiilangana pankaci paa Mashi ne Mwoyi. Cimanyinu bwa mwena kwitabuuja leelu ewu n'Nyuma Mwîmpè; kacyi mashi kampanda, mwengûngû kampanda to, kadi Cidi n'Nyuma Mwîmpè wa Nzambi. Ki Cimanyinu cidî Nzambi ulomba Ekeleeziya leelu ewu. Nzambi udi ne cya kumona Cimanyinu eci. Udi ne cya kuCimona mu umwe ne umwe wa kutudi.

⁷⁸ Ki bwa cinyi, pakaadi mindidimbi ya diloolo yimweneka apa, ne cijji cikole pabwîpî ne kupongolodiibwa cyumukila mu Dyulu, pa matunga adi kaayi aneemeka Nzambi aa, ne pa beena

bupidya badi kabayi baneemeka Nzambi aba, pa balaki baa—baa mukana badi kabayi ne cidibo naaci aba, pa bintu ebi! Nenku mêmè—mêmè ndi muteeteteete bwa kudivungulula mêmè mwine ne kwikala ne nsòmbelu anu munkaci mwaci mwine, bwa kumona ne mmwaba kaayi uvwaci ciimanyine, kumpala kwa mêmè kwamba miine maalu aa. Mpindyewu tudi ne mwoyi mu mindidimbi, ne ciiji cikole cikaadi pabwîpi ne kudikuma, ne Nzambi udi munkaci mwa kulomba Cimanyinu cya ne wêwê mwine ukaadi mupete Cimanyinu Cyende, Nyuma Mwîmpè awu. Ki mushindu umwepele, ne cimanyishilu cimwepele ciikalaku Nzambi mwa kupita, bwalu Cidi m’Mwoyi mwinênkà wa Yesu Kilisto mwalukile munda mwa mwena kwitabuuja.

⁷⁹ Mwoyi wa nyama kawuvwa mwa kwalukila to, ki bwa cinyi bivwa bikengela bwa mashi kampanda kuteekiibwawu pa ciibi, pa mukamba ne pa dikunji dya ciibi; mu mushindu wa ne mupici wa njila yònsò, bantu bònsò bitwilangane, muntu ne muntu uvwa upicila lwà ku nzubu aku awu, uvwa umanya ne kuvwa cimanyinu pa—pa ciibi aci, cya mashi, cya ne mwoyi kampanda uvwa mufwe ku ciibi aci. Amen!

⁸⁰ Ki mushindu awu udibi bikengela kwikalabi bwa mwena kwitabuuja yònsò leelu wa Ndaaya ewu, muujiibwe tente ne Nyuma Mwîmpè; Cimanyinu cya ne Mashi meela panshi a Mwânà wa mukooko, cya ne Mwoyi úvwà munda mwa Mwânà wa mukooko awu, mmwalukile ne mutwibwe citampi munda amu bantu bitwilangane, bwa muntu ne muntu udi upicilapu awu, mwikàle uyiikila neebe, udiku muswikakane neebe awu, amone ne Mashi mmalaabiibwe, ne Cimanyinu cya Mwoyi úvwà munda mwa Mashi awu aci cididi pambidi peebe. Udi mukubiibwe ku ciiji cikole aci. Anu Aci nkaayaaci; kî mbuumambala to. To, mukalenge!

⁸¹ Mwoyi wa nyama kawuvwa mwa kulwa pa mwena kwitabuuja to, bwalu civwa nnyama, ne wòwò uvwa wakula wamba anu bwa kondo kaa mwoyi cyanaana, mwikàle ùleeja ne kuvwa kulwa Mulambu mupwangane.

⁸² Nenku, mpindyewu, mmunyi mudiku kufwanyine kwikala Mulambu mutambe kupwangana kupita wa Nzambi Yèyè mwine ushaala Difuta dya cibawu, Yèyè mwine? Pààkavwijiibwà Nzambi mubidi, mu Mashi Ende Yèyè mwine a bufuki awu, ki...mushindu umwepele uwaku Mwoyi wa Nzambi mwa kwalukila.

⁸³ Bwalu, twêtù bònsò tudi balediibwe ku disangila dya mulume ne mukaji, nenku ki bwa cinyi mwoyi udi mwômò amu ngwa pa buloba, ne mwine mwoyi awu kawakukumbanaku to. Ncintu cikaadi cimana kulumbulwisha ne cimana kupiisha. Kwèna ne mushindu wa kuwela biteetela to. Kakwena mushindu wa kuwela biteetela to. Kakwena mushindu wa—wa kuwakaja to. Kakwena mushindu wa kuwulengeja to. Budiwu naabu mbwa

kufwa! Ki dilomba dimwepele didiku ndyôdi adi. Budiwu naabu mbwa kufwa.

⁸⁴ Nenu Mupinganyi awu, Mwoyi wa Yesu Kilisto, bidi bikengela ubwele munda mwebe, udi mwikàle Nyuma Mwîmpè, Cimanyinu cya Nzambi aci; cya ne wêwè udi mwitabe Mashi a Mwan'Ende, Yesu Kilisto.

⁸⁵ Ki bwa cinyi, mu matuku a Wesley anyi . . . Matuku a Luther, baakacyelela meeji ne, “nkwitabuujja.” Mu matuku a Wesley, “mwengungu wa Mashi.” Kadi edi ndituku dya ndekeelu, didi—didi Cimanyinu cilombiibwe. Aci cidu cyenza, pamwe, cintu mu kaabujima bwa Dyambwibwa. Nudi nucyumvwa anyi?

⁸⁶ Mâyî, mashi, ne nyuma mbidi bilwa padi maamù ulela mwânà. Cintu cya kumpala cidu cibwayikà, mu dilela dyetu dya ciibidulu edi, mmâyî, cintu ciibîdi mmashi, ne cintu cidu cilondà mmwoyi.

⁸⁷ Mu mubidi wa Mukalenge wetu Yesu Kilisto mwakapatuka: mâyi, Mashi, ne Mwoyi. Nenu Ekeleeziya mu kaabujima, Mukaji-musela, pamwe, mmwenjiibwe ku dipicila ku dibingishiibwa, dijidiibwa, ne dibatiiza dya Nyuma Mwîmpè, udi mwikàle Cimanyinu.

⁸⁸ Bu mudi Ebelu 11 wamba ne: “Bônsò aba bàakalalakanà bavwale biseba bya mikooko ne biseba bya mbuji, ne bashiya byanza bitupu, ne bintu byônsò bidibo benze ebi, kadi kabayi bavwijiiibwe bapwangane twêtù katuyiku to.”

⁸⁹ Ne Ekeleeziya mu dituku edi, udi mupete Cimanyinu awu, cya dibatiiza dya Nyuma Mwîmpè, cya ne Mashi mmeediibwe panshi ne Nyuma Mwîmpè udi pa Ekeleeziya; twêtù katuyiku to, dîbà adi, kabeena mwa kubiika ku lufu to. Kadi bwalu bwabo mbulaale kutudi twêtù, bwalu Nzambi mmulaye ne NeaMupete, nenu muntu kampanda neikaleku. Ncyèna mumanye ne nganyi wikalakù to, kadi muntu kampanda neaMupete. Cintu cimwepele cindiku mèmè mwambwile bujitu, ncyà kuCiyiisha. Mbwalu bwa Nzambi bwa kuya kwenda kukebangana ne dimiinu didyanjila kulongolola adi. Nediikaleku, nansha nanku. Bwalu, bôbò abu nebiikaleku, umwe ne umwe wa kudibo, muntu ne mukwende; cikondo cya mâyi, cikondo cya Mashi, ne mpindyewu cikondo cya Cimanyinu cya Nyuma Mwîmpè.

⁹⁰ Nenu, nwavulukaaayi ne, Izaleela wakapicila mu bintu byàbûngì, kadi mpa dîbà dya diloolo pàakalòmbiibwà cimanyinu; kî mmu dinda to, kî mmu didilongolola, munda mwa matuku dikumi ne anaayi muvwabo balame mwânà wa mukooko amu to. Izaleela uvwa mumanye ne cintu kampanda civwa munkaci mwa kulwa.

⁹¹ Nansha Luther kabidi uvwa mucimanye, nansha Wesley kabidi uvwa mucimanye, nansha Finney kabidi, Knox, Calvin, bavwa bacimanye. Eci ki Cyôci! Bavwa bamanye ne kuvwa mwa kulwa cikondo civwa Dikunji dya Kapya ne cya kwalukila

kudi Ekeleeziya. Bavwa bamanye ne kuvwa mwa kulwa cikondo civwa bintu ebi mwa kwenzeka, kadi kabaakashaala ne mwoyi too ne kudibimona to, kadi bavwa babĩndile.

⁹² Izaleela uvwa mumanye ne cintu kampanda civwa munkaci mwa kulwa, kadi muvwa mpa dĩa dya diloolo pàakalaabiibwà mashi a mwànà wa mukooko awu, cimanyinu aci, ku ciibi. Kadi, mwànà wa mukooko ukaavwa mumana kulama.

⁹³ Civwa m’Mwànà wa mukooko kubangila anu ku ntwadijilu too ne ku ndekeelu. Civwa m’Mwànà wa mukooko mu cikondo cya Luther, civwa m’Mwànà wa mukooko—Mwànà wa mukooko mu cikondo cya Wesley, kadi mpindyewu ncikondo cya Cimanyinu cidi nzubu ne nzubu yònsò ne cya kwikala mubwikila kudi Cimanyinu. Nzubu ne nzubu yònsò wa Nzambi udi ne cya kwikala mubwikila kudi Cimanyinu. Ewu yònsò udi munda amu udi ne cya kwikala mubwikila kudi Cimanyinu. Ne Nzubu wa Nzambi m’Mubidi wa Yesu Kilisto, ne ku Nyuma umwe nkutudi twètù bònsò babatijiibwe mu Cimanyinu eci ne balwe citupa cyaCi, ne, Nzambi mwambe ne: “Pàngààmònà Cimanyinu eci cileejiiibwe patooke, Nèmpicilè pamutu peenu.” Ndíbà kaayi ditudi ne mwoyi mpindyewu edi’s we! Kaa!

⁹⁴ Mashi kampanda ngavwa amanyisha, amanyisha mwena kwitabuuja awu, bwalu mwoyi uvwa mupatuke, kawuyi mwa kwalukila to, pa nanku bivwa bikengela kwikalaye ne—ne mwengùngù kampanda. Bivwa bikengela kwikalaye ne cintu cyenze bu mukubu, mashi kampanda, mwengùngù kampanda ùvwa ùleejà ne mashi avwa mapatukemu.

⁹⁵ Mpindyewu Nyuma Yèyè mwine mwena diinà awu ki Cimanyinu. Nyuma Mwimpè Yèyè mwine ki Cimanyinu, kī m’Mashi to. Mashi akeediibwa panshi ku Kalvariyo, aci ncyà bushuwa. Kadi Mashi awu, bwa cidifu wòwò, s’akaalukila ku bintu bya kwakafumawu abi, ku byakudya bivwaYe udyà bwa kwikala ne mwoyi abi. Kadi, nudi numona’s, munda mwa kabulu kaa Mashi aku muvwa musanganyiibwa Mwoyi mwine wàkenzà bwa ne kabulu kiine kaa Mashi aku kabange kunyunga awu. Piikalabi ne bivwa . . .Mwengùngù awu kī nguvwa ne Mwoyi munda mwawu amu to, wòwò mwine, nenku ki bwa cinyi kakavwa mwa kunyunga to. Kadi pàakabwelà Mwoyi munda mwa mwengùngù wa mashi awu, Wòwò awu ngwakenza kabulu kaa mashi. Wòwò awu wakenza Wòwò mwine KaaWu kabulu kaa mashi, pashiishe ku kabulu ne ku kabulu kaa mashi, pashiishe kulwaku Muntu. Ne Muntu awu uvwa Nzambi, Emanuwele, mu mubidi. Kadi pàakaalukilà Mwoyi awu, mwengùngù wakayaku, kadi Cimanyinu n’Nyuma Mwimpè pa Ekeleeziya, mu mushindu wa ne badi bamona Kilisto.

⁹⁶ Bikengela nanku, bwalu mukaji ne bayende badi balwa umwe. Badi balwa umwe. Ne ki mudi kabidi Mukaji-musela ne Kilisto balwa Umwe. Mudimu wa bwambi wa Mukaji-

musela, ne mudimu wa bwambi wa Kilisto, ngumwèumwè awu. Nenku vulukaayi ne, “Maalu ànkaadi mulonde aa, Wèwè Teofile, ndi mukufundilewu, àkabangà Yesu kwenza ne mutungunuke ne kwenza aa.” Lufu Lwende kalwakaMwimanyikaku to. To, mukalenge! Wàkaalukila cyakabidi. Kayi mupersona mwisàtù to, kadi Mupersona umwèumwè wàkaalukila mu mmwenekelu wa Nyuma Mwîmpè, bwa kutungunuka ne mudimu awu; ne ùdi anu utungunuka, mudi Mukanda wa Byenzedi mwambe. “Yesu Kilisto umwèumwè awu makeelela, leelu, too ne kashidi.” Ki Cimanyinu ncyôci aci. Ki cimanyishilu ncyôci aci.

⁹⁷ Pavwa Peetelo ne Yone bapicila mu ciibi civwabo babiikila ne Cilenga aci, kuvwa muntu mulaadika mucibukile panshi, mulema kacya mu difu dya mamwëndè, ki kwambaye ne: “Argent anyi ngôlò ncyèna naabi to; kadi cîndi naaci, ndi nkupà. Mu Dîna dya Yesu Kilisto wa ku Nazaleeta, juuka wendele kuulu.” Nwamonu anyi? Nenku paakaakulabo naabo, baakamanya bavwa binyonga ne kabayi balonge kalaasa to, kadi baakamona ne baakadi ne Yesu. Nwamonu’s, Cimanyinu civwa mwaba awu, cileejiibwe patooke. Nwamonu’s: “Cîndi naaci!” Bamona mwaneetu wa balume mupele, mudishinde mulaadika panshi mwaba awu, mucibukile panshi ne kwîsù kunyangukangane kwônsò, ne bikwabo byônsò. Ne Mwoyi umweumwe uvwa munda mwa Kilisto awu nguvwa munda mwabo ne: “Cîndi naaci!”

⁹⁸ “Mu Dîna Dyanyi *nwênù* nenwipate badémons.” Kabiya ne: “*Mêmè nêngiipatè*” to. “*Nwênù* nenwipate!” “*Nwênù* bambile mukuna ewu!” Kabiya ne: “*Mêmè* mwambe” to. “*Nwênù* bambile mukuna ewu!”

⁹⁹ Kaa, mwaneetu, dîbà dîdî dîkengela bwa Cimanyinu aci kuleejiibwaci patooke’s dikaadi pabwîpi. Twêtù’s tudi mwa kudimona. S’tudi bamanye ne tukaadi pabwîpi ne nshiikidilu patudi twakulangana apa. Tukaadi batwaletwale mayiisha a mishindu yônsò, bwa kuleeja bimanyinu ne maalu a kukema, kadi’s nyewu tudi baalukile mpindyewu bwa cidi cikengela bwa Ekeleziya kwenzaye. Bîdî bikengela bwa Cimanyinu aci kuleejiibwaci patooke. “Pângààmònà mashi, Nêmpicilè pamutu peenu.” Cintu cikwabo nansha cimwe kî ncifwanyineku kukumbana nansha. Cidi ne cya kwikala Mashi. Mpindyewu, Nyuma Mwîmpè ki cyetu Cimanyinu, cya kudi Nzambi.

¹⁰⁰ Byenze bu mwena teoloji kampanda wa munene, mumanyi wa—wa dibàla, mwaneetu wa ba-Baptistes, muntu wa maalu malenga, wa ngiikadilu mulenga, paakalwaye kûndî musangu kampanda, ne kwambaye ne: “Mwaneetu Branham,” yèyè ne, “wèwè nya’ wakula bwa Nyuma Mwîmpè ewu,” yèyè ne, “mona’s, aci kî ncintu cya cipyacipya to.” Yèyè ne: “S’tukaadi baMulongeshelongeshe bamane ne mwoyi, munda mwa bikondo.” Ki mêmè—mêmè kwamba, ee, mêmè. . . Yèyè ne: “Twêtù’s tudi bapete Nyuma Mwîmpè.”

101 Mémè ne: “Wèwè utu muMupete dîbà kaayi?”

102 Yèyè ne: “Pàngààkiitabuujà apu.” Bwalu, mvwa mumanye ne cyòci aci ki civwa teoloji wa ba-Baptistes, wa ne, paudi witabuujja, udi upeta Nyuma Mwîmpè.

103 Mémè kwamba ne: “Dîbà adi’s Pòlò wakamba, mu Byenzedi 19, wambila musumbà kampanda wa bantu, kasumbu kampanda kaa ba-Baptistes, bwalu, muyiishi kampanda wa ba-Baptistes uvwa umwe wa baakakudimwishabo mucima kudi Yone, uvwa ujaadikilangana ku Bible ne Yesu nguwwa Kilisto awu.”

104 “Paakapicilaye mu nseke mitumbuke ya ku mubangubangu wa Efeso, wàkasangana bayiidi kampanda, ne wàkabàmbila ne: ‘Nukaadiku bapete Nyuma Mwîmpè *kacya* nwítabuuja anyi?’ Bòbò kwamba ne: ‘Katùtu bamanyeku ne Nyuma Mwîmpè ùtukù to.’” Ki kubakonkaye mushindu uvwabo babatijiibwe. Nenku bòbò kabavwa babatijiibwe mu Dînà dya Yesu Kilisto to, Mwânà wa mukooko uvwa mulambudiibwe awu’s. Kabavwa bafwanyikijiibwe Nende to, nansha kakese. Bòbò bavwa anu bacítàbuùje cyanaana; byenze anu mudi bwanga bwa dinwa buteeka pààpa, kadi kabayi babunwe to. Pòlò kubatuminaye diyi bwa kubatijiibwabo cyakabidi, mu Dînà dya Yesu Kilisto.

105 Nenku paakenzaye cyòci eci, ki Cimanyinu aci kulwaci pambidi paabo. Baakafwanyikijiibwa ne byenzedi ne bimanyinu bya Nyuma Mwîmpè, baakula mu myakulu munkaci mwabo amu, ne bamba biprofeta, batumbisha Nzambi. Baakafwanyikijiibwa ne—ne Mulambu wabo.

106 Nenku Nyuma Mwîmpè ki dyetu dimanyishiibwa. Yèyè ki udi utumanyisha bu beena Kilisto. Kacyi buumambala bwetu mu maekeleeziya to, kacyi dyumvwa dyetu dya Bible to, kacyi búngi bwa dimanya dya Bible dyùdì naadi to. Mbúngi bwa dimanya dyùdì naadi pa bidi bitangila Mwenaye, nwamonu’s, mushindu udi Mwenaye utamba kwikala ne mwoyi munda mwebe. Cidi ngwèwè—cidi ngwèwè mwine muumuke. Kuciyiku kabidi to. Udi udibala wèwè mwine mufwe, ne Cimanyinu ki cidi ne mwoyi munda mwebe. Ne kaCicyena mwoyi webe wèwè to; Cikaadi n’Yèyè.

107 Pòlò mmwambe ne: “Nsòmbelu wùndi mpindyewu nende ewu (Ûkaavwa ne nsòmbelu mushiilangane ne uvwaye nende kale awu.) kî mmémè to, kadi n’Kilisto udi ne mwoyi munda mwanyi.” Ki Cimanyinu cimanyishiibwe civwà Nzambi mulombe aci. Bafwanyikijiibwe ne wetu. . .Difwanyikijiibwa dya ne Mulambu wetu, Mwoyi wa Musungidi wetu munda mwetu, Nyuma Mwîmpè.

108 Kaa, Cimanyinu kaayi—kaayi cilelela’s we! Kakwena mwa kwikala kabidi Cimanyinu cikwabo to. Kaa, ekelekele, nwikalapù nanshà mwa kubakula cingenyengenyi cya—cya bwalu abu’s we. Bu ne mvwaku ne—ne bukole mu dinda emu, ku

mêyi, bwa kwamba patooke ne kuteeka munda mwa musuuka webe udi mund- . . . kî mmu maci ebe to, kadi mu musuuka webe, nenku udi—udi mufwanyine kumona cishindiki cya Yêyè awu. Bidi—bidi bikengela, Yêyè awu udi ukushiya mu diikisha dya kacya.

¹⁰⁹ Anji ambabi tŭng, bu ne wêwè uvwa mubunde cilumbu, ne bikemgela bwa wêwè kulumbulwishiibwa ku tubàdì twa cinsangànsàngà. Nenku wêwè mwikàle mumanye ne, bôbô basangane ne udi mupiile, udi ne cya kufwa, ne neufwile ku nkwasu mutwa ku nzembu, anyi mu cibambalu cya bakushipa ne gaz, anyi bakushipa ku lufu kana lwònsò lwa bantu bitwilangane luvwabo bakulongolwele, pàmwápa bakwowa, anyi cintu kampanda, bàkupà mututu wa ufwa kuyi ulumbulula to, cibawu cyònsò cìikalàku aci. Cibì wêwè mumanye ne udi . . . Udi mupiile. Peebe mumanye ne udi mupiile, ne udi ne cya kufwa pawikala kuyi mupete mukulumbulwidi udi mwa kwangata kaaba keebe, udi mwa kukupatula mu cintu aci. Nenku mpindyewu's udi mufwanyine kuswa bwa kupeta mukulumbulwidi mutambe kwikala mwîmpè ûdiku peebe mufwanyine kupeta awu.

¹¹⁰ Ne dîbà adi kupeta kwa mukulumbulwidi wa mwîmpè, mukulumbulwidi mudimuke, s'udiku mufwanyine kudyumvwa ne cilumbu cyebe civwaku . . . udi mufwanyine kuumvwaku diikisha ndambu, bwalu udi mupete mukulumbulwidi. Kadi nkufwanyine anu kushaala lukonko lwa ne mukulumbulwidi mwine ewu mmufwanyineku kushintulula mmwenenu wa nzuji anyi, anyi kushintulula kasumbu kaa bateeleji baa cilumbu aci anyi; mukulumbulwidi mwine ewu, ku ngaakwilu wende wa muntu mudimuke ne dimanya dya mikenji adi, bu yêyè mwa kufika ku dishintulula ciine aci, ne kulumbulula cilumbu cyebe ne kujaadikilangana ne—ne bivwa bikengela bwa wêwè kushaala ne mwoyi. Kadi nansha nanku, mu bwende—bwende pende bukookeshi bwònsò bunene abu ne wende ngaakwilu wa kapelu udiye mufwanyine kwakula awu, ne mushindu kampanda udiye mufwanyine kudileeja kumpala kwa kiine kasumbu kaa bateeleji baa cilumbu aku anyi kumpala kwa mwine nzuji awu, wêwè's—wêwè's udiku mufwanyine—wêwè's udiku mufwanyine . . . Pàmwápa udiku mufwanyine kupeta diikisha bwa ndambu wa tusunsa, kadi nkufwanyine anu kushaala lukonko mu meeji ebe amu ne: “Yêyè udiku mwa kucyenza anyi's bakwetu wa yaaya?”

¹¹¹ Kadi mu eci cilumbu cidì panshi apa eci, Nzuji Yêyè mwine ngudi ushaala Mutulumbulwidi. Nzambi wakashaala muntu. Kakuvwa mutulumbulwidi nansha umwe uvwa mufwanyine kucyenza to. Katuvwaku bafwanyine kumupeta to. Mòsà, ne Mikenji, bapofeta, cintu nansha cimwe kacivwaku cifwanyine kucyenza to. Pa nanku Nzuji wakashaala byònsò abi, Kasumbu kaa bateeleji baa cilumbu, Mutulumbulwidi ne Nzuji, Yêyè

mwine; ne wàkangata bwakane bwa Mikenji Yende mu byanza Byende Yèyè mwine, ne kubifucilaye mushinga, Yèyè mwine. Ambaaku tũng mutudi bafwanyine kupanga kwikala batambe kukubiibwa? Kadi kwaluja Mwoyi Wende Yèyè mwine pambidi peetu twètù, bu bujaadiki bwa ne Yèyè wácitàbì. Dikubiibwa kaayi's we!

112 “Eyo, nansha mêmè ngenda mpicila mu cibandabanda cya mundidimbi wa lufu, ncyakuciinaku bwalu bubu nansha bumwe to, bwalu Wèwè udi naanyi.”

113 PadiYe ushaala byònsò Nzuji, Kasumbu kaa bateeleji ba cilumbu, ne—ne Mutulumbulwidi, Yèyè's wakalumbulula cilumbu cyetu. Twètù, basanganyiibwe bapiile kudi Mikenji Yende Yèyè mwine; nenku Yèyè kulwa ne kwangata kaaba kaa muntu mupiile awu, uvwa mu citendeleele awu. Yèyè kwangata mpekaatu wende. Wàkamwangata pambidi Pende Yèyè mwine, ne wàkafwa, ne wàkafuta mushinga awu, ne wàkeela Mashi Ende panshi, ne wakaaluja Cimanyinu Cyende Yèyè mwine, Mwoyi Wende Yèyè mwine.

114 Mona's, twètù's tudi bapwangane. Cilumbu ncimana kuumusha. Kakucyena kabidi mpekaatu kudi mwena kwitabuuja to. Éyì Nzambi wa yaaya, wáfwakù luse's we, pìikalà bantu kabayiku mwa kumona aci ne, kakucyena kabidi cilumbu to. “Ewu udi umvwa Mèyì Aanyi ne wítabuuja Yèyè udi muNtume, udi ne Mwoyi wa Cyendeleele, ne yèyè kaakulwa ku Cilumbulwidi to, kadi ùkaadi mumane kuumuka ku lufu muye ku Mwoyi.” S'ki cilumbu ncyòci aci. Cilumbu cyumusha! Kakucyena kabidi cilumbu pa bwalu abu to. Amen! Nenku mu dikubiibwa, mu dikubiibwa ne Cimanyinu citeeka, pìikalà lufu mwa kubanga kudikuma ku ciibi pambelu pààpa, kalwenaku ne bukontononyi nansha bwa kànà to. Nwamonu anyi? Eyowa's.

115 Cimanyinu nciteeka. Anu Cimanyinu nkaayaaci ncidi ciitabiibwà mpindyewu. Nwamonu's, Yèyè wakenza nanku bwa Cimanyinu cyamona mwa kulwa. Cimanyinu civwa m'Mwoyi wa Nzambi.

116 Ne Nzambi paakenzaYe muntu wa kumpala apu, Wàkamwenza mwànà wa balume. Kadi mwànà wa balume awu wakanyanguka bikole mu mushindu wa ne wakateeleja mukajende pamutu paa kuteelejaye Nzambi, ne mukaji pende wakateeleja dyabulu pamutu paa kuteelejaye bayende, nenku, paakenzeka bwalu abu, cyakabanyanga bikole bôbò bônso, mu mushindu wa ne cyakatwala dikooyika. Ne Yèyè uvwa mumanye ne, paakenzabo nanku, bavwa ne cya kulela bânà pa buloba. Cimuma cya munkaci mwa mucu aci kacivwa mwa kulengiibwa to, ne, pasiishe, paakenzeka aci, baakaditwadila bôbò biine mpekaatu ewu pambidi paabo. Nenku ki bwa cinyi bukwabantu bwònsò nkòong, bwàkalediibwà abu, bwakasanganyiibwa mu

mpekaatu. Mwaba awu, mushindu wa dipatukamu udi aku anyi udi kunu.

117 Ki pashiishe Nzambi kutuulukaye. Kudi mushindu anu umwepele wa kumwaluja, ngwa kumwalujila cyakabidi mwânà wa balume. Kadi mmunyi mudiYe mwa kucyenza, padi Mikenji Yende Yêyè mwine kacya anu yiimana mwaba awu yamba ne “mmupiishiibwe”? Pashiishe ki Taatù Yêyè mwine kushaalaYe umwe wetu. Ki Mwânà wa mukooko mulelela nyêyè awu. Ki kiipacila Kende kavwaYe naaku mu meeji nkòkò aku.

118 Ki bwa cinyi Mwânà wa mukooko wakamanyishiibwa anu menemene mu Budimi bwa Edena, bu muvwabi ne Mwânà wa mukooko ne Nkuci bivwa mwa kutuutakeena musangu kampanda, dîbà divwa Mwânà wa mukooko ne Nkuci mwa kwikala pamwe. Ki paakamanyaYe ne, ku cyôci aci, twêtù tudi mwa kwikala pamwe. Ne Yêyè uvwa muswe kwenza mulambu wa mushindu awu, mpindyewu, bwa Cimanyinu kuteekiibwaci, mu mushindu wa ne katucyena kabidi bantu baa bende to, katucyena kabidi beenyi to, kadi tudi bânà baa balume ne baa bakaji baa Nzambi. Ne Adama ne Eva bônso babidi, mukaji ne mulume, basanga pamwe, mbânà baa balume ne baa bakaji baa Nzambi, mu Kilisto Yesu, ku mulambu Wende munene awu.

119 Nenu, dîbà adi, bwa kakwikadiku ntupakanyi nansha mikese to! Dimiinu dya mwoyi ewu didi ne cya kukunyiibwa mu buloba adi, dya mubidi ewu didi—didi dimiinu didi dibutuka adi; nenu mwoyi, piikalaci mwoyi munyangakaja mu dimiinu adi, udi ubutuka pamwe ne dimiinu adi. Kadi Yêyè mmwele Mwoyi wa Cyendelele mu dyôdi adi ne mudifwanyikije bu Dyende Yêyè mwine, bwa mu dibiishiibwa dya ku lufu Yêyè wamona mwa kudibiisha, ne kantu nansha kamwe kakaadyakujiminaku to. Nudi bamone cîndi muswe kwamba aci anyi?

120 Ndyôdi adi, kadyena mpindyewu mwa kubutuka to. Mwoyi mmudibwikile. N’Cimanyinu, cibwikile kaamubidi kakese aku, cibwikile musuuka wa mwine muntu awu. Kudi Cimanyinu cibwikile mwaba awu, Nyuma Mwîmpè, ne ngwà Nzambi. Ngwèndè Yêyè. “Pângààmònà Cimanyinu, Nêmpicile pamutu peenu.” Cimanyinu cilelela, Nyuma Mwîmpè ngudi Cimanyinu cyetu. Ki bwa cinyi, paudi upeta Nyuma Mwîmpè, udi muumuke ku lufu muye ku Mwoyi. Ki cyônso cidîku pa bwalu abu ncyôci aci, bwalu Mwoyi udi munda mwebe. Kwèna mwa kubutuka kabidi to.

121 Bible mmwambe ne: “Ewu udi mulediibwe kudi Nzambi katu wenza mpekaatu to, bwalu yêyè kèna mwa kwenzaku mpekaatu to, bwalu Dimiinu dya Nzambi,” amen, “Dimiinu dya Nzambi ndisòmbèle munda mwende.” Kadi yêyè udi mwa kwenza mpekaatu bishi padi Nzambi udi kayi ne mpekaatu awu munda mwende? Padiye usanganyiibwa munda mwa Nzambi udi kayi ne mpekaatu, ùdi mwa kwenza mpekaatu munyi?

Cidiye mwenze nansha ciikàle cinyi, Mashi mmamubwikile. Nwamonu anyi? Ùkaadi cifukiibwa cipyacipywa mpindyewu. Majinga ende ne twipacila twende mbya ku Dyulu, bwalu yêyè ukaadi mushintuludiibwe muumuke ku mpoopu muye ku blé. Ende majinga kaàcyenà kabidi amweamwe muvwawu kale amu to, ne yêyè udi ucilleja patooke.

¹²² Wêwè udi wamba ne: “Kaa, s’ndi mwitabuuje Cyôcì aci.” Kadi mucikàle anu wenza mpekaatu anyi? Bwâlâ’s! Udi museeswishiibwe wêwè. Nwamonu anyi? Kacyena mwa kuleeja patooke cingà cintu to anu Cimanyinu.

¹²³ Izaleela wakapeta dîyì dimutumina bwa kushaalaye mwinshi mwa mashi awu too ne paakalwa mêyì a dyasa dya lwendu. “Kanupatuku mwinshi mwawu to!” Mbenze anu basanganyiibwa mwinshi mwa cimanyinu aci, baakatwibwamu citampi. “Kanùùmukumù to!” Bààkashààla anu muntwamu too ne pààkakùmbanà mundankùlù ne pààkadilà mpungi. Nenku paakadila mpungi, nsengu ya kale ya bimpanga bya mikooko ayi paakabangayi kudila, muntu ne muntu wakapatuka ne byakudya bivwaye mulame, uya mutangile ku buloba bulaya.

¹²⁴ Bya mwomumwe kabidi ne mulume anyi mukaji udi muujiibwe tente ne Nyuma Mwîmpè, mmutwibwe citampi, ne mukubiibwe ku bwalu bubu bwônsò ne ku njiwu yônsò. Nsòmbelu wende mujima udi uleeja patooke cidiye, kwônsò kudiye wendela, mudimu wônsò udiye wenza, ewu yônsò udiye uyiikilangana nende. Padiye yêyè ubwela mu dipetangana ne bantu bakaji, padiye ubwela mu dipetangana ne batuye muswikakane naabo, padiye ubwela mu dipetangana ne cintu kana cyônsò, Cimanyinu aci nciteekiibwe mwaba awu. Amen! Pakaadibi ne ki lufu ndwôlò elu: “Ncyakuciina bwalu bubu nansha bumwe to, bwalu Wêwè udi naanyi,” Cimanyinu aci nciteekiibwe mwaba awu. Pakaadibi ne ki dibiiika dya ku lufu ndyôdi edi, yêyè neikaleku, bwalu Nzambi neamubiishe ku lufu ku dituku dya ndekeelu. Yesu ngwâkamba! “Pângâàmônà Mashi, Cimanyinu, Nêmpicilè pamutu peenu.” Kaa!

¹²⁵ Vulukaayi ne, bu cimanyinu aci kacyi cileejiibwe patooke to, nansha cipungidi ciine aci nunku ncivwijiibwe cyanaana. Ncy bushuwa’s. Cipungidi aci civwa civwijiibwa cyanaana. Kakuvwa cipungidi nansha cimwe—nansha cimwe to pavwa cimanyinu aci kaciyiku. Cimanyinu aci civwa bu cipungidi. Nzambi wakenza naabo cipungidi, eyowa’s, mukalenge, kadi bivwa bikengela bwa cimanyinu aci kwikalaci kwôkò. Kacivwa ne bwenzeji to, ciine cipungidi aci, pavwa cimanyinu kaciyiku.

¹²⁶ Kuvwa beena Yuda bààbûngì bàvwà bafwanyine kwamba ne: “Lwâ kuneeku! Mêmè ncyêna ne mashi ku ciibi cyanyi to, kadi ndi muswe nkuleeje cintu kampanda ne, ndi mwena Yuda mutengula. Ndi mutengula.” Aci kacyena ne mushinga nanshi

wa *cishòntò* to. [Mwaneetu Branham udi utuuta cishonto—Muf.] “Pàngààmònà mashi! Pàngààmònà cimanyinu!”

127 Wèwè udi mufwanyine kwamba ne: “Mémè ndi Baptiste, Presbytérien, Méthodiste,” anyi cyònsò cyùdi muswe kwikala aci.

Kadi: “Pàngààmònà Cimanyinu!”

128 Udi wamba ne: “Ndi mwena kwitabuuja. Wanyi mààmù uwa cidimba cya ekeleeziya ewu. Wanyi papa uvwa cidimba cya ekeleeziya ewu. Mémè ndi cidimba cya mwômò amu kacya ku bwànà.” Aci kacyna ne mushinga nansha wa *cishòntò* to. [Mwaneetu Branham udi utuuta cishonto—Muf.] “Mémè ncitu nshima, ncitu ngiiba to. Ncitu ngenza *bikampanda* to. Mémè. . .” Aci kacyna ne mushinga *kampanda* nansha wa *cishòntò* to. [Mwaneetu Branham udi utuuta cishonto.] “Mémè ntu mwena Branham Tabernacle. Ntu ngenza *bikampanda*, *bikansanga*, anyi *bikankenga*. Ndi mwitabuuje Díyi dyònsò.”

129 Beena Yuda abu bavwa bafwanyine kwamba ne: “Mémè ndi mwitabuuje Yehowah!” Yèyè uvwa mufwanyine kwikalaku muteeleje Mukenji wa díbà, bu ne uvwa mwitabuuje. Cya bushuwa’s.

Bavwa bafwanyine kwikala ne mikenji búngi cyanaana, kadi Ewu nguvwa Mukenji wa díbà adi. Nwamonu anyi? Mémè ndi ngiitabuuja Mukenji wa díbà. Eyowa’s. Mashi akalaabiibwa ku díbà dya diloolo.

Bavwa bafwanyine kwikala bambe ne: “Mémè, mémè’s ndi mwena Yuda.”

130 Bantu badi bamba leelu ewu ne: “Mémè ndi mwena Kilisto. Ndi mwa kukuleeja buumambala bwanyi bwa kukaadi ntanta mule. Ndi muswe bwa ungabileku kúnkaadiku mwibe cintu kampanda kacya, kúnkaadiku kacya mufundiibwe ku tubàdi. Undeejoku ne mpenyi pánkaadiku mwendele masandi kacya, kúnkaadiku kacya mwenze nansha cimwe cya ku bintu ebi, anyi cintu kampanda cya bu nanku awu. Undeeje mwaba nansha unwepele.” Aci kacyna ciswa kwamba cintu nansha cimwe to mpindyewu. Kaa, to. Nwamonu’s, nansha byòbì ne yèyè uvwa usanganyibwa mu cipungidi cya bishi, cipungidi aci kacyna ne bwenzeji to. Ncipange bwenzeji.

Wèwè udi wamba ne: “Ee, mémè’s ndi mulongi wa Bible.”

131 Cyùdi aci kacyna ne bwalu to. Kakuyi cipungidi aci to, cijji cikole cya Nzambi cidi cikulandala. Neya bushuwa. Cidi cikukwata. Eyowa’s. “Mpekaatu yebe neikupete.” Mpekaatu ncinyi? Bupidya. Udi mubenge kwitabuuja Mukenji. Udi mubenge kwitabuuja Díyì. Udi mubenge kwitabuuja ntemu wa Cimanyinu, Cyòcì ciine, paaCi ciikàle ciDimanyishe munkaci mwetu. Nenku wèwè wabengi kwitabuuja Aci anyi? Nansha wèwè mubenge kuCiitabuuja bishi, bikengela anu Citeekiibwe.

132 Wêwè udi mufwanyine kwamba ne: “Ndi nCiitabuuja. Ndi nCiitabuuja. Ndi ngiitabuuja ne Cidi Bulelela. Ndi nCiitaba ne m’Bulelela.” Dîbà adi byônsò abi’s bidi anu bîmpè, kadi nansha nanku’s bidi bikengela Citeekiibwe.

133 Mona’s, mwena Yuda umwepele udi mwimane pààpa wawa, uvundulula mashi, pavwa mwânà wa mukooko umata mashi apu, wamba ne: “Ewu n’Yehowah.”

134 Kadi ki mwakwidi udi mwimane pààpa wawa, wamba ne: “Eyowa’s, mukalenge, ndi ngiitabuuja ne aci ncilelela,” kadi pa nzubu wende yêyè mwine kaàyi malaabiibwe to. Kayi yêyè muswe kudifwanyikija pambelu pààpa ne kasumbu aku to; to, mukalenge, bakoleshi baa maalu badi ne mashi aba. Kî mmuswe didifwanyikija adi to. Nansha yêyè awu ne uvwa mwakwidi wa bishi, ne uvwa mumanye Dîyì bûngì bishi, nansha mwikàle mukoleshiibwe bilenga bya bishi, byenzedi bivwaye mwenze nansha biikàle bya bishi, bivwaye mupeeshe bapele nansha byôbì bûngì bishi, milambu yivwaye mulambule nansha yôyi bûngì bishi!

135 Pòlò mmwambe ne: “Ndi mfila mubidi wanyi bwa kwoshiibwawu, bu mulambu; mfila bintu byanyi byônsò bwa kudiisha bapele; ndi ne diitabuuja bwa kutuntumuna mikuna, ne bikwabo; ne ngaakula mu myakulu, bu mùdi bantu ne banjelo; ne bintu bikwabo byônsò ebi,” kadi kwambaye ne, “ndi cintu cyanaana padi Cimanyinu kaciya anu citeekiibwe to. Too ne padi Cimanyinu eci!” Cyôcì aci ki cîndì ngakwila diloolo edi, dinanga adi. Nwamonu anyi? “Mpindyewu, padi anu cyôcì eci kaciya cilaabiibwe to, ndi cintu cyanaana.” Nwamonu anyi?

136 Nansha byôbì ne, udi mufwanyine kwikala mwipate badémóns. Udi mufwanyine kwikala mwondope babeedí ku disambila dyebe dya diitabuuja adi. Udi mufwanyine kwikala mwenze bintu byônsò ebi. Kadi Cimanyinu aci kaciya to, wêwè udi mwinshi mwa ciiji cikole cya Nzambi. Udi mufwanyine kwikala mwena kwitabuuja. Udi mufwanyine kwimana mu cyambilu ne kuyiisha Evanjeeliyo. “Bààbûngì nebalwe kûNdì mu dituku adi, bamba ne: ‘Mukalenge, Mukalenge, mêmè ewu ncitukù mwambe biprofeta mu Dîná Dyebe, muyiishe mu Dîná Dyebe anyi? Ncítukù mwipate badémóns mu Dîná Dyebe anyi?’” Bônsò abu m’ba-Méthodistes, ba-Baptistes, ne beena Mpenta. Yesu kwambaye ne: “Nguumukilayi apa, nwênù beena mudimu baa bubu. Kacya Ncitu nansha munumanyeku to.”

137 “Kadi, pânGààmònà Cimanyinu, Nèmpicilè pamutu peenu.” Ndilomba dya Nzambi bwa dîbà edi. Mukenji wa cikondo cya diloolo, ngwa kuteeka kwa Cimanyinu.

138 Sataana mmwelemu ditentula dya mishindu yônsò, dya dilabulangana dya ku cyanza, ne dya bileeji, ne bintu byônsò mushindu awu. Bipwáyi mwoyi! Dîbà dikaadi dimane kulwa dya

Cimanyinu, Cyôci ciine; kacyi ditentula kampanda, diitabuuja dya budingibudingi, cipinganyi, anyi ni ncinyi cyônsò to.

139 Dìbà dikaadi dikumbane didi Cimanyinu Yèyè mwine mwikàle uDimanyisha anu munkaci mwetu mene, ne ujaadika ne n'Yèyè Yesu umwèumwè awu makeelela, leelu, too ne kashidi, ne Yèyè udi anu ne Dîyì. Bidi bikengela citeekiibwe. Muntu udi wamba mudiye ne Cimanyinu, mwikàle uvila Dîyì edi, dìbà adi netwàmbè cinyi pa bwalu abu? Nwamonu's, kwèna mwa kwenza nanku to. Bidi bikengela Cimanyinu ciikalèku. "PâNgìikalà . . . Mashì neikale cimanyinu kunudi." Mpindyewu Nyuma Mwîmpè, Mwoyi uvwa munda mwa Mashì awu, udi Cimanyinu kunudi. Nèmfikèku mu katanci emu, nwamonu's. Nyuma Mwîmpè ngudi Cimanyinu. Bwa cilumbu kaayi ncijike. Eyowa's, mukalenge. Mpindyewu, nwavulukaayi. Nenukù mèmè . . .

140 Cyûdì kî ncidi ne bwalu to, mushindu wûdì mwîmpè, bûngì bwa misangu yûkaadi mutupike *muulu ne panshi*, bûngì bwa ekeleeziya yûkaadi muye kashaala wa mu yôyì, bûngì bwa bintu bîmpè byûkaadi mwenzenze, kabyakwikala ne musinga nansha mukese kûdì to padi Cimanyinu kacyi citeekiibwe. Dìbà dya diloolo ndyôdì edi. Abi byakenda bîmpè mu matuku a Luther, abi byakenda bîmpè mu matuku a Wesley, kadi kabyena byenda bîmpè mpindyewu utudi twakulangana ewu to. To.

141 Eyowa, kulama kwa mwânà wa mukooko kuvwa kwîmpè mwine musangu awu. Aba baakafwa musangu awu kumpala kwa mwânà wa mukooko kulaabiibwaye, mashì's, abi kaayi bivwa bishiilangane. Eyowa's, mukalenge. Bôbô abu baakaya kumpala bwalu bwa kondo kaa mwoyi kalenga. Nebiikale ne cya kulumbulwishiibwa bwa ne ní bavwa—bavwa . . .

142 Piikalabi ne bavwa badyanjila kulongolola, civwa cibalenga. Kabyi nanku to, kaciyena cibalenga to. Kwajiki. Abu bwalu budi anu bwa Nzambi nkaayende. "Yèyè—Yèyè udi ubingisha udiYe muswe kubingisha, ufwila luse udiYe muswe kufwila luse, ne Udi upiisha udiYe muswe kupiisha." Yèyè udi Nzambi. Kwajiki. "Yèyè udi ufwila luse udiYe muswe kufwila luse, ne upiisha udiYe muswe kupiisha."

143 Mwena Yuda uvwa mufwanyine kuleeja patooke, ku ditengudiibwa ne, mmwena kwitabuuja.

144 Kudi bantu bààbûngì, biitabi baa maalu mudiwu mafundiibwe, bàdì mwa kwangata Bible ewu ne kwamba ne: "Mèmè ndi mwena kwitabuuja, ne Yesu wakamba ne 'ku diitabuuja' nkutudi basungidiibwe. Nenukù mèmè ndi mwena kwitabuuja, kadi dibatiiza dya Nyuma Mwîmpè adi ndukutukutu." Dìbà adi Cimanyinu kî nciteekiibwe to. Nansha bishi, nansha yèyè witabuuja bishi, mbivwijiibwe cyanaana.

145 Anu mudi ditengudiibwa dya mwena Yuda. Yèyè udi wamba ne: "Mèmè ndi mwena Yuda. Mbwa cinyi budibi bikengela bwa

mémè kupatuka kwaka ne kwenza maalu bu musumbà mukwabo wa bakoleshi ba maalu wawa?"

146 Mòsà mwimane, ùbànda upweka ne mùsèèsù, wàmba ne: "Mukenji wa diloolo udi apa! Nebyenzeke ne, kundekeelu kwa matuku dikumi ne anaayi, nenukungwije disangisha nushipe mwànà wa mukooko. Disangisha dijima dya Izaleela nedimushipe, bamutenteketele byanza, biikàle badifwanyikija nende. Ne mashi nealaabiibwe ku dikunji, ne ku mukamba wa ciibi, nenku: 'Pàngààmònà mashi, Nèmpicilè pamutu peenu, bwalu ncimanyinu cya ne nudi biitabuuje lufu lwa mwànà wa mukooko ùndi munupetele.'" Mashi ngavwa cimanyinu.

147 Bwa mpindyewu Nyuma ngudi Cimanyinu. "Nenuujiibwe ne Nyuma Mwimpè kakwakupita matuku àbùngi to kubangila ku mpindyewu." Nenku paakeediibwa Mashi panshi, Cimanyinu cyakatumiibwa mu Dituku dya Mpenta, cyenze bu cipeepele cikole, cya civuma.

148 Ki civwa cyena-bwalu cya mupostolo yònsò. Civwa ne: "Nukaadi bapete Nyuma Mwimpè kacya nwitabuuja anyi? Nyingalalaayi, muntu ne muntu wa kunudi, ne nubatiijiibwe mu Dìnà dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwimpè eku, bwalu n'Cimanyinu, amen, cya ne nudi buumuke ku lufu baye ku Mwoyi." S'ki bwalu mbwòbù abu. Pààkajiminà baa Bisamb- . . . pààkajiminà ekeleeziya wa beena Yuda awu, baa Bisamba bya bende baakangata mulala, ne dinyangakaja adi mushindu awu; mpindyewu ùkaadi mupatuke, bwa kwangata bàshààdilè baa mu baa Bisamba bya bende, bwa bwalu bwa Dìnà Dyende, Mukaji-musela awu.

149 Nudi bumvwe cìndi muswe kwamba aci anyi? Nudi bumvwe cidi Mufundu wamba mwaba ewu aci anyi? Cimanyinu kaciya cileejiibwe patooke to, dībà adi cipungidi kacivwa ne bwenzeji to. Nwamonu anyi? Ki mudibi ne cya kwikala. Bwalu, wèwè wamba ne udi mwitabuuje, kadi kuyi ulonda dileeja dya njila dya Dìyì to, dībà adi kwèna mwitabuuje to. Nwamonu anyi? Nansha wèwè mutengula, nansha wèwè mukashaale wa mu ekeleeziya, ne nansha wèwè mubatiijiibwe, mwenze bintu byònsò ebi mushindu awu; aci kaciyena anu Cimanyinu, Nyuma Mwimpè to.

150 Mumanyi mulenga wa dibàlà ewu kutungunukaye ne kwakula naanyi, mungāmbi katanci aka amu. Yèyè ne: "Billy," mwakambaye, "Abraham's wakiitabuuja Nzambi, ne cyakabadiibwa kudiye bu bwakane. Ncinyi cikwabo cidi muntu mufwanyine kwenza pa kuumusha kwitabuuja Nzambi?"

151 Mémè kwamba ne: "Aci ncilelela's, Mulongeshi. Ncya bushuwa. Yèyè wakiitabuuja Nzambi cya bushuwa. Ki mudi Bible mwambe. Udi mubinge. Bwa njila ùdi mwendè too paùdi apa, wèwè udi mwendè anu bilenga."

152 Pavwa anu batentekedi abu—abu—abu dikumi ne babidi, bààkatùmiibwà bwa kuya katentekela buloba bwa Kaanaana abu, bwa pavwabo anu benda baya batangile ku Kaanaana apu, bavwa anu benda bakwata buloba; kadi paakafikabo ku mukàlù, dîbà adi's baakabenga.

153 Mémè kwamba ne: “Nwênù ba-Baptistes nudi bîmpè, bwa ntanta unukaadi balwe, kadi nukaadi bapete Nyuma Mwîmpè kacya nwítabuuja anyi?” Hum. Mémè ne: “Vuluka ne, Nzambi wakiitaba diitabuuja dya Abraham. Yêyè—yêyè wakiitabuuja Nzambi, ne cyakabaadiibwa kudiye bu bwakane, aci ncilelela, kadi pathiishe Nzambi's wakamupa citampi cya ditengudiibwa aci, bu cimanyishilu, cimanyishilu kudiye.” Kabiye ne mubidi wende awu, mutengudiibwe, uvwa ne dipetangana ne musuuka wende to, kadi civwa ncimanyishilu cya ne Yêyè (Nzambi) wakiitaba diitabuuja dyende adi.

154 Ne Yêyè udi utupa cimanyishilu, cya Nyuma Mwîmpè, cya ne Yêyè wâtwitàbi bu beena kwitabuuja. Bwalu: “Nyingalalaaayi, ne nubatiijiibwe muntu ne muntu mu Dînà dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwîmpè. Bwalu mulayi udi kunudi!”

155 Umvwayi bwalu abu mpindyewu. Beena Yuda, nansha muvwabo mwa kujaadikilangana ne bavwa batengudiibwe amu, kadi bivwa bikengela cimanyinu cileejiibwe. Cyôci kaciyiku to, cipungidi kacivwa ne bwenzeji nansha. To.

156 Bya mwomumwe mpindyewu, cintu cimwecimwe aci. Cyûdi wenza nansha ciikàle cinganyi, nansha mùdì mwa—mùdì mwa kuumvwija Bible amu. Udi mufwanyine kwikala mulongi wa Bible. Kaa, ekelekele! Udi mufwanyine—udi mufwanyine kwamba ne: “Ndi mwena kwitabuuja, ne byòsò abi.” Kadi Cimanyinu cicidi anu cilombiibwe. Mulongi wa Bible, wêwè udi wamba ne: “Mvwa muntu mwîmpè, Mwaneetu Branham.”

157 “Cidi nî nganyi nî nganyi mwa kwamba nansha ciikàle cinyi, kwêna mwa kutamba muntu wawa to. Kacya mémè ncitukù mwanji kumumba wenza cintu cibi nansha cimwe to, kacya bandela.” Aci kacyenaku ne dipetangana ne Nzambi to. [Mwaneetu Branham udi utuuta cishonto—Muf.] Kudi dilomba dimwepele, ne anu dimwepele adi!

158 Kadi wêwè kwêna mwa kwenza aci to. Kwêna mwa kulaaba mashi ku mukamba wa ciibi, mwaba awu, cimanyinu kacylene mwa kwikalaku padi mwânà wa mukooko kayi mufwe to. Ne mashi ngavwa cimanyishilu cilelela cya ne mwânà wa mukooko uvwa mufwe. Kî ndiitabuuja dya budingìbudingì nansha; mwânà wa mukooko uvwa mufwe!

159 Ne Nyuma Mwîmpè ngudi Cimanyinu cilelela cya ne Mwânà wa mukooko webe mmufwe ne wêwè udi mupete Cimanyinu pambidi peebe wêwè mwine, bwalu Mwoyi Wende mene udi munda mwebe. Nwamonu anyi? Kakwena bya diitabuuja dya

budingìbudingì to. Kakwena bya didingidija to. Kakwena bya ditentula to. Cidipu! Wêwè udi mucimanye. Wêwè udi mucimanye. Baa pa buloba mbacimanye. Cimanyinu cidipu.

¹⁶⁰ Nansha byôbì ne muntu uvwa mwîmpè wa bishi. Mmufwanyine kwikala mulongi wa Bible. Ncifwanyine kwikala... Ncifwanyine kwikala cidimba cya ekeleeziya cya—cya mushindu kana wônsò ewu. Ncifwanyine kwikala muntu mwîmpè. Ncifwanyine kwikala mfumu wa—wa dingumba kampanda. Ncifwanyine kwikala dilondangana dya—dya myânzù dya Loomo. Ncyêna—ncyêna mumanye ne nganyi mwine awu to, kaciyena—kaciyena ne cidici cyenza to.

¹⁶¹ Kadi, Izaleela, mulongi wa Bible kana yônsò ewu mmumanye ne Izaleela uvwa cimfwanyi cya Ekeleeziya, menemene, mwikàle uya mutangile ku buloba bulaya. Nenu kwôkò aku ki kudiYe mu lwendu wenda uya.

¹⁶² Kadi pààkalwà dîbà dya diloolo, ne lwendu lumana kwasa, kuvwa dilomba dimwepele dya kadiyi dya tuseku to. Nansha byôbì ne yêyè uvwa mwena Yuda wa bishi, nansha byôbì ne ùvwa mulame bikunyiibwa byende bilenga bya bishi, nansha byôbì ne ùvwa mukube beena mutumba bende bilenga bya bishi, bivwaye mwenze nansha biikàle bûngì bishi, nansha ne ùvwa cidimba cîmpè cya bishi, nansha byôbì ne ùvwa ufuta byadiikumi bûngì bishi. Bintu byônsò ebi bivwa anu bilenga. Aci's civwa anu cîmpè. Ùvwa muntu mwîmpè, bamujingulule munkaci mwa cisamba cyende, bu ne mmuntu mwîmpè. Kadi kakuyi cimanyinu aci to, cya mashi aci, yêyè uvwa ubutuka.

¹⁶³ Kaa, Nzambi ankwacisheku's we, ne apa ne mu mikaba ya mêyi, bwa mêmè kutuuta musonso kucibweja bikole!

¹⁶⁴ Nansha bishi, wêwè udi mufwanyine kwikala muyiishe Evanjeeliyo, udi mufwanyine kwikala mwipate badémons, udi mufwanyine kwikala mwakule mu myakulu, udi mufwanyine kwikala mwele mbila, muje maja mu Nyuma, kadi kuyi anu ne Cimanyinu aci to.

Wêwè udi wamba ne: “Ndi mwa kwenza nanku anyi?”

¹⁶⁵ Pôlò's ngudi mwambe ne wêwè udi mufwanyine kucyenza. “Nansha mêmè ngaakula mu myakulu bu bantu ne banjelo, nansha mêmè mfila bintu byanyi byônsò bwa kudiisha bapele, mubidi wanyi bwa kwoshiibwawu bu mulambu, mwikàle ne diitabuuja dya kutentemuna naadi mikuna, ne bintu ebi, ncidi anu cintu cyanaana.” Kanwikadi beeyemene pa abi to. Bwalu mbwa Cimanyinu! Byûdi mwenze nansha biikàle bûngì kaayi, nansha wêwè mwîmpè wa bishi; pàâteemà ciji cikole cya Nzambi, necijingulule anu Cimanyinu aci.

¹⁶⁶ N'Cimanyinu cya ne mushinga mmumana kufuta, ùvwa mulombiibwe awu. Ne mushinga uvwa mufuciibwe ùvwa m'Mwoyi wa Yesu Kilisto, ne Yêyè ngwâkafila Mwoyi Wende. Ne Nyuma Wende ngudi walukila pambidi peebe, bu Cimanyinu

cya ne wêwè witabiibu. Nenku ukààdi wenda ne Cimanyinu aci, muunya ne bufuku, kabiyi anu mu dyalumingu to. Ndìbà dyònsò, dyûdì ne Cimanyinu. “PàNgùikalà. . . Mashì neikale cimanyinu kunudi.”

167 Wêwè udi wamba ne: “Mêmè’s ncidi mutungunuke anu ne kwitabuuja. Ndi mwena kwitabuuja.” Aci cidi anu cîmpè. Kadi wêwè ubenga Cimanyinu, dîbà adi newikale mwena kwitabuuja bishi? S’nyawu cyakula cibengangana ne byûdì wamba. Nwamonu’s, cidi cyakula cibengangana ne bujaadiki bwebe, bùdì ufila abu.

168 Mulongi wa Bible, muntu mwîmpè, cidimba cya ekeleeziya, cyònsò cyûdì aci, kacyenaku ne cidìci cyamba to. Eyowa’s, mukalenge. Pàmwàpa tatwèbè mmuyiishi. Pàmwàpa mamwèbè—mamwèbè uvwa munsantu. Cidi mwa. . . Aci cidi—aci cidi anu cîmpè, bikengela bwa kudilumbululabo bwabo bôbô biine. Anu mûngâmbì ne, kuteeta. . .

169 Bantu badi bateeta kuvwija Nzambi ciikaaku kampanda cya cinene, cikulakaji, cinene cya katanku, cya dinanga dya cibwite kwîsù aci, nwamonu’s, ciikàle ne musûmbà wa twikùlù, twenze menemene anu mudi tu-Rickys ne tu-Elvis amu, ne: “Katwena ne ciditu mwa kwenzelangana cya cibi to.”

170 Nzambi Yèyè to! Yèyè katu ne biikùlù to. Yèyè n’Taatu. Bikengela kulediibwa cyakabidi! Kì nciimuntu cya dinanga dya cibwite kwîsù to.

171 Yèye n’Nzambi wa cilumbulwidi. Bible udi wamba ne ki cidiYe. Cijji Cyende cikole ncyà cidya mici. Kwikadi wâdyatakaja Cyôci aci kadi kushaala mutekemene ne bwîmpè bwa Nzambi dîngà dituku nebukwangate, mu mpekaatu webe awu, bwa kakufila mu Dyulu to. Bu Yèyè mwa kwikala mwenze aci, Yèyè nunku’s mmufwe luse byònsò ebi, ne mwangate Eva. Anyi newitabuuje Dîyi Dyende, anyi newikale. . . nebutuke. Nenku paudi witabuuja Dîyi Dyende, Cimanyinu neciikale pambidi peebe. Uh-huh.

172 Lufu lukaavwa pabwîpì ne kutuuta Ejipitu bufuku abu, pa dîbà kana dyònsò. Civwa ncikondo cya cikwacisha bwôwà; dyenza dya mishîngà yabo yònsò adi, matuku abo ônsò a mafesto awu, ne matuku a dijila dya byakudya awu.

173 Nzambi ukaavwa mubamwenekele. Nzambi ukaavwa muleeje bimanyinu Byende binene ne maalù a kukema munkaci mwabo. Ncinyi ciine aci? Mpindyewu anji imanaayi kakese. Nzambi ukaavwa mubaleeje ngàsà Wende. Úvwa mubape mpunga.

174 Kabavwaku mwa kuCidyombola to. Bavwa bamba ne: “Kaa, aci kacyenaku ne bwa nsongo bwine to. S’ndukutukutu. S’ncintu kampanda mu bibila mwamwa, muvwa mwenzeke difúkuka kampanda dya—dya bitoci bikunze bipatukamu biya muulu, s’ki cidi cyenze ne mbû ashaale mukunze.” Pashiishe

mabwe a mvula kulwawu. Pashiishe ndimba kulwayi. Nzambi ukaavwa mulongolole mwaba, ne muteeke Dìyì Dyende mukana mwa muprofeta kampana. Ne civwa yêyè ewu wamba, cìvwà cyenzeka, ne bôbò bacimona. Kabavwaku mwa kucivila to.

¹⁷⁵ Cìvwà Mòsà ubiikila aci, ki cìvwà Mòsà upeta, ucipetela kudi Nzambi, bwalu yêyè uvwa wamba anu Dìyì dya Nzambi. KwambaYe ne: “Nênkuvwijè nzambi kampana.” Mòsà uvwa nzambi kampana kudibo. Nwamonu anyi? Kabavwa bamanye dishiilangana to, pa nanku Yêyè kwamba ne: “Wêwè newikale nzambi kampana, ne Aalona neikale muprofeta webe. Wamonu’s, wêwè newikale bu nzambi kampana, bwalu Mêmè nênkwangàtè, dìyì dyebe adi, nenku Nêmfukè neebe. Mêmè nêngààkulè, bya bantu kabayi mwa kucivilaku to, bwalu anu mwaba awu cidì cyenzeka. Cyùdì wêwè wamba aci, necyenzeke.” Kaa, ekelekele! “Mêmè nênkuleejè maalù awu.” Ekelekele! Ne Ejipitu kucimonabo. Kucimonabo anu kumpala kwa dîbà dya diloolo, anyi anu pa dîbà dya diloolo menemene.

¹⁷⁶ KubaleejaYe bwîmpè Bwende. KuleejaYe ne Yêyè uvwa mwa kucyumusha, kucyondopa.

¹⁷⁷ Beena majimbu kuteetabo bwa kwenza cintu cimwecimwe aci, batentudi abu. Nutu misangu yònsò anu nubapeta. Kuvwa Yane ne Yambele, kwimanabo mwaba awu. Kadi paakalwabi bwa cintu cilelela, kabavwa naaci to. Ncya bushuwa’s. Bôbò baakalonda, katanci kakese. Kadi paanyima paa katanci, dikutakana dyabo dyakamweneshiibwa.

¹⁷⁸ Ne Bible kêna wambaku ne cintu cimwecimwe aci necyenzeke mu matuku a ndekeelu ne, “anu muvwa Yane ne Yambele bakandameene Mòsà amu” anyi? Kadi’s dikutakana dyabo dyakamweneshiibwa, nenku ki mwenzekabi cyakabidi. Nwamonu anyi? S’ki cyôcì aci, bantu baa meeji manyanguke, mooneku pa bidì bitangila Bulelela, Bwalu bwena dîinà. Mbafwanyine kwikala ne masangisha ne bintu binene, binene, bitumbuke, binene menemene bilengeja ne bilòngò, kadi ndekeelu wa byònsò dîbà nedilwe.

¹⁷⁹ Imanaayi kamungulu ne Cimanyinu aci! Ki cidì Nzambi muswe bwa twètù kwenza. Shaalaayi bakwate ku Dìyì Dyende. KanuumukuKu to. Shaalayi anu naaDi. Ki cidì Bible mwambe.

¹⁸⁰ Lufu luvwa munkaci mwa kutuuta. Nzambi ukaavwa mubaleeja luse, mubaleeje makole ne bimanyinu.

¹⁸¹ Mpindyewu twánjààyi kwimanaku bwa kasunsa kamwe anyi tubidì cyanaana, pa ntanku wawa. Twelanganaayiku anu meeji cyanaana mundamunda, kale wawa, cyakalayaYe ne necyenzeke mu matuku a ndekeelu. Ndi ndikonka ní katwenaku pabwîpi, twètù peetu. Nwamonu anyi?

¹⁸² Yêyè ukaavwa mwenze bintu byònsò ebi, kadi bôbò bavwa anu bajinga bwa kubenga kunyingalala, anyi kwitabuuja mukenji wa dituku adi. Kabavwa anu baswe kucyenza to,

nansha muvwaci cileejibwe patooke kumpala kwabo amu, ne cimanyishiibwe anu mu bulelela.

¹⁸³ Kadi panudi numona bintu bya mushindu awu byenzeka, s'ncimanyinu cya cilumbulwidi cilwalwà's. Cilumbulwidi ncyalonda bintu abi. Citu misangu yônsò anu cicilondèlònde, ne eci kacyakwikala cya tushiya ku luseke to. Nwamonu anyi? Cilumbulwidi ncitù cilonda ngàsà. Padi luse lubengiibwa ku maditambishi, kakwena cidi cishaala to anu cilumbulwidi. Pa nanku cyôci ki cyàlondà misangu yônsò.

¹⁸⁴ Mpindyewu, cyalu aci. Bwalu bwônsò bwa mu nyuma bùtù bwènzekà ebu bùtù ncimanyinu cya kudi Nzambi. Nwatapaayi ntaala nwadimuka. Nwatabaleelaayi cyôci aci, nwamonu's. Tangilaayi, bwalu bwônsò bwa mu nyuma bùtù bwènzekà ebu, cintu cyônsò citù cyènzekà eci, citù ncimanyinu. Twètù katwena mwaba ewu ku mpuukapuuka to. Maalu aa kaena enzeka anu ku mpuukapuuka cyanaana to. Ncimanyinu. Ncimanyinu, bwa kuya—bwa kuya ku mwaba wa dikubiibwa, ne lukasa lwônsò. Noa uvwa cimanyinu bwa baa mu lukongo lwende; Eliya uvwa cimanyinu bwa baa lwende yêyè; Yone uvwa cimanyinu bwa baa lwende yêyè. Nwamonu anyi? Bintu byônsò, Mukenji wa dîbà, ncimanyinu. Ikalaayi baWutabaleele, tangilaayi cidiWu wenza. Nwamonu anyi? Ncimanyinu. Kantu ne kantu kadi anu ne dyumvwija kampanda.

¹⁸⁵ Nanku kakuvwaku cikondo cikwabo kampanda cìvwà Mukenji wa mushindu ewu mufwanyine kwenzeka to. Kawuvwaku mwa kwikala mulwe mu dituku dya Luther to, kawuvwaku mwa kwikala mulwe mu dituku dya Wesley to, kawuvwaku nansha mene mwa kulwa mu dituku dya Mpenta nansha. Kawuvwaku mwa kulwa nansha. Nwamonu anyi? Kakwenaku. . . kakütukù cintu bu nanku cyenzeke to, kadi peetu's mbatulaye mu Bible. Nwamonu anyi? Tukaadi ku nshikidilu. Cintu nansha cimwe kacivwaku cifwanyine kwenzeka to, kacivwaku cifwanyine kwikala cyenzeke to too ne dîbà edi. Ne cyôci cidi munkaci mwa kwenzeka bu cimanyinu. Nudi nudikonka ne ncimanyinu cya cinyi?

¹⁸⁶ Kaa, nwènù baakunyi baanyi, mwaneetu wa balume, mwaneetu wa bakaji, bwelaayi mwinshi mwa Cimanyinu aci, ne lukasa lwônsò. Nwamonu anyi? Kwangaciku, kwangaciku mupinganyi to. Kudidingi, kudidingi, kudidingi, kudidingi wènzakù aci to. Wamonu anyi? Kudidingi wadifwanyikijilaCi cyanààna to. Shaala wèwè anu mwaba awu too ne paudi umanya ne Cimanyinu aci cyâtèèkiibu, too ne piikalà (wèwè mujima) meeji avwa munda mwa Kilisto awu miikàle munda mwebe, too ne piikalà lukutukutu lwônsò lwa pa buloba luye, wamonu's, too ne piikalà dijinga dijima dya mwoyi webe dishaale anu Yèyè. Nwamonu anyi? Aci, dîbà adi, udi umanya, dîbà adi udi umanya ne cintu kampanda cidi munkaci mwa kwenzeka. Yesu wakamba ne: "Bimanyinu ebi nebifile badi

biitabuuja,” kî mbeena kwitabuuja baa budingibudingi to, kadi beena kwitabuuja. Nwamonu anyi? Mpindyewu, katwena baswe kunaya ne mudilu to nansha kakese, pa bwalu abu; kwêna ne cya kucyenza to.

¹⁸⁷ Mukenji wa dîbà ncimanyishilu kudi maekeleeziya. Ncimanyishilu kudi bantu. Kanwikadi...Nudiku, nudiku nucyumvwa anyi? [Disangisha didi dyamba ne: “Amen.”—Muf.] Ndi ntekemenena ne, pa mukaba wa mêyi, badi benza cintu cyôci cimwecimwe aci, nwamonu’s, ne mu bitupa bikwabo bya buloba. Nwamonu’s, cimanyishilu cya dîbà cidi mwaba ewu. Kudi Cimanyinu cidi cikengela kuteeka, ne kakuvwaku cingà cikondo civwaCi cifwanyine kwikala cilwe to.

¹⁸⁸ Monaayi didilongolola divwa Nzambi mufile bwa ciine cikondo aci. Mpindyewu, bu mutudi bamanye ne Bible mmwambe ne: “Maalu ônsò awu akenzeka bu bileejilu, nwamonu’s, kutudi twêtù.” Monaayi ne, pakaavwa Nzambi mudilongolole bwa kulumbulwisha Ejipitu, Yêyê wakanji dyambedi kufila didilongolola. CyàkanjiYe kwenza dyambedi ncinganyi? Yêyê kacya katu ushintululaku ndongamu Wende to.

¹⁸⁹ Musangu wa kumpala, paakamanaYe, paakenzaYe didilongolola Dyende adi, Wàkatùma muprofeta ne mukenji. Cintu cya kumpala cyakenzelaYe cisamba Cyende civwa ncyà kutuma muprofeta ne mukenji.

¹⁹⁰ Cintu cyàkalondà cyakenzaYe, bwa kumanyishisha mwine muprofeta ewu, Wàkatùma Dikunji dya Kapyà bu dimanyishiibwa, bwa kucimanyishisha.

¹⁹¹ Nunku cintu ciisâtù cyakatumaYe civwa ncimanyinu. Aci ncyà bushuwa menemene. Cimanyinu, cimanyinu civwa cyumvwija cinyi? Ditwishiibwa!

¹⁹² Dyambedi, muprofeta Wende mwikàle ne mukenji; kudimanyishaYe Yêyê mwine munkaci mwa...ku—ku Dikunji dya Kapyà ne ku muprofeta Wende; pashiishe kutumaYe cimanyinu, bwa kuditeekabo mwinshi mwa mashi aa, cya ne Yêyê uvwa mwitabe lufu lwa mupinganyi ewu pa kaaba keebe. Pashiishe, mashi avwa ncimanyinu cya ne Yêyê wakatangila, ne wêwê wàkatèeleja mukenji, wâkiitabuuja Dikunji dya Kapyà, ne wâkiitaba mupinganyi wàkakulongolwelàYe awu, ne wêwê uvwa usanganyiiibwa mwinshi mwa mwengüngù wà mashi mwine wa mwoyi wàkapàtukà bwebe wêwê awu. Ekelekele! Ncintu kaayi cipwangane, ncintu kaayi cipwangane aci’s we, nwamonu’s, wêwê udi mwinshi mwa mashi.

¹⁹³ Mpindyewu udi mwinshi mwa Nyuma, mwinshi mwa Nyuma Mwîmpè. Nwamonu anyi? Nwamonu anyi? Udi mwitabuuje Mukenji wa dituku, wamonu’s, udi mwitabuuje bu—bu—bu—bu—bukole, Dikunji dya—dya—dya Kapyà. Udi mwitabuuje Cyôci aci, wamonu’s, ne udi witabuuja.

194 Mpindyewu, mpindyewu tangilaayi, kuWitabuuya cyanaana kî nkukumbane to. Kî nku—nku. . . Bwa kwikala kwendela mwaba udiWu awu, kî nkukumbane to. Wamonu's, aku nkudivwija wêwè mwine mutambe kubiipa: "Bwalu ewu udi mumanye mwa kwenza cidi cimpè, kadi kayi ucyenza to, bwende yêyè mmpekaatu." Nwamonu's, beena kwitabuuya baa ku mikalu abu, Yesu wakamba cintu cyôci cimwecimwe aci.

195 Ebelu, nshapita mwi6: "Bwalu kabyena mwa kwenzeka to bwa aba bakaavwa bamana kukenkeshila musangu kampanda, ne bavwijiibwe baabanyanganyi baa Nyuma Mwîmpè, ne balabule Dîyi dîmpè dya Nzambi, ne buloba bùcilwalwà, bôbô badishinde, bwa kudyalujululabo cyakabidi ku kanyinganyinga; bu mudibo bapoopela bwabo bôbô biine Mwânà wa Nzambi pa nkuruse; ne biikàle bàbala cipungidi cya Mashi, ciine civwabo bajidiibweku aci. . ." Mwengùngù udi ujidila. Wôwô awu kî ngudi Cimanyinu to. Mashi kî ngàdi Cimanyinu bwa mpindyewu to. Mwoyi ngùdi Cimanyinu.

196 Mwoyi kawuvwa mwa kwikala kwaka to, bwalu civwa nnyama. Mwengùngù awu ngùvwà cimanyinu, bivwa bikengela bwa wêwè kwikala ne mashi etu a cya bushuwa aa malaaba ku ciibi. Kadi bwa mpindyewu n'Nyuma Mwîmpè. Netukufike, anu mu katanci kakese emu, bwa kujaadika cyôci aci, nwamonu's. Mwoyi ngùdi Cimanyinu.

197 Mwoyi webe wêwè mmuye, ne wêwè ukàadi mufwe, ne mwoyi webe ùkaadi mufwe. Wêwè udi musokoka mu Nzambi, kupicila ku Kilisto, ne mutwibwemu citampi kudi Nyuma Mwîmpè. Meeji avwa munda mwa Kilisto adi munda mwebe. Ne Kilisto, ne Bible, ne Dîyi, bidi cintu cimwe. "Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi." Dîbà adi wêwè, ne Dîyi, ne Nzambi, ne Kilisto, nudi cintu cimwe. "Nenku nwênù basòmbèle munda Mwanyi, ne Dîyi Dyanyi munda mwenu, nulombe cinwaswa aci, necyenjiibwe." Nwamonu anyi?

198 Yêyè wakeela bukole anu mu mishiku ya Mòsà menemene amu, bwa kupatuka kuyaye kuntwaku ne Dîyî Dyende bwa kwakulaye, ne ndimba yilwa; wàkula, ndimba yumuka; wàkula, nkùsù yilwa; wàkula, mwoyi—nkùsù yumuka. Amen!

199 Kadi pashiishe mpàakalòmbiibwà cimanyinu kudi Izaleela yònsò. Izaleela yònsò musanga ntete wakalombiibwa cimanyinu eci. "Nenku pàNgààmòná cimanyinu, Nèmpicilè pamutu peenu." Kaa, ekelekele, ekelekele! Ditwishiiibwa kaayipu's we!

200 Izaleela mwikàle upatuka mu Ejipitu, ùvwa ncimfwanyi, mubidi wa bwalu ndeelu ewu. Ejipitu uvwa ng'ekeleeziya, ne Izaleela uvwa uleeja Mukaji-musela. Nenku anu muvwa Izaleela upatuka mu Ejipitu amu, ki mudi kabidi Mukaji-musela upatuka mu ekeleeziya. Nwamonu anyi? Bwalu, bikengela kwikale cintu kampanda mwaba awu cidiYe ne cya

kupatukamu, nenku bidi bikengela bwa Yêyè kupatukamu, pa nanku, piikalabi ne civwa ncmfwanyi. Ekeleeziya udi—udi usanganyibwa mu Ejipitu, mu maalu a pa buloba ne mu mpekaatu, ne kèna ucukaku nansha—nansha—nansha kakese bwa Cimanyinu cyenu ciine aci to. Kabeena nansha baCiitabuuja mene to. Kadi Izaleela yêyè wakacinanga, bwalu civwa ndupandu kudibo. Kaa! Kaa! S’bivwa bikengela kutuvwijaci ne disanka’s, s’bivwa bikengela kuvwijaci myoyi yetu. . . Kaa!

²⁰¹ Citèèkaayi’s, ekeleeziya! Mpindyewu kanupangidiku to. NenuCitèèka mpidyewu anyi? Kanudidingi, kanudidingi, kanudidingiku nwàlekela dîbà dibwela to. Kanudidingi, kanudidingi, kanudidingi, kanudidingiku nwâpeta diikisha to, nî mmuunya nî mbufuku. Kanudidingiku nwanaya ne mudilu to. Abi kabyakukumbanaku to, bânà wetu. Kabyakukumbanaku to. Nudi ne cya kwikala ne Cimanyinu!

²⁰² Wêwè udi wamba ne: “Mêmè ndi mwitabuuje. Eyowa, ndi nya. Mêmè, eyowa, ndi mwitabuuje Mukenji. Ndi. . .” Aci ncyà bushuwa, kadi, aci—aci’s cidi anu cîmpè.

²⁰³ Kadi udi ne cya kwikala ne Cimanyinu! Nudi bateeleje anyi, nwênù beena Branham Tabernacle? Udi ne cya kwikala ne Cimanyinu aci cileeleja patooke! Kuyi naaCi to, diitabuuja dyebe dyònsò diine adi didi cyanaana. Nwamonu anyi? Newikale ne nsòmbelu mwîmpè; udi uteeleja cidi Dîyì dyamba; udi uya mu ekeleeziya; udi uditacisha bwa kwikala ne nsòmbelu mujaalame; abi bidi anu bilenga, kadi aci kî n’Cyôci to. “PâNgààmòná Mashi,” ki Cimanyinu ncyôci aci. Ne Cimanyinu mwaba ewu kacyna. . .

²⁰⁴ Bwalu, cidi, bivwa bikengela bwa Yêyè—Yêyè kumona mwengùngù wa cya bushuwa awu, bwalu mwoyi ukaavwa muye, yêyè. . . ùkaavwa mushiyangane naawu, bu muvwaye nyama.

²⁰⁵ Kadi apa Cidi m’Mwoyi Wende Yêyè mwine ùvwà mu Mashi awu. Ne mwengùngù uvwa anu cimanyishi cyanaana anyi cimanyishilu cya dijidiibwa, kadi Mwoyi Wôwò mwine ki Cimanyinu; bwalu kakuyi ditengudiibwa to, kakuyi Cimanyinu to, wêwè kwèna nanshà mu cipungidi to. Cintu cyònsò mu kaabujima cidi cikwata mudimu pamwe. Wêwè wamba ne udi mutengudiibwe ku Dîyì, ne anu Dyôdi nkaayaadi, dîbà adi’s newitabuuje Dîyì; pawikala witabuuja Dîyì, dîbà adi’s bidi bikengela bwa Cimanyinu kulwaci, bwalu yêyè mmwambe ne: “Nyingalalaayi, nubatiijibwe muntu ne muntu wa kunudi mu Dîná dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwîmpè.” Ki bwalu mbwabu’s. Kaa, ekelekele!

²⁰⁶ Monaayi dîbà adi didilongolola bwa cisamba Cyende cya buloba bulaya aci. Monaayi cyakenzaYe. Dyambedi, Yêyè uvwa ne cisamba cikaavwaYe mwenzele buloba kampanda. Ûvwa

mubalongolwele buloba kampanda. Nenku mpindyewu Yêyè kutuma didilongolola kampanda ku ciine aci, bwa cisamba cya buloba bulaya aci. Civwa anu bwa aba bàkaavwà badyanjila kulongololwela bwine buloba bulaya abu, dituku dya Mukajimusela. Ne mushindu wàkacyenzàYe, Yêyè wakatuma muprofeta mwikàle ne mukenji, ucimanyishila ku Dikunji dya Kapya, ufila cimanyinu cya ne bavwa mwa kushaala ne myoyi mituuje ne civwa ncyà bushuwa. S'ncyà bushuwa. Civwa mbusambi bwa cisamba aci.

²⁰⁷ Izaleela, upatuka mu Ejipitu mwine musangu awu, civwa nci—ncimfwanyi. Eci mmubidi wa bwalu, wa Ekeleeziya mwikàle upatuka mu mangumba. Mpindyewu, kî mbwena kwamba ne nyônsò yidi midyênzè mangumba eyi to. Mêmè ndi njinga kwamba Mukajimusela. Nwamonu anyi? Bamwe bantu, kudi bamwe baa ku badiikàdile kadi biikàle babi anu mudi mangumba amu, misangu mikwabo babi kupita ne piine apu.

²⁰⁸ Mêmè ndi ngaakula bwa Cimanyinu cidi citeekiibwe. Cimanyinu cidi cipetangana ne Dîyì dyônsò. Nwamonu anyi? Bidi bikengela anu bipetangane, bwalu Cidi Dîyì. Cidi m'Mwoyi uvwa munda mwa Dîyì. “Mêyì Àanyi ngaa Nyuma; Àdi Mwoyi,” mwàkambà Yesu. Nwamonu anyi?

²⁰⁹ Pààkabangà Mòsà mudimu wende wa bwambi mu Izaleela, ne bimanyinu binene, nudi numona's, ne lukasa lwônsò Izaleela wakadisanga umukila myaba yônsò mu Ejipitu, kulwa mu Goshen, baalukila batangile kwabo kubalela, bwalu bavwa bamanye ne cintu kampanda civwa pabwîpi ne kwenzeka. Kaa, ncimfwanyi kaayipu's we!

Kaa, badi bafumina ku Esete ne ku Wesete,
 Badi bafumina ku malaba a kule, (Ncyà bushuwa, nukaadi bumvwe musambu awu.)
 Bwa kwenza fête ne Mfumu, bwa kudya bu
 babiikidiibwe Bende;
 Mushindu mwine udi beena lwendu aba
 babeneshiibwe's we!
 Bàbandila mpala Wende mujidila
 Udi ubàlakana ne dinanga dya Nzambi awu;
 Baabanyanganyi babenasha baa ngàsà Wende,
 Bwa kubàlakanabò bu mabwe a mushinga
 mukole a ku cifulu Cyende cya butumbi.

Kaa, Yesu ùlwalwa kataataka,
 Dìbà adi mateeta etu neajike.
 Kaa, kadi bu byôbì bikengela bwa Mukalenge
 wetu alwe pa dìbà edi
 Ùlwila aba badi buumuke ku bupika bwa
 mpekaatu?

Kaa, ncifwanyine kukutwadila disanka dîbà
adi,

Anyi tunyinganyinga ne diteketa dikole dya mu
maboko?

Paalwa Mukalenge wetu mu butumbi,

Netutuutakeene Nende muulu mu mpepele.

210 Biikàle tuleeja patooke Cimanyinu aci! “Nenku Mèmè
nêmmubiishè ku lufu mu matuku a ndekeelu.” Cya bushuwa’s!
S’tukaadi mu miine matuku awu.

211 Bantu baakaadisangisha mu Goshen. Bavwa badilongolole.
Bavwa bamanye ne cintu kampanda civwa pabwîpî ne
kwenzeka. Bavwa menemene anu bu mudi . . .

212 Angataayi mabata, pakaadibi ne ki cikondo cya dilwa
mbimbimbi ncyôci eci, adi ônsò adisanga lubilu. Mbulubulu,
ne bikwabo byônsò, pakaadiyi yidilongolola, kudi disakiibwa
kampanda dîdî diyikoka.

Nyuma Mwîmpè ngudi ukoka bantu!

213 Kaa, pàakalwà cikondo cya cijji cikole cya Nzambi bwa
kudikumaci, yônsò . . . Ki mabata abidi àlwalwà aa, dilume ne
dikaji. Ki byôkosò bibidi bilwalwà ebi, cilume ne cikaji; ki tubalu
tubidi tûlwalwà etu, kalume ne kakaji; cintu kampanda ciikàle
cibikoka, bidyànjlila kulongolola. Bikwabo byônsò byakabutuka.
Kaa! Bikwabo byônsò’s byakabutuka! Kadi byônsò byàkumvwà
dikokiibwa adi bwa kubwela abi, byakamanya ne bwâtù abu
bukaavwa bumana kulongolola. Civwa ncimanyinu cya ne
kuvwa kulwa mvula. Byakamanya byôbi ne kuvwa kulwa mvula,
nansha dileeja dya patooke diikàle cinyi ne nansha meeji avwa
bakwabo bantu beela miikàle cinyi. Byôbi byakamanya.

214 Kuvwa cintu kampanda munda mwabi amu, civwà cyàmba
ne: “Bwelaayi muntu mwamwa, ne lukasa lwônsò! Bwelaayi
muntu mwamwa, bwalu mwômò amu ki mwaba umwepele
mwikalà dikubiibwa.” Bwalu, Nzambi uvwa mulongolole
muprofeta, kutumaYe bwâtù abu bu cimanyinu, wamba ne:
“Bwelaayi muntwamu,” nenku mvula uvwa ulwa. Nenku
byôbi abi byakabwelamu, ku bibidi ku bibidi. Nyama yônsò
yakabwelamu, ku yibidi ku yibidi, mu bwâtù amu, bwalu
yikaavwa mibwele mwinshi mwabu amu. Kayiyi yicyuka civwa
mikwabo . . .

215 Ne bônsò bavwa pambelu paa bwâtù abu baakabutuka.
Bônsò bavwa pambelu paa cimanyinu, paa mashi, baakabutuka,
muntu ne muntu. Nenku yônsò udi pambelu paa Cimanyinu, paa
Nyuma Mwîmpè, neabutuke.

216 Nansha biikàle bîmpè baa bishi, nansha biikàle bidimba bya
ekeleeziya bya bishi! Bavwaku bûngî cyanaana mu matuku a
Noa. Bavwaku bûngî cyanaana mu matuku a Môsà; kadi muntu
uvwa mupangile bwa kulaaba mashi awu, bu cimanyinu, uvwa,
wakabutuka. Aba bàakapangilà bwa kubwela mu bwâtù abu,

baakabutuka. Aba badi bàpangilà bwa kubwela mu Kilisto abu, bwalu's Yèyè ki Bwàtu!

217 Kolinto wa Kumpala 12, mmwambe ne: “Ku Nyuma umwe nkutudi bõnsò babatijiibwe mu Mubidi umwe.” Ùdi musokome awu, kî ng'eekeleeziya to; kadi ngùdi musokome awu, kî mmangumba to; Mubidi musokome wa Yesu Kilisto! “Ku Nyuma umwe,” N-y-u-m-a, Nyuma ne dileeta dinene, “nkutudi bõnsò biinyijiibwe mu Mubidi umwe.” Dìbà adi Cimanyinu cidi ku ciibi, bwalu wèwè udi munda mwa Kilisto. Ne Yèyè nguvwa Wòwò awu, Mulambu webe, Yèyè mene wákapangisha dinyooka awu. Nenku padi Nzambi utangila pa cyôci aci, Yèyè kèna mwa kwenza cintu to. Wèwè udi mu dikubiibwa anu dyebe dya menemene edi, bwalu Nzambi ne Kilisto badi Mupersona umwepele, Nyuma mwine wákavwijiiibwa mubidi ne kusòmbela munkaci mwetu awu. Nenku ki Nzambi awu ne Bu Yèyè Bwine, ne nwènù, bânà Bende Yèyè mwine, babwele mu Mubidi awu. S'ki bwalu mbwabu's, kaciyi mwengùngù to, kadi Nyuma! “Nèmpicilè pamutu peenu.”

218 Baakafumina mu Ejipitu mujima, bwa kudikungwijila mu mwaba umwepele ewu, bwa baamona mwa kwikalabo mwinshi mwa cimanyinu.

219 Ne bôbò mbafumine mu ba-Méthodistes, mu ba-Baptistes, mu ba-Prebytériens, mu ba-Luthériens, mu beena Mpenta, ne bikwabo byõnsò, bwa kubwelabo mwinshi mwa Cimanyinu. Anu mwakadibi musangu awu menemene!

220 Dikunji dya Kapyà ndivwa dileeejiibwe kuntwaku adi. Nenku muntu wambila mukwende, mukwabo wambila mukwende, mukwabo wambila mukwende, nenku, katanci aka anyi, s'ki bôbò bõnsò bàakabangà kulwa aba. Baakabanga kulwa, ne kutangilabo cimanyishilu cya Nzambi. Kwambabo ne: “Cilumbulwidi cikaadi pabwîpi.”

221 Pashiishe muprofeta kwambaye ne: “Mèmè ndi muumvwile kudi Nzambi. Nekwikale cimanyinu. Nenku nwènù laabaayi mashi ku ciibi. Nushipe mwànà wa mukooko, nulaabe mashi ku ciibi, nenku aci neciikale cimanyinu, bwalu lufu lukaadi pa kudikuma.”

222 Lekelaayi nnwãmbilè leelu ewu, mèmè bu musadidi Wende ne, padi anu Cimanyinu kaciyi ku ciibi to, kudi lufu lwa mu nyuma lwikalà mwa kudikuma. Ne maeekeleeziya õnsò adi ààlukila mmatangile ku—ku nsangilu awu, ku Nsangilu wa Maekeleeziya wa Buloba bujima awu. Badi bõnsò munkaci mwa kwalukila batangile ku cyena Katolike. Nenku anu aba badi bashuwashuwale, balediibwe cyakabidi abu, ki baashaala pambelu!

223 Vulukaayi ne, kî mmangumba enu a beena Mpenta awu to, bwalu ôwò awu akaadimu. Bidi bileeja ne akaadi mafwe! Akaadi mabutuke. Akaadi mafidiibwe bu mulambu. Akaadi maalukile

cyanyima. Akaadi maMwele pambelu paa ciibi, kadi Yèyè udi ukeba bwa kumona Cimanyinu. Bwalu bôbò, cintu cimwepele civwabo beeyemene ndyakula dya mu myakulu.

224 Wêwè kweyemenyiku dyakula dya mu myakulu, anyi cikwabo cintu nansha cimwe to. Kadi enza bwa Cimanyinu Cyôcì ciine ciikàlekù, Mupersona wa Yesu Kilisto awu, Mwoyi Wende Yèyè mwine awu munda mwebe. Kutengulu anu *cikampanda*, *cikansanga* to; kadi tengula buumuntu bwebe bujima, too ne pawikala wêwè ne Kilisto bashaale Umwepele. Kilisto udi munda mwebe, ne Mwoyi Wende udimweneshila patooke ku wêwè aku.

225 Mpindyewu, mpindyewu, bafumina mu Ejipitu mujima! Kadi tangilaayaaku mpindyewu, patudi tumona cyakenzabo aci apa, patudi tumona cikondo cyenda cimweneka apa, twètù mbatutumine dîyì bwa kwenza cintu cyôcì cimwecimwe aci. Nukaavwaku bamanye aci anyi? Tangila numonaayi cyàkambà muprofeta.

226 Nenu netwikale mwa kubala mpindyewu, panwikala baswe kubala, mmu Ebelu nshapita wa 10. Nenu panwikala baswe kubala pamwe naanyi, ndi muswe kubala mvensa umwe anyi yibidi mwaba ewu kumpala kwa twètù kutungunuka. Ebelu nshapita wa 10, nenu tubangilaayi ku mvensa wa 26 wa nshapita wa 10 wa Ebelu. To, ndi... Twänjibi kumona tũng. Eyowa. Eyowa's, mukalenge! Ebelu, nshapita wa 10, ku mvensa wa 26, nwamonu's.

Bwalu twètù twenza mpekaatu ku bukole paanyima paa twètù bamane kupeta . . .

227 Twänjibi kumona tũng, ndi mucyängàte mu cyôcì anyi? Eyowa. Ncya bushuwa. Eyowa.

. . .twètù twenza mpekaatu ku bukole paanyima paa . . .twètù bamane kupeta dimanya dya bulelela, kakweana kushaala kabidi mulambu bwa mpekaatu to.

Kadi anu dindila ditwishibwa didi dikwacisha bwôwà dya cilumbuwidi aci, ciiji cya cilakuka kapya aci, cyabutula mulwishi.

Tangilaayi kuneeku! Ewu uvwa upeetula mikenji ya Môsà uvwa ufwa kakuyi luse to ku bujaadiki bwa bantemu babidi anyi basatu;

. . .ambaayi tũng ne ndinyooka ditambe kwikala dikole dya mushindu kaayi, nansha nanku, munudi nucinka, dyebiibwe meeji ne ndikumbanyine ewu udi mudyatakaje mwinshi mwa dikàsà— mwinshi mwa dikàsà Mwânà wa Nzambi, ne . . .mubale . . .cipungidi cya mashi . . .kudiye mujidiibwe aku, bu cintu cidi kaciyi cya cijila, ne mwenze kayi utanga Nyuma wa ngàsà udi mufumine ku Mashi awu?

228 Mwambi, cidimba, muntu mwîmpè, muntu wa nsòmbelu mulenga, cyònsò cyùdi aci, cibi udi mumanye ne Nzambi ukaadi mukutuule ku mfwanka. Nwênù bakaji, wêwè udi mumanye ne Yêyè ukaadi mukutuule ku tuputululu, ne ku—ne ku nsuki mîpî, ne bikwabo byònsò, ku. . . Udi mumanye ne Yêyè ngudi mwenze aci. Kadi pashiishe wêwè mukudimuke mudyombole, ne mubale Mashi a cipungidi awu, bu ne Adi, “cintu cidì kaciya cya cijila,” Yêyè mwine wâkakujiidila ne mukufikishe too ne mwaba ewu awu!

229 Bu muvwa batentekedi abu, piikalabi ne baakalwa too ne ku mukalu eku, ne baakatangila, ne kwamba ne: “Ee, ndi mumanye ne buloba abu budiku, kadi cipumbishi ncipite bunene. Twêtù tudì tumweka anu bu tupasu,” s’baakabutukila mu cipeela. Beena kwitabuuja baa ku mikalu!

230 Kulu anu too ne *apa* nunku, wamba ne: “Ndi mwitabuuje Mukenji” to. Tumikila musanjeela. Bwela munda mwa Kilisto! Wêwè udi wamba ne: “Ee, s’ndi ngiitabuuja Dîyì dyònsò didi dyàmbiibwà’s, Mwaneetu Branham.” Aci’s ncîmpè, kadi aci cidì anu—aci cidì anu kwikala mumanye mwa kubala cyanaana.

231 Angata Mukenji, uWubweje munda mwa mwoyi webe, bwa wikale ne cya kupeta Cimanyinu, bwa Mwoyi mwine uvwa munda mwa Kilisto awu wikale munda mwebe. “Pângààmònà Cyòci aci, Nèmpicilè pamutu peebe.”

232 Patudi tumona bimanyinu binene bya cikondo cya ku nshiikidilu pa buloba leelu ewu, tudì tumanya ne ncyà bushuwa. Mpindyewu tangilaayi, mèmè mvwa mwindile ciine eci, kukaadi ntanta mule, mule, bwa Mukenji ewu ufike kunudi. Nwamonu anyi? Nenku nwamonu bimanyinu bya cikondo cya ku nshiikidilu. Ne mèmè ngânüyiishìWu, ne ngânüleejìWu, ku byònsò byakamba Kilisto. Mmwômò anyi? [Disangisha didi dyamba ne: “Amen.”—Muf.] Nudi nwitaba aci anyi? [“Amen.”] Tukaadi ku cikondo cya ku nshiikidilu. Ncyèna mmona cidì cishaale to.

233 Wêwè udi wamba ne: “Kadi bishi bwa cimanyinu cya nyama wa lwonji?” Aba badi babenga Nyuma Mwîmpè bakaadi bamane kutwibwa cimanyinu aci kudi nyama wa lwonji. Dinyooka nedishiishe kulwa paanyima. Nwamonu anyi?

234 Mu Izaleela, pavwa mpungi udila mu cidimu cya Disanka, muntu yònsò. . . Nudi numona Kilisto, mu dibala dya cyòci aci anyi? Yêyè wâkabala anu cyabibidi cimwe cyaci, bwalu anu cyabibidi cimwe cyaci ncivwa cikumbanangana ne ciine cikondo aci. Nwamonu anyi? “Yêyè mmuNtume bwa kwondopa beena myoyi micibuluke, kuyiisha disungidiibwa,” ne bikwabo, nwamonu’s, kadi, Yêyè, “ne cidimu cya ngàsà cya Mukalenge.” Cikwabo citupa aci, Yêyè kaakabalaku—Yêyè kaakacibalaku to; Wâkatèèka Mukanda muvunga awu panshi, bwalu aci ncyà

dituku edi. Nwamonu anyi? Yèyè wàkabala anu citupa cyaci, citupa civwà bwa dituku Dyende aci.

²³⁵ Mpindyewu eci nciikalaYe mwa kwenza leelu ewu. Eci nciidiYe munkaci mwa kwakula, wakwila ku Nyuma Wende mulaaba, wambila ekeleeziya leelu ewu: Mpindyewu ki dyôdi dîbà adi. Mpindyewu ki cyôci cikondo aci. Cyăkidîlaayi, nwênù cisamba. Cyăkidîlaayi!

²³⁶ Cinyi? Tudi tumona bikondo binene bya nshiikidilu, makênkè makunze àdi àpòdya, myaba yònsò. Pa bufuki, tudi tumona bufuki buteemesha bukênkè bùdi bùpòdya ne: “Cikondo cikaadi pabwîpi.” Tudi tucimona pa ekeleeziya, citeemesha bukênkè bùdi bùpòdya. Yèyè ukaadi mupiishiibwe. “Cikondo cikaadi pabwîpi.” Ûkaadi mu maalu a pa buloba. Tudi tucimona pa—pa maulu, pa mbû, pa matunga, pa myaba yònsò; mu dîbà, mu ngondo, mu mitooto. Bimanyinu!

²³⁷ Tudi tumona bimanyinu bya cikondo cya ku nshiikidilu bya Nyuma Mwîmpè mwalukile pa bantu. Anu mwakadibi mu matuku a Lota, mushindu wakakwacila Nyuma Mwîmpè mudimu mu mubidi wa buntu awu kuntu kwaka, ùvwa n’Nzambi mumweneshiibwe mu mubidi. Mushindu uvwa Nzambi mwa kudikwacila mudimu Yèyè mwine mu—Yèyè mwine mu Mukaji’Ende musela mu dituku adi, ne kuleeja cimanyinu cimwecimwe aci, Yesu mmwambe ne neciikale cintu cimwecimwe aci mu matuku a ndekeelu. Nyewu tucimona. Tudi tumona Dikunji dya Kapy dimwedimwe adi. Nansha maalu a mamanya mmaDikwate fôtô, ne bikwabo. Tudi tumona ne bimanyinu bya cikondo cya ku nshiikidilu bikaadi pabwîpi. Tudi bamanye ne bikaadipu.

²³⁸ Nenku dîbà adi, pa kumona cyôci eci, panwikala nungiitabuujaja! Panwikala kanuyi nungiitabuujaja mêmè to, itabuujajaayi bimanyinu, itabuujajaayi Dîyi, bwalu byôbi mbidi byamba cîndi mêmè nnwambila aci. Bu nciyi nnwambila Bulelela to, kabivwaku mwa kwakula bifila dyandamuna to. Nzambi kaadyakufidilaku mashimi bujaadiki to. Nzambi utu ufidila anu Bulelela bujaadiki. Ne Mèyi aa adi afila bujaadiki bwa ne ndi nnwambila Bulelela. Ôwò awu ngàdi afila bujaadiki bwa Mukenji wûndi munkaci mwa kuyiisha ewu. Kî ng’anu Mwanjelo ku musulu kwaka dituku adi, wákamba ne, “Mukenji webe newudyanjidile Dilwa diibidî dya Kilisto” to, byenzedi byôbi biine! Panwikala kanuyi mwa kwitabuujaja ne Mwanjelo awu mmwambe Bulelela to, itabuujajaayi byenzedi, bwalu Bible mmwambe ne bintu ebi nebyenzeke ku cikondo cya ku nshiikidilu. Byôbi mbidi bifila bujaadiki. Byôbi mbidi byakula ne dîyi dikole kupita mèyi aanyi mêmè anyi a nî nganyi mukwabo yònsò. N’Dîyi Dyende Yèyè. Byôbi mbidi bifila bujaadiki bwa cikondo.

239 Nenku nyewu tumona bimanyinu binene, bidì bikwàcishà bwôwa ebi pa bantu, ne bimanyinu bya cikondo, pa buloba, dikenga munkaci mwa matunga.

240 Tudi tumona Izaleela mu buloba bwende. Dibendela adi, dya Davidi dya Mutooto wa matumba asambombo adi, dipeepa, dibendela dya kale ku ônsò pa buloba, dibendela dya kale ku ônsò pa buloba. Yêyè ukaadi ditunga. Ûkaadi bukalenge. Ûkaadi cisamba cyende yêyè mwine. Ûkaadi mu Nsangilu wa bukwamatunga. Yêyè, ùkaadi, ùkaadi bintu byônsò ebi. Ûkaadi mu O.N.U. Ne yêyè ukaadi ne lwende lupetu, bintu byônsò. Yesu wàkamba ne: “Lukongo elu kalwakujika bintu byônsò kabiya byûle to.” Nenku, vulukaayi ne, bufuku bumwebumwe bwàkavwijiibwà Izaleela ditunga abu, mbwôbù bufuku abu mene bwakammwenekela Mwanjelo wa Mukalenge kuntu kwaka. Neya bushuwa. Kî mwaba utudi bônsò awu.

241 Bintu byônsò mbifunkunyiibwe anu ne m’Bulelela bwa menemene. Ncitu munushimeku to. Ndi munwâmbile Bulelela, ne Nzambi mmufile bujaadiki bwa ne ndi munwâmbile Bulelela. Mpindyewu, vulukaayi ne, mêmè ewu ndi mwaneenu. Ndi muntu, nwamonu’s. Ndi muntu anu munudi nwênù bônsò amu, kadi bikengela bwa kampanda aButwale, bikengela bwa muntu kampanda àBwâmbè. Kacivwa disungula dyanyi mêmè to; civwa disungula Dyende Yêyè. Nenku nganwâmbidì Bulelela, ne Yêyè wândàmùnù buludi mwikàle ufila bujaadiki ne Cidi m’Bulelela.

242 Patudi tumona bintu ebi pa buloba leelu ewu, kaa, balumyana wa yaaya, dibà dya ndekeelu’s ndyôdi edi. Petaayi Cimanyinu aci pambidi peenu, ne lukasa lwônsò; anyi, nwênù bwelaayi mu Cimanyinu, bwelaayi mu Cimanyinu. Patudi tumona cimanyinu cinene cya nshikidilu apa, kabidi cikondo ciikàle pabwîpi, citudimwija ne: “Cikondo cikaadi pabwîpi.”

243 Kaa, angataayi bwalu ebu kakuyi tuseku to! Bivwa bikengela twètù kwikala banangangane muntu ne mukwende. Kaa, ekelekele! Bivwa bikengela twètù kwikala mu dinanga dya menemene! Musangu nansha umwe kanwikadiku nwakula bibi muntu bwa mukwende to. Muntu yêyè mwenze cilema, musambidilaayi ne lukasa lwônsò. Tudi pamwe mu cyôci eci, ne Nzambi. Tudi bânà baa muntu balume ne bakaji. Kaa, ikalaayi ne nsômbelu wa difwana dya Nzambi. Ikalaayi ne nsômbelu, ikalaayi ne nsômbelu bu bânà baa bakaji baa Nzambi, ikalaayi ne nsômbelu bu bânà baa balume baa Nzambi. Ikalaayi ne nsômbelu wa kalolo, wa musangeelu, wa didipwekesha.

244 Bubi nansha bukesa kabukuvwidi mu meeji to, mu ngeelelu webe wa meeji. Anu, ùbwîpâtè anu kubwîpata. Bwôbù bukookole ku ciibi cyebe, ùbùmùshè. Amba anu, leeja wêwè anu Cimanyinu cyebe aci, utungunuke anu ne kwenda kuya ne: “Ndi mwinshi mwa Mashi!”

245 Wavuluka ne, kuvwa bààbùngì bàvwà balwe kudi bakaji abu diloolo adi, bamba ne: “Ê, Gertie, Lillie, bamwe baa kunudi aku, patuka lwâyi apa, tuyaaya mu fête diloolo edi.”

246 “Huh-huh! Mêmè ndi mwinshi mwa mashi. Ndi mwinshi mwa cimanyinu, bwa kushaala apa. Dyanyi dinanga didi kudi Mufuki wanyi. Lufu ludi mu ditunga diloolo edi.”

247 Ne lufu ludi mu ditunga leelu ewu. Dinyooka ndindile, ndilebelele. Bombe bwa mushinda, ne bwa hydrogène, ne dikenga dya mishindu yônsò, mbindile matunga.

248 Nenku Nzambi udi munkaci mwa kunyungisha Ekeleeziya Wende, ne mmuleeje byônsò. Tudi bashaale balame Mwânà wa mukooko mpindyewu kukaadi cikondo ndambu, batangile, munkaci mwa kumona cidiiye wenza, tutàngila bufuki Bwende ne bikwabo byônsò, kadi patudi twakulangana apa bidi bikengela Cimanyinu citeekiibwe. Bikengela citeekiibwe. Ki cintu cimwepele ncyôci aci. “Muntu yèyè kayi mulediibwe kudi Nyuma, ne kudi mâyi to, kaakubwelaku to nansha kakese.” Nenku bivwa bikengela kwikala banangangane munkaci mwenu. Bivwa bikengela bwa beena kwitabuuja kwikalabo batapuluke ne maalu a pa buloba. Kanwikadiku nwadidinga kwangata bwalu ebu ne mapepelela to.

249 Mpindyewu, nwênù bàdì bàtèèlejà Eci, pa mukaba wa mêyi, nwênù bakaji, nwênù balume, teeleejaayiku katanci. Piikalabi ne nutukù bangiitabuuje, NùCitàbùjaayi mpindyewu.

250 Cikondo cyākànyì cya kulekela dikokangana muntu ne mukwende. Itabuujaayi Mukenji wa Bible! Itabuujaayi Yesu Kilisto! Nenku nunanganganaayi, nutwanganaayi mushinga, ne nuneemekanganaayi muntu ne mukwende. Nwênù balume nuneemekaayi bakaji beenu. Nuneemekaayi mèkù enu. Ukungwije dîkù dyebe, bwalu, vuluka ne, Mwânà wa mukooko ewu uvwa mbwa dîkù, kavwa bwa muntu anu umwepele to; mbwalu dîkù dijima, dyôdì paadi, bivwa bikengela kukungwijiibwadi. Bivwa bikengela bwa bintu byônsò kubwejiibwabi munda. Bivwa bikengela bwa twètù kunangangana munkaci mwetu. Ne bivwa bikengela bwa beena kwitabuuja kwikalabo batapuluke ne maalu a pa buloba.

251 Monaayi, kabaakalwa kudisangisha anu cyanaana bwa kuyiikilangana pa bidi bitangila mukenji to. Baakadisangisha mbwa kulaababo mashi, bwa kuteeka cimanyinu.

252 Cyôci aci ki cinudi ne cya kwenza. Mpaasata Neville, ne disangisha edi, balubuludi, balami, nwênù bânà beetu, dîbà dyākànyì dya twètù kuteeka ku luseke dikutakana dyônsò dya pa buloba adi, dyākànyì dya twètù kuteeka ku luseke bintu bikwabo byônsò abi. Tukaadi babimone bûngì bukumbane mpindyewu, mu mishindu wa bashindike, batwishiibwe. Ne Cimanyinu cidii ne cya kwikala citeekiibwe. Kuyi naaCi to, newikale wa kabutu; udi ne cya kubutuka, ki cintu cimwepele ncyôci aci.

253 Kaa, kanwikadi nulwa kudisangisha, nwamba ne: “Ndi muCitàbùùje” to. Bwelaayi mwinshi mwaCi, bwelaayi munda mwaCi! [Mèyì a ku cisanji cya tudyomba adi umvwika—Muf.] Nudi nufika ku dicyenza bishi? “Ku Nyuma umwe nkutudi babatiijibwe mu Mubidi wa Yesu Kilisto.” Muntu ne muntu itabuuje, ne mwoyi wende wònsò. Nwamonu anyi? Yèyè kavwa mwambule bujitu bwa nî nganyi yònsò uvwa pambelu kayi mwinshi mwaCi to.

254 Nganyi mwine uvwa wakula awu? [Muntu kampanda udi wamba ne: “Mmèyì a ku cisanji cya tudyomba, Mwaneetu Branham.”—Muf.] Mèyì a ku cisanji afumina kuulu anyi? [“Apicila mu cikolokolo.”] Apicila mu cikolokolo. Badi naawu muntwamu anyi? Mémè mwva muumvwe kampanda wakula. [“Mwaneetu Branham, ngeela meeji ne avwa mmèyì a ku cisanji mabwelelemu lwà paanyima pàapa.”] Mèyì a ku cisanji, eyowa. Kaa, badi—badi bateelejila ku nshinga. Ngeela meeji ne mbangate...Kaa, ku mashinyi? Mfwilaayiku luse. Ndi mumanye ne muntu mmwambe cintu kampanda. Nenu mvwa mwele meeji bu ne muntu kampanda uvwa uswa kungambila mémè bwalu, kadi kayi mufike ku dicingambila to, nudi numona’s, nenku ki bwa cinyi ndi—ndi mwambe cingãmbi aci. Mvwa munumone nukenzakana. Mémè kuumvwa díyì. Mémè kwela meeji bu ne muntu uvwa mujuuke kuulu bwa kwamba bwalu kampanda, kadi nciyi mumanye ne civwa ncinyi to. Mpindyewu, mpindyewu, twasakidilaayi.

Kadi, itabuujaayi, bwelaayi mwinshi mwaCi!

255 Izaleela kaakadikungwija, kwamba ne: “Tuyaayi bònsò ku Goshen lelu ewu. Netwásàayi lwendu batangile ku Goshen. Bandaayi pa tuumeelu twenu, nenku netwangate ditempu dya ngombe. Nenu netwangate ba-Jones, lwà kuntweku, ne bikwabo, ne—ne ba-Goldbergs, nenku netubande batangile bònsò ku—ku Goshen. Nenu nudi bamanye mudi bwalu anyi? Mòsà’s neakule lelu ewu.” Kacivwa aci to. To, mukalenge, mwaneetu! Bwalu budi ne, kubwela mwinshi mwa mashi awu! Eyowa, bushuwa.

Kî nkuyiikilanganaPu to; kubwelaMu!

256 Umwe wabo wamba ne: “Udi mumanye’s, Mukalenge Goldberg, ncyà bushuwa ne ndi mumanye ne m’Bulelela.”

257 “Eyowa’s, mwaneetu wa balume, mémè ndi ngiitabuuja ne m’Bulelela. Ndi mumanye ne m’Bulelela.”

“Mukalenge Lavinski, udi wela peebe meeji bishi pa bwalu abu?”

258 “Cintu’s m’Bulelela bwa kabuyi dyela mpatà! Mémè’s ndi mumone bukole bwa Yehowah Nzambi bwakula. Ndi mumone ndimba ayi yipatuka mu buloba abu. Ndi mumanye ne kacivwaku cyenzeke to anu too ne paavuye kucyamba, ne ndi

mumanye awu n'Yehowah Nzambi.” Mpindyewu, byònsò abi's bidi anu bilenga.

“Wèwè ukààdi mutengudiibwe anyi?”

“Eyowa's, mukalenge!”

“Udi mwena kwitabuuja anyi?”

“Eyowa's, mukalenge!”

²⁵⁹ Nenku pashiishe paakumvwaye Mpaasata Mòsà wakula, dituku adi, yèyè kwamba ne: “Kadi bikengela bwa nwènù kubwelaayi mwinshi mwa mashi awu, bwalu Nzambi mmwambe ne: ‘Mashi ncimanyinu.’ Ncimanyinu's! Nansha wèwè mwitabuuje bya bishi, nansha wèwè mutengudiibwe bya bishi; ncipungidi civwa Nzambi mupeeshe Abraham, ne bikwabo, aci ncipungidi. Kadi bidi bikengela bwa nwènù kubwela mwinshi mwa mashi, ki cimanyinu ncyôci aci, bwalu Yèyè mmwambe ne: ‘Pàngààmònà mashi, Nèmpitè.’ Mwena Izaleela, anyi nî nganyi yònsò!”

²⁶⁰ Mmumwe ne wíkale wa mudingumba anyi kayi wa mu dingumba, anyi ewu anyi wawa, udi ne cya kubwela mwinshi mwa Mashi. Méthodiste, Baptiste, Presbytérien, mwena Mpenta, wa kuyi usungulujangana bilondeshile mangumba, cyònsò ciwikala aci, bwalu mbwa kalume nkaaya. Bidi bikengela ubwele mwinshi mwa Mashi. Kadi kwikadi anu wakula bwa Cyôci aci cyanaana to; uCipete! Ikalaayi banteeleje! Ikalaayi banteeleje! Mu Dîná dya Mukalenge, ikalaayi banteeleje! Nwamonu anyi? Bikengela ubwele mwinshi mwa Mashi!

²⁶¹ Yèyè kavwa mwambule bujitu bwa bantu kana bònsò bavwa kabayi mwinshi mwa mashi to. Nzambi wakacitookesha ne bònsò bavwa kabayi mwinshi mwa mashi bavwa babutuka.

²⁶² Ndiku mwa kwamba Mèyi Ende anyi? Bònsò badi pambelu paa Kilisto nebabutuke. Udi ubwela munda mwa Kilisto bishi? Kolinto wa Kumpala 12: “Ku Nyuma umwe!”

²⁶³ Kî nne, “ku dilabulangana dimwe dya ku cyanza, ku buumambala bumwe, ku dingumba dimwe” to. Aci's ki cidibo bôbò bateeta kucivwija. Bôbò badi mwa kwenza aci.

²⁶⁴ “Kadi ku Nyuma umwe nkutudi bònsò babatiijibwe mu Mubidi umwe.” “Mwanjelo kampana mufumine mu Dyulu yèyè mulongeshe cintu kampana cikwabo,” mudi Pòlò mwambe, “ediibwe mulawu.” S'ki Mukenji ngwôwô awu, bwelaayi munda mwa Kilisto!

²⁶⁵ Tangilaayi, bantu nansha bôbò banganyi pambelu paa cimanyinu, Nzambi kavwaku mwambule abu bujitu to. Ne Nzambi kî mmwambule bujitu bwa muntu nansha umwe to, munene anyi mukese, wa mumanyike anyi kayi mumanyike, mubanja anyi mupele, mupika anyi mudishikamine, mulume anyi mukaji; Yèyè kî mmwambule bujitu bwa nî nganyi nî nganyi

udi kayi mwinshi mwa cipungidi cya Cimanyinu to. Yèyè kî mmwambule bujitu abu to.

266 Wèwè udi wamba ne: “Kadi, Éyì Mukalenge, mèmè ewu’s nkaadiku mwenze *cikampanda*. S’nkaadi mwipate badémóns. Mukalenge, s’nkaadiku mwenze *cikansanga*. S’nkaadiku—nkaadiku muyiishe Evanjeeliyo.”

267 “Nguumukila kwaka, wèwè mwenji wa bubi. Kacya Ncituku mene mukumanye to.” Yèyè udi umanya anu Cimanyinu.

268 Nudi baCiteeleje anyi? Ambaayi ne: “Amen.” [Disangisha didi dyamba ne: “Amen!”—Muf.] Mpindyewu, pa nanku aci cidid pambidi peenu. Yèyè. . .

269 Musòmbèlè panshi mu diitu dituku adi mwab’ewu, ne nsongaalume yidikonka, yamba ne: “Matuku abidi majima ngòwò aa, wèwè kuyi. . .” Ncivwaku mwase nansha nshindi wetu ewu to. Bòbò ne: “Civwa mbwalu kaayi?” Nwamonu’s, ki civwa bwalu ncyòci aci. Nwamonu anyi?

270 Yèyè ne: “Bèlè bòbò bwalu abu pambidi, bòbò.” Yèyè ne: “Wèwè ukaadi mwakule—mwakule Naanyi pa bwalu abu.” Nwamonu anyi? Mpindyewu bwalu abu budi pambidi peenu nwènù. Budi pambidi peenu nwènù.

271 Yèyè kaakumanyaku cingà cintu to anu Cipungidi aci, cya Nyuma Mwimpè. Ne wèwè kwèna mwa kupeta Cipungidi aci paudi kuyi musungidiibwe, mujidiibwe, ne pashiishe mubatijiibwe mu Mubidi to. Yèyè kaakucimanyaku to.

272 Udi mufwanyine kwikala ne ditentula, udi mufwanyine kudyumvwa bîmpè, ne kutupika *muulu ne panshi*, kwakula mu myakulu, ne kuja maja mu Nyuma. Abi kabyenaku ne dipetangana nansha dya kânà ne Cyòci aci to. Ikala muCiteeleje, mu Dînà dya Mukalenge! Nzambi kêna umanya abi to. Bampangaanu batu babyenza. Baamwamulopo batu babyenza.

273 Wèwè udi wamba ne: “Mèmè ndi mumanyi wa dibàla. Ntu ngenza *bikampanda*, *bikansanga*, anyi *bikankenga*.” Bwende Yèyè nansha wèwè mwikàle mumanyi wa dibàla wa bishi. S’ki cidid dyabulu, yèyè pende, wamonu’s.

274 Yèyè udi umanya anu—anu Cimanyinu. Cyòci aci ki Mukenji wa dîbà edi! Cyòci aci ki Mukenji wa dituku edi! Cyòci aci ki Mukenji wa cikondo eci! Mu Dînà dya Yesu Kilisto, Cyàkìdile!

275 Pa kuumusha mupingany-. . .mupinganyi to, cintu kampanda cidid dyabulu mwa kuteeka pambidi peebe; bu mudid dinanga dya mafi, bwa kwenza ne mulume anange mukaji mukwabo kampanda pamutu paa mukajende yèyè, anyi mukaji unanga mulume wa cyanaana, anyi cikampanda mwaba ewu, cintu cya cifwisha bundu. Adi kî ndinanga dilelela to. Awu’s ndyabulu. Ki byende byenzedi mbyòbì abi. Ncintu kampanda cididye muteete bwa kukupeesha mu cianza, pamutu paa dinanga; disanka kampanda, bwa kunwa maala kadi

kudyumvwa bîmpè bwa cyôci aci, wamba ne: “Ndi kabungame; nêmpatukè nkanweku ndambu wa cicyampa’s, bwa mbipweku mwoyi.” Aci’s ndufu.

²⁷⁶ Nzambi ki dyebe disanka. Nzambi ki dyebe dikanda. Kumanya Mukenji, kumanya Bulelela, ki cyetu cidi citukumbane bwa mpindyewu. Yêyè ki cyanyi paanyi cyônsò cidi cinkumbane. Munda Mwendè, bintu byônsò bîndi naabi dijinga bidi munda Mwendè Yêyè. Ki dyetu dikanda ndyôdî adi. “Dyanyi dikwacisha didi difumina kudi Mukalenge.” Nwênù beena Kilisto, ikalaayi baMweyemene Yêyè bwa dyenu disanka, ikalaayi baMweyemene Yêyè bwa dyenu dikanda, ikalaayi nuMukeba Yêyè bwa dyenu dyakalenga. Yêyè ki dyanyi ditalala. Yêyè ki dyanyi disanka. Yêyè ki dyanyi dinanga. Yêyè ki wanyi Mwoyi. Ki Cipungidi ncyôci aci, Cimanyinu ku ciibi!

²⁷⁷ Kî mmwambule bujitu bwa muntu to, muntu nansha umwe, nansha wêwè mwikàle nganyi, Yêyè kî mmwambule bujitu bwende to, padiye kayi mwinshi mwaCi to.

²⁷⁸ Nenku vulukaayi ne, famiye mujima uvwabo nende, musanga pamwe. Kaa, ekelekele! Kaa, nwavulukaayi’s!

²⁷⁹ Wêwè udi wamba ne: “Ee, papa wanyi’s mmuyiishi. Tùtùwânî! Mpaasata wanyi! Wanyi. . .” Bwa aci ncifwanyine kabidi kwikala cilelela, cyôci aci, kadi wêwè?

²⁸⁰ Vulukaayi ne, bavwa mu dikubiibwa anu pavwa cimanyinu cileejiibwe patooke! Bu ne muntu uvwa mwaba ewu mwinshi *emu*, ne mwanende wa balume mwikàle dinsambu dya mùsèèsù, ùvwa mu njiwu, yêyè awu ùvwa ne cya kufwa. Papa wende yêyè ùvwa ne cya kupànda. Anyi, bu ne mwânà wa balume awu ùvwa yêyè *apa*, kadi papa wende mwikàle kwaka naka, papa wende awu ngudi ne cya kufwa. Anu cimanyinu! “PâNgâàmônà cimanyinu, Nêmpicilè pamutu peenu.” Ki cintu cimwepele ncyôci aci.

²⁸¹ Wêwè udi wamba ne: “Ee, mwanaanyi wa balume’s mmuyiishi.” Nwênù baamaamù nutu nwamba ne: “Mémè ndi ne mwânà wa balume mutambe bwîmpè,” anyi “mwânà wa bakaji mutambe bwîmpè. S’ki mémè udi ukwambila awu, yêyè awu ngwa kalolo wa kakuyiku mukwabo to. Mmuujiibwe tente ne Nyuma Mwîmpè, ne dinanga dya dikema! Mmutumikidi. Kacya ncituku mwanji kumona wa mushindu wawa to!” Kadi wêwè, maman?

²⁸² Wêwè udi wamba ne: “Wanyi mààmù ngwa kalolo mutambe bônso. Ndi mumanye ne, bu yêyè mwa kufwa, neaye mu Dyulu, bwalu ncyà bushuwa ne yêyè mmupete Cimanyinu, Mwaneetu Branham.” Kadi wêwè, mwaneetu wa bakaji? Famiye mujima’s udi ne cya kuteekiibwa mwinshi amu.

²⁸³ Nwacyoku anyi? [Disangisha didi dyamba ne “To.”—Muf.] Nêngiikalè. . . Tukaadi dîbà dikumi ne ibidi. . . Indilaayi kakese cyanaana. Ndi mufwanyine kucikosa kadi kubangulula

cyakabidi diloolo edi. [“To.”] Kadi panwikala—panwikala baswe kwanji kwindilaku kabidi ndambu, nënditàcìshèku bwa kulwijakaja mpindyewu. [“Amen.”] Ném̄bwejèku munda amu mene, bwalu ndi ngeela meeji mpindyewu mene panucidi mu dilaabiibwa dyaci apa ne, mbifwanyineku kwikala bilenga bu nwènù mwa kucipeta mpindyewu mene.

284 Anu padi Cimanyinu cileejiibwe patooke! Dìbà adi, famiye mujima udi ne cya kwikala mwinshi mwa Cimanyinu aci, Mashì. Papa ne maman, ndi mumanye munudi nudyumvwa’s. Ndi paanyi ne bânà’s, mémè ewu, bikengela mbamone basungidiibwe. Ndi ndyambila mémè mwine leelu ewu. Nwamonu anyi? Ndi ne bânà beetu baa balume. Ndi ne mwaneetu wa bakaji. Ndi ne bananga baanyi. Ndi—ndi muswe kubamona basungidiibwe, bôbò paabo. Kadi, vulukaayi ne, kakuyi dileeja patooke dya Cimanyinu to, nebabutuke. Kakwenaku dibiika dya ku lufu bwabo bôbò to. Aci ncyà bushuwa. Bwabo mbutuuke. Anu padi Cimanyinu cileejiibwe patooke!

285 Tangilaayi, Yoshuwa, mvw’a kujinga bwa twìkalakù kabidi ne dîbà dya kucibala’s. Cifundaayaaku, Yoshuwa nshapita mwi2; ndumba wa baa Bisamba bya bende mwena kwitabuuja awu, Laahaba.

286 Kaa, mvw’a kujinga bwa twìkalakù nanshà pa dîbà dya citeema’s we. Ndi muswe—ndi muswe kwangata cyôcì aci bwa kunuleeja muvwa cyôcì aci kuntwaku, nwamonu’s.

287 Ndumba ewu, wa baa Bisamba bya bende, tangilaayi numone, famiye wende yônsò mujima. Yêyè’s uvwa mwena kwitabuuja. Bivwa bikengela bwa famiye wende yônsò mujima abwele mwinshi mwa mukusu mukunze awu, cimanyinu aci. Bivwa bikengela bwa kubwelabo mwinshi mwawu amu, bwa cyanaana bavwa mwa kubutuka. Bakaavwa bumvwe bamba bwa cijji cikole cya Nzambi. Bakaavwa bumvwe bamba bwa dileeja patooke dya bimanyinu ne bishima bya Nzambi munkaci mwa cisamba Cyende, ne bôbò bivwa bikengela kubiitababo. Bivwa bikengela bwa yêyè kubiitabaye. Nzambi, mwanjelo mubutudi awu, ùvwa wenda ulwa. Bôbò bavwa bacimanye. Ne Yoshuwa ki uvwa mwine mwanjelo awu. Bôbò bavwa basanganyiibwa mu njila awu.

288 Nenu ki mudi kabidi ditunga ne ditunga dyônsò, pa buloba, mu njila wa Cilumbulwidi cya Nzambi!

289 Ndumba mukese, wa kale ewu, yêyè ukaavwaku muumvwe bacyamba. Diitabuuja didi difuma ku dyumvwa! Kwambaye ne: “Ditunga dijima ndipete kàyumbayumba anu bwenu nwènù.” Aci ncyà bushuwa.

290 Mpindyewu, batentekedi bàakatùmiibwà muntwamu bwa kudyanjila kulongolola maalu abu, ne bikwabo, yêyè wakatwa bantu abu mushinga. Nenu, yêyè, civwaye muswe nkupànda.

Kwambaye ne: “Ndi mumanye ne wenu Nzambi awu ngudi Nzambi, ne mêmè ndi muumvwe bamba bwa bintu binene bidiYe mwenze. Ndi mumanye cidiYe mwenzele Oga, ne ndi mumanye cidiYe mwenzele matunga mashiileshiilangane. Ne ndi mumone ne aba badi baMwitaba badi bapànda, ne aba badi kabayi baMwitaba badi babutudiibwa. Kadi cîndi mêmè nkeba nkwikala ne mwoyi,” mwakambaye. Kaa, ekelekele! S’ki bwalu mbwôbù abu. “Cîndi mêmè nkeba nkwikala ne mwoyi.” Bwalu bavwa anu . . .

²⁹¹ Monaayi, Yeleko ukaavwa muumvwe bivwa Nzambi munkaci mwa kwenza, kadi kabaakaswa kwangata didimwija adi ne mushinga to.

²⁹² Ne kakwenaku dingumba nansha dimwe mu ditunga emu, mu nyungulukilu emu, didi kadiyi dyumvwe bidi Nzambi munkaci mwa kwenza to. Bôbò kî mbaswe kwangata didimwija ne mushinga to.

²⁹³ Bukole Bwende bunene ne bimanyinu byakaleejiiibwa patooke. CyakenzaYe, Yèyè wàkabàpicishila buludi mu Mbù Mufwe, byenze anu bu ne mpa buloba bûme. Yèyè kupatwisha, Yèyè kufuka bintu, ne kwenza ne ndimba, ne nkùsù, ne nkùpà bwa kupatukayi mu lupeepele; mubifuke ku Dìyì Dyende, ku muprofeta Wende. Aci kacivwa cya mu musokoko to. Bôbò bavwa bacimanye.

²⁹⁴ Ki Laahaba kwambaye ne: “Nkaadi muumvwe bwalu abu. Ncyêna muswe kubutuka pamwe ne beena bupidya aba to. Bwâlâ, mukalenge!” Ûvwa mumanye ne cilumbulwidi civwa ne cya kubilonda, bwalu bôbò bavwa anu mu njila awu menemene. Yèyè uvwa mucimanye. Pa nanku, ki kupengabo njila wa yèyè kupandukaku.

²⁹⁵ Bôbò bavwa ne cya kwikala biitabuuje ne dingumba dyabo dinene dya mu Yeleko adi divwa ne bukole bwa kukandameena ciji cikole cya Nzambi aci, nwamonu’s, dingumba dyabo bôbò biine dinene adi.

²⁹⁶ Ki cidi bààbûngì badyambidila leelu wa Ndaaya ewu. “Kaa, ncyà bushuwa ne Nzambi kaakwenzaku aci to.” S’ki cyakambilabo Eva kudi Sataana ncyôci aci. “Kaa, ncyà bushuwa ne Nzambi kaakucyenzaku to.” Neàcyènzè, bwalu Yèyè mmwambe ne Neàcyènzè, nwamonu’s, ne cyôci aci ki Dìyì Dyende. Eyowa’s, mukalenge.

²⁹⁷ “Muntu yèyè kayi mulediibwe!” “Ne bimanyinu ebi nebifile badi balediibwe!” Nwamonu anyi? “Ku cyôci eci nkwananyina bantu bônso ne nudi bayiidi Baanyi,” ne bikwabo, nwamonu’s. Eyo, ki civwabo bôbò baswe kwenza’s. Kaa!

²⁹⁸ Cyàkenzekà ncinyi? Mpindyewu kadi kubabwikidijabo mukana’s. “Ditabuluja nansha dimwe kadyakwenzekaku muneemu to. Dyetu dingumba kadyakutuulaku yadi mfranga bwa cintu cya mushindu awu nansha. Twètù katwakwikalaku

ne lukutukutu lwa mushindu awu munkaci mwetu to. Ndi nkandika yònsò wa kunudi bwa kuya ku diine disangisha adi.” Huh! Yeleko, anu mu njila wa bapiishiibwe menemene!

²⁹⁹ Kadi kuvwa ne cya kwikala nsongaalume myeledyanganyi ya mikaba ya mēyi mimane kudifindila mu mwaba kampanda, bwa mamiinu madyanjila kulongolola. Bòbò kudifinda too ne ku nzubu kwende aku ne kumwelelabo ndambu wa mikaba ya mēyi. Yēyè kadi kuvwijaye nzubu wende—wende yēyè mwine awu mushaale ekeleeziya, bwa kwakidila mukenji.

³⁰⁰ Bàcìtu anu ne baa nanku’s, nudi bamanye. Mukenji’s ukaadi mukafike too ne kudi Dimiinu didyànjila kulongolola adi, nansha bishi. Katwena bamanye ne Wòwò mmukafike too ne kwine aku bishi to, kadi mMukakùfikè, bwa Mwakane kalu kubutuka pamwe ne mubi to. Nzambi ngudi munkaci mwa kutabaleela cyòcì aci, leelu wa Ndaaya ewu. Eyowa’s, mu mushindu kampanda Wòwò udi udifindamu. Twètù katwena bamanye ne mbishi to. Nansha bòbò kabayi baswe kuWutuudila mfranga to, kadi kudi Dimiinu kampanda kuntwaku didi didyànjila kulongolola.

³⁰¹ Yònsò utukù mumanye cintu kampanda pa bidi bitangila Bible, mmumanye ne ndumba awu ukaavwa mudyànjila kulongolola. Ncya bushuwa nanku! Yēyè kavwa . . . Bible mmwambe ne: “Yēyè kaakabutuka pamwe ne bavwa kabayi biitabuuje to.” Ncya bushuwa. Kadi yēyè wakiitabuuja mukenji wa dībà adi.

³⁰² Nnku Nzambi wakamupa cimanyinu, ku baamisanjeela Bende abu. Baakamba ne: “Angata mu—mukusu mukunze, mukunze uwuswikile ku webe. . .” Bòbò ne: “Uvuluke ne, wèwè kuyi muswike mukusu awu kuntwaku to, anyi kuyi muwushiyeku to, kutudi twètù bapandukile eku, katwena twambulaku bujitu bwa mucipu wètù awu to.” Ki bòbò ne: “Nwènù basanganyiibwe pambelu paawu, twètù katwenaku twambula abu bujitu to.” Kaa, ekelekele! “Laahaba, dimiinu dyònsò didyànjila kulongolola didi muneemu adi, patuka kwaka uye wenda ukebangana naadi. Nda ukangate papa webe, mamwèbè! Bwalu, twètù twafumu ku dipatuka, biikàle mwinshi mwa difuta dya cibawu aci, mu Ejipitu mwamwa, ne byònsò bituvwa katuyi bateeke mwinshi mwa cimanyinu aci mbibutuke. Laahaba, nyawu nkupeesha cimanyishilu. Ncimanyinu. Nnku ki mēmè udi wamba awu, mu Dîná dya Mukalenge, bwa kwamba ne, pawikala muswe kuteeka cyòcì aci! Mēmè ngudi mumanye cyòcì aci, mumanye musanjeela awu. Ndi mumanye mwanjelo wa cijji cikole awu, Yoshuwa. Yēyè ki musanjeela mubutudi wa Nzambi. Mēmè ndi mumumanye, ne yēyè mmumanye ne bidi bikengela kwikale cimanyishilu cya cimanyinu. Nnku ucilembeleje kuntu kwaka, ndi nkujaadikila. Ndi ngenza mucipu.” Ne Nzambi pende kwenzaye mucipu, ne, ewu yònsò uvwa usanganyiibwa pambelu paa cyòcì aci uvwa ubutuka, ne

ewu yônsò uvwa usanganyiibwa mwinshi mwaci uvwa ushaala ne mwoyi.

303 Mpindyewu, mucipu umweumwe awu ngudiku leelu ewu ewu, cintu anu cyôci cimwecimwe aci, nwamonu's: "Même ncyakukulekelaku ubutuka pamwe ne badi kabayi biitabuujе Mukenji to." Nенku bôbò. . .

304 Mukaji awu uvwa muumvwe bamba bwa byenzi bikaavwà byenjiibwe, ki kuciitabuujaye. Kadi, bwa apu, yêyè uvwa. . . Yêyè ne tatwëndè, ne bânà baabo baa balume babidi, anyi cintu kampanda, anu bôbò abu nkaayaabo ki bàakaciitabuujà, mu cimenga cijima aci.

305 Nudi numona mudibo banyààbanyà anyi? Anu umwepele *apa* ne umwepele *pàapa*, kaafamiye kakese nkiikalà mwa kupatuka mu ditunga. Ncya bushuwa anyi? Anu menemene nanku mpindyewu, apa tudi twamba maalu mudiwu enzeka. Tudi. . . Panwikala baswe kumona cidi mubidi wa bwalu, bikengela nwànji kumona dyambedi civwà cimfwanyi. Bidi bikengela numone cidi mundidimbi, dîbà adi nudi numanya ne cintu cilelela neciikale bishi. Nwamonu anyi?

306 Bukole Bwende bukaavwa buleejiibwe patooke. Cilumbulwidi cikaavwa mu njila cyenda cilwa. Bavwa ne cya kwitabuujа, bwa kupàndabò. Eyowa's, mukalenge. Nенku bakese aba. . .

307 Balumyana aba kubwelabo muntwamu, baamisanjeela aba, ne—ne kukwatabo dimiinu didyànjila kulongolola dikaavwà diitabuujе adi. Mukaji awu kukwataye mudimu ne nzubu wende bu ne ng'ekeleeziya, bwa kwakidilaye baamisanjeela aba. Kabavwaku bafwanyine kubalekela babwela mu ekeleeziya ayi to. To, mukalenge. Nwamonu anyi? Pa nanku yêyè. . .

308 Nansha wêwè peebe, kabaakukulekelaku ubwelamu to. Badi bakwipatamu wêwè anu mudidinge mwambe nî ncinyi nî ncinyi pa bidi biCitangila. Eyowa's. Nwamonu anyi?

Kubwejabo bônsò baa mu cimenga cyende aci, bàvwà baswe kwitabuujа abu, mwinshi mwa cimanyinu aci.

309 Ki cyôci aci menemene cidi cîmpè twètù kwenza leelu ewu. Pawikala muswe bwa munanga webe kampanda apande, bidi bîmpè bwa umubweje anu patudi twakulangana apa. Nwamonu anyi?

310 Cijji cikole cya Nzambi paakabutulaci cimenga cinene aci, cimanyishilu cya cimanyinu cyakashaala cilame nzubu wende awu mu dikubiibwa. Amen. Bwa cinyi? Cimanyishilu civwà pa cimanyinu cyende apu. . . Anyi, cimanyinu civwa pa nzubu wende, pààkuupukà cimenga cijima aci panshi. Civwa ncinyi? Civwa ncinyi? Yoshuwa, musanjeela wa Nzambi! Nzambi Yêyè mwine wakajingulula mukenji wa musanjeela Wende awu. Amen! Cyakawujaadika. Cyakawujaadika. Bôbò

abu baakajingulula mukenji. Yéyè wakajingulula mukenji wa musanjeela Wende. Nenku pààkuupukà cimenga cijima aci panshi, ki cimanyinu cya mukusu mukunze cya Laahaba cyacya kumutu kwa ciibi, eku mpavwa bakwabo bônso bafwe.

³¹¹ Dìbà adi, banjelo babutudi kuyabo buludi ne kubutulabo byônsò bivwa mu cimenga aci, kakwakashaalaku nansha kaacintu kamwe to. Bu muntu yéyè anu mudidinge mwangate kaacintu, bivwa bikengela kubutukaye naaku, wa mu diine dingumba adi. Kwangatabo cintakanyi cijima aci e kucibutulabo! “Mulawu ukwate ewu yônsò wadidinga kuteeta kuciibaka. Mwanende mwanaabute neafwe anu piikalaye ucibangilaku apu,” ne bikwabo. Nzambi wakacyela mulawu mushindu awu, cintakanyi cinene aci civwà cibenge ngâs- . . . mukenji wa ngâsà ne luse, badyelela meeji ne bavwa balamiibwe mu dikubiibwa.

³¹² Leelu ewu, bantu bààbûngì badi badyelela meeji ne: “Bwalu ndi wa mu ekeleziya, ndi mulamiibwe mu dikubiibwa.” Kwitabuujiuku lukutukutu lwa mushindu awu to.

³¹³ Padibi ne: “Mashi neikale cimanyinu kunudi.” Nyuma bwa mpindyewu ngudi Cimanyinu kunudi, Mwoyi uvwa munda mwa Mashi awu.

³¹⁴ Bya mwomumwe, twänjìbi kwelanganaayiku meeji pa bwine bwalu abu ne, cimanyinu cimwecimwe cyakakwatabo naaci mudimu mu Ejipitu aci, cimanyinu cimwecimwe cya mwoyi civwà mu Ejipitu aci, civwà mu Ejipitu aci, Nzambi wakakwata mudimu ne cimfwanyi cimwecimwe aci kwòkù aku. Yoshuwa, cimfwanyi cipwangane cya Yesu, ùvwa ne lulamatu ku cimanyishilu cya cimanyinu civwà baamusanjeela bende bayiishe aci. Yoshuwa, paakambaye aci, wàkamba ne: “Kanulengiku awu nzubu anyi nî ncinyi nî ncinyi cidìmu to. Awu mmulamiibwe bwa Mukalenge.” Amen!

³¹⁵ Ndumba, wa baa Bisamba bya bende, mwendakanyi wa mu misèsù, kadi wàkuumvwa ne wàkiitabuuja, ne wàkatèeka cimanyinu.

³¹⁶ Nansha wèwè mwikàle wa ciipanshi mu mpekaatu bishi, cyùdi mwenze nansha ciikàle cinyi, kacyena ne dipetangana ne cyôci aci nansha dikese to. Teeka wèwè anu Cimanyinu. Cidi mbwebe wèwè. Wèwè umvwa munda mwa mwoyi webe amu cintu kampanda munkaci mwa kukoka, Cidi mbwebe wèwè. Teeka Cimanyinu. Ne Yosh- . . . munene awu.

³¹⁷ Mwaku *Yoshuwa* udi wumvwija ne “Yehowah-musungidi.” Ne *Yesu* kabidi, udi wumvwija ne “Musungidi.” Nenku, Yoshuwa, paakamanyaye ne baamusanjeela bende . . .

³¹⁸ Baamusanjeela bende abu e kwalukilabo, kwambabo ne: “Ndi mutumikile mèyi ebe matuma. Kadi nyawu kuvwa mukaji kampanda utudi bakasangane, patwèdi mikaba ya mèyi ayi, udi mumanye’s. Tudi bakasangane mukaji kampanda udi yéyè

mwitabuuje. Ki twètù kumwambila ne, bônsò bìikalà mwa kulwa mwinshi mwa cimanyishilu cikunze aci muntwamu abu, cimanyinu aci, ncìdì cifwanyine kwikala ne mushinga. Mpindyewu ki cìndì muyiishe ncyôci aci. Udiku mwa kucitwa mushinga anyi, Yoshuwa?”

“Kadi’s ki cìmvwà munutume bwa kuya kenza.” Amen.

³¹⁹ Nenukù dîbà adi, cyôci aci, paakacitwa Nzambi mushinga, nzubu awu kaakuupukaku to. Nenukù dîbà adi pààkiimanà Yoshuwa kaaba aku ne kufilaye cikemu bwa kubutulabo cintakanyi cijima aci, pààkabàndàbo buludi kuntwaku, kadi Laahaba ne bende bônsò bavwa basômbe anu bilenga, ne bintu byabo byônsò, amen, amen, bintu byabo byônsò bivwa mu nzubu amu, mu dikubiibwa. Bavwa biimanyine anu muntwamu, ne kabiyiku bikengela bwa kwikalabo benza kutangidila pa dididiishi to. Bavwa mwa kwikala babala Mifundu pavwa mvita minunke apu.

³²⁰ Kwalukilaye buludi ne kumwelabo dîyì dya kumusela, dya kumuselabo kudi kalaala kaa cilwilu, e kubàndishiibwayè milongo, ne kulwabo nende mu Betelehema, ne bôbò kumwabanyina cyende citupa munkaci mwabo amu. Nenukù kulelaye...kulelaye mwanende wa balume mwende luumu, ne mwanende wa balume mwende luumu awu kulelaye pende mukwabo mwânà wa balume mwende luumu, ne awu mwânà wa balume kulelaye pende mukwabo mwânà wa balume mwende luumu, too ne paakalwa Mwânà wa balume munene, mwende luumu awu. Kuyabi anu nanku, anu nanku too ne ku Obeda, ne ku Isaayi, anu nanku too ne ku Davidi. Neya bushuwa, ndumba awu Laahaba, anu bwalu wàkiitabuuja musanjeela. Wàkateeka cimanyinu, ne nzubu wende wàkapànda, bwa cyanaana nunku mmubutukile anu kuntu kuvwaye aku.

³²¹ Teelejaayi ne ntema mpindyewu. Kaa, amba tũng, udi wêwè ucijingulula anyi? Bônsò bàvwà mwinshi mwaci bààkapànda mu Ejipitu. Bônsò bàvwà mwinshi mwaci bààkapànda mu Yeleko. Bônsò bàdì mwinshi mwaCi ne bapande leelu ewu. Muswikiibwe ku mashi, mwânà wa mukooko mwena mashi awu, civwa ncmfwanyì cya Yesu Kilisto.

³²² Mu Ebelu 13.10 ne 20. Ncyèna ne dîbà dya kucibala to. Cifundaayi. Nkaavwa muswe kucibala. Ncibiikidiibwe ne “cipungidi cya kashidi.” Mashi a Yesu Kilisto mmabiikidiibwe ne “cipungidi cya kashidi.” Eyowa’s, mukalenge! “Cipungidi cya kashidi.”

³²³ Kacyakabiikidiibwa ne “ncipungidi cya Cyendelelele” bwa cinyi? Bwalu kacivwa cifwanyine kwikala cya Cyendelelele to. Patwapikudiibwa, dîbà adi’s cyajiki. Cidi cya kashidi, mbwena kwamba ne, “cipòlòl kampanda cya cikondo,” too ne paajika cikondo. Kakwakwikala kabidi cikwabo to. Paajika cikondo,

katwakwikala kabidi dijinga ne cipungidi to. Kadi pamba cikondo kujikaci apu, tudi dijinga ne cipungidi aci.

³²⁴ Mpindyewu, vulukaayi ne, Ebelu 13.10-20, “cipungidi cya kashidi.” Mulayi wa Nzambi muswikiibwe ku Mashi awu udi utuvwija buumuke ku bupika bwa mpekaatu. Amen! Kakwena mpekaatu munda Mwende to; kakwena mpekaatu, budisu, musunya to.

³²⁵ Ikalaayi nuMukuukwila nuleeja bukole Bwende bulaya! Cisamba cya Nzambi cya cipungidi ciswikiibwe ku Mashi, ciswikiibwe ku Cimanyinu aci, cidi ne Nyuma wa Yesu Kilisto munda emu, ne: “Ewu udi ungiitabuujja Mêmè, byenzedi bîndî Mêmè ngenza abi, neàbyènzè pende,” mwikàle uleeja cipungidi patooke. Nwamonu anyi?

³²⁶ Dipungila Dipyadipya! *Dipungila* mbwena kwamba ne “cipungidi.” Neya bushuwa, kî mmwômò anyi, Docteur Vayle? *Dipungila* mbwena kwamba ne “cipungidi.” *Dipungila Dipyadipya* mbwena kwamba ne “cipungidi cipyacipya.” Dipungila Dikulukulu divwa ndya kale, dya pa mwânà wa mukooko, mwena mwoyi uvwa kawuyi mwa kwalukila pa mwena kwitabuujja awu. Dipungila Dipyadipya divwa m’Mwânà wa mukooko wa Nzambi, ne Mwoyi Wende udi walukila pambidi peetu. Mashi adi Mwoyi! Nwamonu anyi? Mashi adi Mwoyi mu Dipungila Dipyadipya, nwamonu’s, Mwoyi mmufume ku Mashi a Mwânà wa mukooko, mbwena kwamba ne Dipungila Dipyadipya, cipungidi cipyacipya.

³²⁷ Cya ne, Nzambi: “Paanyima paa matuku awu Mêmè nêmfundè mikenji Yanyi pa mabaya a musunya a myoyi yabo.” Nwamonu anyi? Nwamonu anyi? “Kî mpa mabaya a mabwe, ne mashi a mwânà wa mukooko to, àvwà akengela bwa nwênù kwikala nwamba ne: ‘Eyowa, nyewu ndi—ndi ne mashi *mwaba ewu*, kadi mpindyewu cidi cyamba ne ngènzè cinyi?’ to. Kadi pa mabaya a myoyi yenu, nwamonu’s, cipungidi cya Nyuma ki cîNgènzà ne cisamba.”

³²⁸ Nenku Cidi cileeja patooke bukole Bwende. Yone 14.12, udi wamba ne: “Ewu udi ungiitabuujja Mêmè, byenzedi bîndî Mêmè ngenza abi neàbyènzè pende.”

³²⁹ *Dipungila Dipyadipya* didi “cipungidi cipyacipya,” Mwoyi mupyamupya, cileeja ne Yesu mmutukumbajile kantu ne kantu kavwa Nzambi mulombe, bwa kutwaluja, cya bushuwa, ku bânà baa balume ne baa bakaji baa Nzambi, mwinshi mwa Mashi, mudi kamuciyi kabidi dipiila to.

³³⁰ Loomo 8.1: “Nenku kakucyena mpindyewu kabidi dipiila bwa aba badi munda mwa,” kî ng’aba badi *biitabuujja* Cyôci aci to, “aba badi munda mwa Kilisto Yesu, badi kabayi benda bilondeshile mubidi to, kadi bilondeshile Nyuma.” “Ne Diyî Dyanyi didi Nyuma ne Mwoyi.” Nwamonu anyi? Kaa, ncyènàku mufwanyine kwangacilapu cyena-bwalu kadi

kushaalapu kabidi mēbà abidi. Kadi netulwijakaje naaci, nudi numona's.

³³¹ Kakuciyi kabidi dipiila to; buumuke ku bupika bwa mpekaatu, badishikamine ku diditacisha dya ku maalu a pa buloba, dipiila kadiyiku to. Bwa cinyi? “Kudi aba badi, ku Nyuma umwe, babatijiibwe mu Mubidi umwe.” Mwaba awu Mashi a Mwânà wa mukooko mmalaabiibwe. Nzambi wa mu Dyuku wānwītàbì, nenku wenu...Mwoyi Wende udi munda mwenu, ne nudi bânà baa balume ne baa bakaji baa Nzambi.

³³² Ngiikadilu webe nyêyè ngiikadilu wa Nzambi awu. Ncinyi ciine aci, kaamuntu kakese kaa kalendalenda anyi? To, mukalenge! Nzambi udi Nzambi wa cilumbulwidi. Yêyè n’Nzambi wa maalu malulame. Cidi ne cya kwikala anu mu cyôci. Kakwena cikwabo nansha cimwe ciitâbiibwà to. Ngiikadilu wa mushindu awu ki wûdì, bwalu wêwè udi ngiikadilu wa Tatwêbè. Nwamonu anyi?

³³³ Cinyi? Mwoyi, tangilaayi numone padi (cyôci) mwoyi mwangaciibwe, bwa mashi. Nwamonu anyi? Mwoyi wôwô mwine mmwangaciibwe. Nwamonu anyi? Mwoyi, ki uvwa ukengediibwa, bwa mashi. Nwamonu anyi? Mashi avwa malaabiibwe, kadi mwoyi kawuvwa mwa kulwa pa mwena kwitabuuja musangu awu to, bwalu uvwa mwoyi wa nyama. Kì mmwoyi... .

³³⁴ Kadi, nwamonu's, pamutu paa muntu, civwa m’Muntu wa mutambidile, mutambidile, mutambidile. Nwamonu anyi? Nenku aci cidi civwija muntu mpindyewu kayi anu muntu patupu to, kadi mwikàle mwânà wa balume ne mwânà wa bakaji wa Nzambi, wa Mwoyi mutambidile, mutambidile, mutambidile, mutambidile, mutambidile uvwa munda Mwende Yêyè awu, wàlukila pambidi peebe wêwè, ne ùkushintulula ùkuumusha ku bu ngènzàmpèkââtù, ne ku bintu bya pa buloba, ku bu cidimba cya ekeleeziya, ne ku muyi wa mu dingumba, ùkufikisha ku mwena Kilisto mulediibwe cyakabidi, mûle tente ne Nyuma; Mwoyi wa Nzambi mwikàle anu utuuta nkoka upatuka munda mwebe, byenze bu mudi tuntolantola tudi tutuuka ku cyamu cya dituucilapu ne nsandu, paudi wenda apu, mûle tente ne ngiikadilu mulenga, ne dinanga, ne kalolo, ne padi Nyuma Mwîmpè ukwata mudimu, wàkula apu. Kaa, ekelekele! S’ki bwalu mbwôbù abu. Nenku ne (ne cinyi?) mwikàle uteeleja Mukenji, ùbandila Dikunji dya Kapya, ne ditwishiiibwa dibeneshiiibwe ne: “Ndi muumuke ku lufu muye ku Mwoyi.” Fundaayi nulame, ki bwa cinyi, kakwena dipiila nansha dya kânà to.

³³⁵ “Pîikalà myoyi yetu kayiyi yitupiisha to, dîbà adi tudi bapete dilomba dyetu adi,” nwamonu's, “tudi bamanye.” Kadi pîikalà mpekaatu munda mwa mwoyi wetu, dîbà adi ùdi utupiisha, abi's mbipiciibwe ne twêtù—twêtù katuyi nansha mene babange

to. Nwamonu anyi? Bikengela bwa wêwè kuumuka ku bupika bwa mpekaatu. Ne mushindu umwepele wûdi mwa kuumuka ku bupika bwa mpekaatu ngwa kubwela munda Mwende. Ki cibwikilu cimwepele cîdiku bwa mpekaatu ncyôci aci, n’Kilisto.

³³⁶ Vulukaayi ne, Mashi a cipungidi, Mashi a cipungidi awu kaena itabiibwa kakuyi Cimanyinu to. Kwêna mwa kukumbanaku to. Kwakukumbanaku to. Wêwè nyawu wamba ne: “Ee, mêmè—mêmè nkaadi mujidiibwe ku bintu kampanda.” Aci kî n’Cimanyinu to. N’Nyuma, kî Cimanyinu, Nyuma wa Kilisto pambidi peebe. Ucîtabùùjè!

³³⁷ Mpindyewu, tangilaayaaku, Dîyî didi ditupeesha ditwishiibwa pa bidi bitangila mulayi. Byônsò ebi mmifundu yîndi mwadije mwaba ewu. Mbyenze anu bu ne, ndi mwa kutungunuka anu ne kuyiisha dituku dijima, nwamonu’s, pa bwalu abu. Nwamonu anyi? Dîyî didi ditupeesha ditwishiibwa pa bidi bitangila mulayi, bwalu Dyôdi didi mulayi. Dîyî didi m’Mulayi awu, ne Dîyî didi Nzambi awu, ne Dîyî ndyetu—ndyetu twêtù. Ne twêtù tudi tulwa Dîyî, ne Dîyî didi dilwa twêtù. “Nwênù bashaale munda Mwanyi, ne Dîyî Dyanyi munda mwenu,” dîbà adi, nwamonu’s, cidi cilwa anu famiye umwepele munene mutambe. Nwamonu anyi? Cidi citupeesha ditwishiibwa. Bwa cinyi? Ee, ncitupa cyetu’s. Nwamonu anyi? Nwamonu anyi? Nwamonu’s, Didi dilwa citupa cyetu. Mufundu kaayipu’s we! Eyo. Ditupeesha ditwishiibwa, pa bidi bitangila mulayi.

³³⁸ Cimanyinu ncimanyishilu cya ne disumba dikaadi dyenjiibwe ne diitabiibwe. Mpindyewu, kwêna mwa kupeta cimanyinu cya mushinga wà lwendu wà njila wa kawulu paudi kuyi mufute mushinga awu to; ne mushindu umwepele uwikala mwa kufuta mushinga awu nkuwufuta. Ncya bushuwa. Cinyi? KuCiitabuuja. KuCiitaba. Ditumikila mu kaabujima ku Dîyî dyônsò dya Nzambi ki dyakupeesha bukenji bwa kupeta Cimanyinu. Ditumikila mu kaabujima! Kaciyi citupa cya Dyôdi adi mu mushindu udi dyenu dingumba diya awu to, kadi Dyôdi dyônsò. Ditumikila mu kaabujima ku Dîyî, didi diikàle Kilisto, ki didi dikubweja munda mwa Kilisto.

³³⁹ Mpindyewu ambabi tûng bu ne udi wêwè yônsò munda, kadi makàsà ebe malebelele pambelu? Ambabi tûng bu ne udi wêwè yônsò munda, kadi byanza byebe bilebelele pambelu? Citupa cinene cyetu ciikàle munda, kadi mwoyi mulebelele pambelu? Nwamonu anyi? Nwamonu anyi? Mwoyi mucîkàle mu maalu a pa buloba? Nwamonu anyi? Kadi katwena twenza nanku to.

³⁴⁰ Ditumikila mu kaabujima ne dikumbanangane, ki didi dikuvwiya wêwè ne Dîyî nulwa Umwe. Udi uDiitabuuja, kantu ne kantu. Ne Dyôdi dyônsò diikàle munda mwebe, ne wêwè utangila umona mudiDi dikwacila mudimu munda mwebe.

341 Kwêna wenda uwayawaya ne mushiki wa lukutukutu to. Wamonu anyi? Wêwè udi mwena Kilisto. Nansha cidi nî nganyi nî nganyi wamba, kaakukulengaku to. Wêwè udi munda mwa Kilisto. Udi mu dikubiibwa anu ne mwebe mwônsò.

342 Paakookola lufu ku ciibi, kalwena ne bukole to, wamonu's, nansha bwa kânà. Bwa cinyi? Cidi anu kuumuka *apa* ne kubwela Mwamwa.

343 Dikulumpa kadyena ne cididi dyamba to. Wêwè ukààdi mumane kupita bya dikulumpa abi. Ukààdi mu Cyendelele, bwalu udi munda Mwende. Yèyè ngwa Cyendelele. Kabyena ne cidibi byamba to, nansha wêwè mwânà, mukulumpe, nsonga, anyi cyônsò cyûdi aci. Wikalè mulenga kwîsù, mubi kwîsù, wa katupa, munene, anyi cinyi, kacyena ne cidici cyamba to. To.

344 Kwêna ubanga kuwayawaya, ne bintu bikwabo byônsò ebi to. Wêwè, ukààdi mumane kupita abi. Ukààdi mufwe. Mwoyi webe mmusokoka munda mwa Nzambi kupicila ku Kilisto. Udi mutwibwemu citampi kudi Nyuma Mwîmpè, wenda wendakana munda mwa Kilisto. Cintu cimwepele cyûdi wêwè umona cidi anu Kilisto. Kwajiki. Ku Cyôci aci nkaayaaci, nkûdi wendela. Kaa, ekelekele! Kabyena bikemesha to patuvwa kale wàwa twimba kaamusambu kakese aku ne:

Ujà dituku dyônsò njila wanyi ne dinanga,
Pândi ngenda ne Nkuci wa mu Dyulu apa;
Ngèndè dîbà dyônsò, mwikàle ne musambu ne
mimwemwe,
Ujà. . .

345 Ngiikale mwaneenu. Ngiikale ne nsòmbelu wa cileejilu cya cidi Kilisto mwambe ne ncivwà cikengela muntu ne cya kwikalaye aci. Ngiikale mwaneetu kudi mwaneetu wa balume, mwaneetu kudi mwaneetu wa bakaji. Ngiikale mwa—mwambi kudi bambi. Ngiikale cileejilu cya bileejilu. Ndeejeku baa pa buloba ne Dìyì edì n'Kilisto. Mushindu umwepele wûndi mwa kucyenza ngwa kubwela munda Mwende. Bwalu, ncyêna mwa kucyenza mêmè nkaayaanyi to, wêwè kwêna mwa kucyenza to. Kadi lekela Dìyì ne wêwè nulwe Umwepele, dîbà adi Dyôdi ndidi dileeja mwoyi wàdi pambelu. Wêwè udi mukanda mufundilangana wa Yesu Kilisto mwikàle wenda wendakana, pakaadiYe mumane kupeta bukontononyi mu kaabujim- . . . bukontononyi bwônsò nkòong pa wêwè, bwa kwenza Dìyì dyônsò.

346 PiikalaYe mwa kulwila *eku* ne: “Ndi muswe kwenza Eci,” kadi wêwè wamba ne: “To, to, mêmè ncyêna ngiitabuuja Aci to,” wamonu's, kwêna mwanji kwikala mu Dìyì to. Wamonu anyi?

347 Mu kaabujima, mpindyewu tangilaayi, mu kaabujima, mpindyewu, ditumikila mu kaabujima ku Dìyì dyônsò nkòong dya Nzambi ndidì dikupeesha bukenji bwa kupeta Cimanyinu.

Dìbà adi patudi tufuta, tusambila, tudi ne cya kwikala ne Cimanyinu cya kuleeja pamwe ne disambila dyetu adi.

348 Wèwè wamba ne: “Ndi nsambila, Mukalenge, kadi ncyá bushuwa ne ncyèna ne...” Ee, kwèna usambila to. Abi’s mbipiciibwe anu ne wèwè mwimanyike, wamonu’s, bwa... Anji anu kutungunuka, dyambedi, upete Cimanyinu, wamonu’s, bwalu Cimanyinu aci ki ciitabaYe. Wamonu anyi? Eyowa’s, mukalenge!

349 Patudi tusambila, dìbà adi tudi ne cya kuleeja Cimanyinu ne: “Mukalenge, nyewu ngaaKutumikidi, mu kaabujima. Ngaanyingaladi ku mpekaatu yanyi. Ndi ndyumvwa ne Wèwè udi mumfwile luse. Ndi mubatiijibwe mu Dìná dya Yesu Kilisto. Nyuma Mwímpè udi pambidi paanyi. Mpindyewu nyewu nkaadi dijinga ne cintu kampanda bwa butumbi Bwebe. Mukalenge, ndi ncilomba. Cikaadi cyanyi mèmè mpindyewu.” Dìbà adi kudi cintu kampanda cidi cyela lwongo lwà paanyima *apa* ne, “hyu-hyu,” ncyebe wèwè. Aku nkujike. Dìbà adi kwònsò nkumane kujika. Kwònsò nkumane kujika. Bwalu mbupwe. “Ndi ndomba *cikampanda*. Ki cìndi ndomba. Ndi ne cya kucipeta.” Nwamonu anyi? Nwamonu anyi? “Ndi—ndi ncikeba mbwa butumbi Bwebe.” Nwamonu anyi? Ee, kwajiki, dìbà adi Yèyè udi anu ukupeeshaci. Dìbà adi udi umanya ne ncyebe wèwè. Ki mushindu udi bi ngwòwò awu, bânà beetu balela, ne bikwabo, tudi tulaaba Mashi, tuciitabuuja. Kwajiki. Eyo.

350 CidiYe wenza ncinyi dìbà adi? Dìbà adi paudi ne, paudi mwa kuleeja Cimanyinu pamwe ne disambila dycyèbe, Cidi cileeja ne wàmanyi kufika ku ditumikila mu kaabujima dya Dìyì dyònsò dya Nzambi. Paudi mupete Cimanyinu, cidi cileeja ne udi mutumikile Dìyì dyònsò. Dìbà adi, wèwè ne Dìyì nudi cintu cimwe, udi wèwè ulomba anu cintu cyùdi wèwè aci. Nwamonu anyi? Nwamonu anyi? Dìbà adi, mona’s, udi mumanye.

351 Mèmè mwambile *eci* ne: “Wèwè cyanza, untumikile, ololoka wangate mushwala wawa!” S’cidi cyenza nanku. Nwamonu’s, cyanza cyàntùmikidi. Bwa cinyi? Cidi citupa cyanyi. Nwamonu anyi?

352 Dìbà adi paudi wèwè ne Dìyì nulwa cintu cimwe, mulayi wònsò, butumbi kudi Nzambi’s we, mulayi wònsò ngwebe wèwè. Wòwò udi ukutumikila. Dìbà adi bikengela kutangila ne cyùdi muswe kwenza ciine ncinganyi. Kwèna mufwanyine kwela cyanza cyebe mwìkù, anu bwa kwamba ne: “Monaayi mùndi ncyenza” to. Kaa, to, to! Wamonu anyi? Kadi kwòkò kwikàle cintu kampanda mwìkù amu, cidi cikèngelà bwa mèmè kwolola cyanza bwa kukwata, cyòci’s necintumikile. Nwamonu anyi? Nwamonu anyi? Ncyá bushuwa. Nwamonu’s, bikengela kutangila ne cyùdi muswe kwenza ciine ncinganyi.

353 Ki bwa cinyi Nyuma Mwímpè utu ufidiibwa ne dilobelela, ne bikwabo, nudi bamanye cìndi muswe kwamba aci, bwalu

bamwe...Kanwena baswe bwa...Musadidi mulelela wa Nzambi katu uditambisha Nende to, nudi numona's. Ki cyôci aci. Aci ndidileeja.

³⁵⁴ Patudi tusambila, tudi tuleeja Cimanyinu. Cidi cileeja ne tudi batumikile mu kaabujima.

³⁵⁵ Pòlò udi utwambila, ne: "Mashi atu akula." Aci, muntu kana yônsò ewu mmumanye ne mashi, mu bulelela, ôwò miine, kaena mwa kwakula to. Àtu mwengùngù. Ncya bushuwa anyi? Mbanganyi badi bamanye aci? Kadi mbanganyi badi bamanye ne mashi atu akula? Panwikala baswe kufunda cyôci aci, mmu Genese 4.10. Nzambi mmwambe ne: "Kadi bishi bwa mwaneenu wa balume?" Yèyè ne: "Mashi ende adi ela lubila luumukila pa buloba, akufunda." Ncya bushuwa anyi? Mashi ende adi akula. Aleluuyah! Nzambi kwamba ne: "Kadi bishi bwende yèyè?"

Yèyè kwamba ne: "Ndi mulami wa mwaneetu anyi?"

³⁵⁶ Yèyè ne: "Kadi mashi ende's adi ela lubila. Mashi ende's adi ela lubila." Ncimanyinu's. Ncimanyinu cya ne, mbamushipe. Mashi ende avwa ela lubila amufunda.

³⁵⁷ Mpindyewu, nwènù bangate cyôci aci mu Genese 4.10, pashiishe mu Ebelu 12.24, nubangaayi kubala. Mu Ebelu 10, 12.24. Mbambemu ne: "Mashi a Yesu adi akula amba bintu bîmpè kutamba a Abele."

³⁵⁸ Nwamonu's, Abele, ùvwa muntu mwakane. Wàkafwa. Wàkafwa, kayi mwenze bwalu to, anu bwalu ùvwa mu Njila. Yèyè uvwa mu Njila, mwimanyine dibuulula dilelela divwaye naadi. Wàkaakula. Àkeela lubila! Mashi a bwakane a Abele àkaakula àfunda Kaayina.

³⁵⁹ Kadi Mashi a Yesu Kilisto, kâkeela anu lubila cyanaana to, Àkapikula. Amen! "Àdi àkula àmba bintu bitambe bwîmpè." Àdi ànùvwija bânà baa balume ne baa bakaji. Àdi ànùsokoka ku cijji cikole cya Nzambi. Nwamonu anyi? Mashi a Abele kâvwa mwa kusokoka Kaayina to, nwamonu's, kadi Mashi a Yesu adi mwa kucyenza. Amen!

³⁶⁰ Pa nanku, wêwè Kaayina mukulump'ewu, patuka ulwe leelu ewu, piikalabi ne wêwè utu mukengeshi wa Dìyì, mwikàle wàmba ne: "Matuku a bishima akaadi mamane kupita. Eci Cintu cidi anu lukutukutu pa lwòlò," ne bikwabo.

³⁶¹ Àdi munkaci mwa kwela lubila, nwamonu's. Mashi a Yesu Kilisto adi ela lubila, kadi munda mwaWu mudi difwidiibwa dya luse bu wêwè anu mwa kulitaba. Mvwa mwa kujinga bwa twétu kushaalaku kabidi ndambu wa dîbà pa cyôci aci, nwamonu's: "Mashi adi akula amba bintu bitambe bwîmpè."

³⁶² Itabuuja, bwa dikubiibwa. Pashiishe laaba, wamonu's. Itabuuja bwa...Cyùdì witabuuji la ncyôci eci. Wamonu's, udi muswe dikubiibwa dyebe wêwè mwine. Udi witabuuja mbwa dikubiibwa dyebe wêwè, ne pashiishe uteeka Cimanyinu bwa

famiye mujima. Nwamonu anyi? Wêwè udi wamba ne: “Ndi mwa kwenza ciine aci mushindu kaayi?” Ikala uCinana’s! PiikalaCi cipete bwenzeji pa wêwè, dîbà adi’s wêwè ne Dîyì nudi cintu cimwe. Amen! Amen! Nwamonu anyi? Nwamonu’s, Didi dikwata mudimu bwenu nwênù bônso babidi. Wêwè ne Dîyì nudi cintu cimwe, dîbà adi Cîtèèkăku bwa bânà beebe, Cîtèèkăku bwa bananga beebe.

³⁶³ Bu mwakenza Laahaba, wàkatèèka cimanyinu bwa tatwëndè, wàkacitèèka bwa mamwëndè, wàkacitèèka bwa bânà baabo baa balume ne bânà baabo baa bakaji, ne wàkabàbweja bônso bwabo munda amu.

³⁶⁴ Û’Cîtèèkè, wamba ne: “Mukalenge, nyewu nya bwa kakeba mwanaanyi wa balume. Nyewu nya bwa kakeba mwanaanyi wa bakaji. Ndi mmunana!” “Sataana, mulekele! Ndi ndwa bwa kumukeba. Ndi nteeka Cimanyinu cyanyi, Nyuma Mwîmpè.” “Wêwè Nyuma Mwîmpè, udi musòmbèle munda mwanyi emu ewu, nkvacileku mwanaanyi wa bakaji awu. Nyewu nya kudiye mpindyewu, ne dilaabiibwa Dyebe pambidi paanyi.” Yêyè’s neàcyènzè. Amen.

³⁶⁵ Ki cyakenzabo mu Ejipitu ncyôci aci. Ki cyakenzabo mu Yeleko ncyôci aci.

³⁶⁶ Panwikala baswe kubala mukwabo kabidi, Byenzedi 16.31. Pòlò wakambila kaamanda kaa masalaayi lukama awu ne: “Itabuuja Mukenji wa dîbà edi. Itabuuja Mukalenge Yesu Kilisto, wêwè ne baa mu nzubu mwebe nenusungidiibwe.” Ncya bushuwa anyi? Itabuuja bwa baa mu nzubu mwebe, ubabweje bônso mwinshi amu. “Mpindyewu s’wamonu mudi Nzambi wa mu Dyulu mwenze cishima amu’s. Aci nkumpala kwa dilumbulwisha. Udi uciitabuuja anyi?”

“Eyowa! Cîndi mwa kwenza ncinyi?”

³⁶⁷ Kwambaye ne: “Juuka ubatiijibwe.” Pòlò kupatuka nende e kumubatiizaye, kwamba ne: “Mpindyewu itabuuja Mukalenge Yesu Kilisto, nenku wêwè ne baa mu nzubu mwebe nenusungidiibwe.”

³⁶⁸ Kwitabuuja cinyi? Kwitabuuja Mukalenge Yesu Kilisto, bwa baa mu nzubu mwebe, kuteeka Cimanyinu ku nzubu webe.

³⁶⁹ Pashiishe cyûdi wenza ncinyi paudi uCiteeka ku nzubu webe? Udi umusha bucyafu bwônso ne ubwela pambelu. Wela pambelu tuujipè twîpi twônso, ne tuputulu, ne twarta twa kunaya, ne mfwanka, ne ma-télévisions, ne bikwabo nî mbinganyi nî mbinganyi byônso, kadi kubitwa miseba kubyela pambelu, paukaadi uya bwa kuteeka Cimanyinu apu; kaCyakubitwala to. Eyowa’s, mukalenge. Úbyèlè byônso abi pambelu. Maja ônsò awu, ne ma-fêtes, ne mijiki ya bidündadünda ayi, ne bibejibeji byônso bya ciipanshi abi, ne bintu bya maalu a pa buloba abi, ubitwe miseba úbyèlè pambelu, wâmbè ne: “Tudi tukezula mwaba wônso ewu.”

370 Bu mwàkenzà Yakobo, kwambaye, kwambilaye mukajende ne bônsò abu, ne: “Sukulaayi bilàmbà byenu ne bikwabo byônsò abi. Imanshaayi tunzambi atu.” Amen. Yo- . . .

371 Nudi bamanye cyàkambà Yoshuwa kumpala kwa kusabuka ne kuyabo dyamwamwa anyi? Wàkamba ne: “Sukulaayi bilàmbà byenu; kanuseemenyi kudi bakaji beenu to, ne bikwabo, nenku nudilongolole, bwalu mu matuku asatu emu netusabuke Yadene.” Amen. Ùvwa munkaci mwa kudilongolola, ùvwa munkaci mwa kuteeka cimanyinu. Amen. Ki cyôci aci.

372 Ùdilongòlòlè. Ù’Citàkèkè. Ù’Citàbùùjè. Ùdikezùlè. Bânà beebe balela, famiye webe, bananga beebe, baCimone mu wêwè amu. Aci’s ncyà bushuwa. Neciikale ne bwenzeji. Eyowa’s, mukalenge!

373 Pashiishe uteeke Cimanyinu mu disambila, ne—ne—ne dicyangata ne mushinga, ne diciitabuuja. Ù’Citàkèkè ne dinanga dyônsò, ne bikwabo, mu mushindu wa wêwè umanya ne necyenzeke, necyenzeke. Kwajiki. Ù’Citàkèkè ne dyeyemena dyônsò, mwikàle witabuuja ne neCyambulwishe. Paudi wakula ne mwânà awu apu, paudi wakula ne bayeebe apu, paudi wakula ne mukajeebe apu, paudi wakula ne munanga webe ewu apu, ikala mwitabuuje ne neCyambulwishe. Imana wêwè anu cyanaana mwaba awu, wamba ne: “Mukalenge, ngaamanyi kubanana. Bakaadi mbaanyi mêmè. Ndi mbapeta m’Bwebe Wêwè, Mukalenge.”

374 Ù’Citàkèkè, nenku ujuule cyuyüya aci mu nyungulukilu webe, bwa bôbò abu bamateMu buludi. Nwamonu anyi? Kaa, wêwè udi, wêwè udi, pawikala ne Cimanyinu, udi ujuula nyuma kampanda mu nyungulukilu webe, bukole kampanda, bwa ne paudi wenda, bantu badi bamanya ne wêwè udi mwena Kilisto. Biikàle banange bwa wêwè kwikala ubambilaku cintu kampanda. Badi biitabuuja dîyi dyebe. Cyûdi wêwè wamba aci, bashaala bakwateku. Nwamonu anyi? Ki cyôci aci.

375 Uteeke Cimanyinu, pashiishe wikale wenda naaCi. Nanà baa mu nzubu mwebe. Udi ne cya kucyenza mpindyewu. Dîbà dya diloolo ndyôdi edi. Mpindyewu, nukaadi bateelejeteleeje kukaadi ntanta mule, mpindyewu dîbà dya diloolo ndyôdi edi. Dîbà dya kuciteeka ndyôdi edi mpindyewu. Cijji cikole necidikume, dimwe dya ku matuku adi panshi aa, dîbà ndifwanyine kwikala dikaadi dimane kupita pine apu. Nwamonu anyi? Teeka Cimanyinu, mwikàle ne dyeyemena dyônsò.

376 Panwikala baswe kubala cyôci aci, kubala cintu kampanda mwaba ewu, Mufundu wanyi wûndi mufunde bwa cyôci eci, nubale Efeso 2.12, ne panwikala baswe kucifunda. Monaayi, mu Efeso 2.12, panudi nucibala, cidi cyamba ne, twêtù katwena tukwacila byenzedi bifwe mudimu nansha, kadi tudi tukwacila Nzambi udi ne mwoyi mudimu, ku byenzedi bidì ne mwoyi.

Amen! Kaa, ekelekele! Ku byenzedi bìdi ne mwoyi, bimanyinu bìdi ne mwoyi. Nudi nwtabuuja bimanyinu bìdi ne mwoyi anyi? Kabidi, fundaayi Ebelu 9.11-14, panwikala baswe kufunda aci. Bimanyinu bìdi ne mwoyi, byenzedi bìdi ne mwoyi, teekaayi aci!

³⁷⁷ Kî ntwitabaayi mifwe ya ne: “Nênye ne mwanaayi wa balume mu ekeleeziya bwa mmone ní ùdikù mwa kushaala mwena ekeleeziya” to.

³⁷⁸ Nsongaalume kampanda mwena Kilisto kaaba aka, mulunda mulenga, nyaanaanyi wa kale, muntu wa bushuwa, yêyè—yêyè kulwaye mwaba ewu, kubatiijibwaye. Mamwëndè kwambaye ne: “Paanyi’s mvwa mwa kujinga bwa wêwè kwikalaku muye ku ekeleeziya munene mupite awu, piikalabi ne uvwa ukeba ku—kubatiijibwa.” Nwamonu anyi? Nwamonu’s, nsongaalume awu kavwaku yêyè muswe twitabaayi mifwe ne bikwabo abi to. Nwamonu anyi?

³⁷⁹ Twêtù katwena tukwacila twitabaayi mifwe ne tunzambi tufwe mudimu to. Tudi tukwacila Nzambi udi ne mwoyi mudimu Mwena Mashi àkeedibwà panshi kuntu kwaka awu, ne Cimanyinu citeekiibwe pambidi peetu twêtù, bwa twêtù peetu kwikala ne mwoyi. Amen. Eyowa’s, mukalenge!

³⁸⁰ Kukwacidiku twitabaayi kampanda mifwe mudimu to. Yôyi ayi yitu mene yivila too ne bintu bu mudi Cimanyinu eci. Yidi yamba ne: “Matuku a bishima akaadi mamane kupita. Cintu paaci ne ndibatiiza dya Nyuma Mwîmpè kacituku to.” Bwa cinyi kuya kashaala mwena cintu bu aci nanku? Nwamonu anyi? Kwenjiku nanku to.

³⁸¹ Teeka Cimanyinu, dîbà adi, “kwacilaayi Nzambi udi ne mwoyi mudimu,” bwa byenzedi bìdi ne mwoyi, bimanyinu bìdi ne mwoyi; bimanyinu bìdi byòndopà babeedi, bibiisha bafwe, bidyanjila kwamba maalu, byàkula mu myakulu, byàndamuna, musangu wònsò anu bya bushuwa menemene, byàmba ciprofeta ne cintu *kampanda* ne cintu *kansanga* nebyenzeke, bileeja bimanyinu muulu mu dyulu, ne pa buloba, bimanyinu ne maalu a kukema, amen, byàmba anu menemene cidi Bible mwambe ne necyenzeke aci. “Kwacilaayi Nzambi udi ne mwoyi mudimu,” kuteeka Cimanyinu!

³⁸² Kwikadi wâya ku ekeleeziya ayi bwa kuya kashaala mwena byenzedi bifwe ne bintu bya mushindu awu to, bwalu bôbò abu kabatu nansha biitabuuja bintu paabi ne ncimanyinu to. Kadi twêtù badi biitabuuja aba, amen, tudi bamanye ne. . . Batu bamba ne: “Cintu paaci ne ncimanyinu kacituku to. Aci, kaa, kaa, aci’s ndukutukutu’s. Bidibo bamba kuntu kwaka abi, s’ndipaala’s. Mona’s, cintu cya bu aci kacituku to. Mona’s, nwênù bakaji abu, kaa, nwênù aba—nwênù aba, mona’s, kanwena. . . Mvwadilu wenu udi ne bwalu kaayi. . .?” Kadi’s ùdi ne bwalu. Bible’s ngudi mwambe nanku. “Nsuki yenu yidi ne bwalu kaayi. . .?” Bible’s ngudi mwambe nanku.

383 Aci, atu's tùdì anu tuumaalu tùdì tùtápululangana, nwamonu's. "Kulengi, kukwaci, kulabulu." Yèyè's udi Nzambi. Nwamonu anyi? Mpindyewu, ncyá bushuwa ne cidi ne mushinga.

384 Mpindyewu, bôbò badi beela meeji ne ndipaala. Kadi bwetu twètù badi biitabuuje ne bamanye Bulelela aba, tudi bamanye ne Cidi m'Bwikadi Bwende budi ne mwoyi, bwalu Budi bwenza bintu bimwebimwe byakenza Ye pavwa Ye pa buloba apa abi. Amen.

385 "Kaa," mudibo bamba, "s'badi anu badifwanyikijila cyanaana mudibo bamona diine Dikunji dya Kapyá adi." Kaa, bwálà! Kaa, bwálà bwètù! Katwena tudifwankijilaku cintu nansha cimwe to.

386 S'baakadyambidila ne Pòlò uvwa yèyè pende mudifwanyikijileDi. Ejipitu wakeela meeji ne Izaleela uvwa mudifwanyikijileDi, kadi Dyôdi's dyakabangata kuya naabo too ne ku buloba bulaya. Eyowa's mukalenge! Katwenaku . . .

387 Ebelu 13.8, nudi bamanye's: "Yesu Kilisto udi umwèumwè awu makeelela, leelu, too ne kashidi," panwikala nufunda aci, nufunda, nwamonu's, ne: "Yèyè udi umwèumwè awu." Kî—kî ncyôcì—kî ndi . . . didifwanyikijila kampanda to.

388 Pândi mfunda eyi Mifundu yîndi mfunda apa eyi, ndi mumanye mwaba udi Mifundu ayi yisanganyiibwa, ne mushindu awu ngûndi nyaku. Nwamonu anyi?

389 Manyaayi ne m'Bwikadi Bwende budi ne mwoyi, bwalu Yèyè udi wenza cintu cimwecimwe aci mu Nyuma ewu. Mpindyewu, piikalaci cimane kabwela mu twitabaayi anyi mu dingumba kampanda, tudi tumanya ne lukasa lwôsò ne kacivwa Kilisto to. Ncyá bushuwa anyi? Mêmè munulombole mukanubweje mu twitabaayi kampanda anyi cintu kampanda, cya cyanaana, ndi mufwanyine kwikala mutumiibwe kudi dingumba kampanda. Kadi ncyèna nnutwadila maatwitabaayi to, ne ncyèna nnulongesha mangumba to. Mêmè ndi nnulongesha Dìyì dya Nzambi, dîdî diikàle bukole bwa dibiiika dya ku lufu dya Yesu Kilisto bumwèneshiibwe, kabiyi anu bwanyi mêmè to, kadi bwa yôsò udi muswe. Nwamonu anyi? Bwa nwènù . . .

390 Wèwè udi mwaneetu. Mêmè ncyèna muntu munene, ne wèwè muntu mukese to. Tudi bônso bantu bakese mu Nzambi. Nwamonu anyi? Tudi bânà Bende bakese. Katwena ne citudi bamanye to, civwà cikèngelà bulelela bwa twètù kumanya aci. Yèyè udi utufikisha ku dimanya bilondeshile mudiYe muswe Yèyè amu, ne twètù tudi ne kusakidila kudiYe bwa bitudi bulelela bamanye pa bidi bitangila mabenesha Ende. Ne ncyèna ndyabanyina cyôcì eci bu cyanyi mêmè nkaayaanyi to; ndi muswe kucyabanyangana neenu. Nwamonu anyi? Ndi muswe bwa nubweleMù, ne ndi muswe bwa nwènù kupeta Cimanyinu eci. Ne pawikala kuyi mucyènzè to . . . Bààbûngì baa kunudi,

ciibûngî cyenu, bakaadi bamane kucyenza. Kadi piikalà bamwe baa kunudi kabayi bacyênzè to . . .

³⁹¹ Nwamonu's, ndi ngaakwila kabidi pa mukaba wa mêyi, apa, nudi bumvwe's. Ne byâbûngî byaci . . . Nenku ncyêna ngamba nwaba ewu mu ekeleeziya emu to; tudi bônso bapatuke, ngeela meeji. Kadi nekwikale pâmwâpa binunu kuvudija ku binunu biikalà mwa kuumvwa mukaba wa mêyi ewu, nwamonu's. Nenku, ciine aci, cidi mmudimu wa bwambi. Nekwikaleku anu muntu kampana wadifinda kadi kubwela mu Yeleko, nudi bamanye's, ne mukaba wa mêyi, pa nanku tudi baswe—tudi baswe kubakula Dimiinu didyânjila kulongolola adi paayawu mwômô amu, nwamonu's, bwalu cijji cikole cilwalwa.

³⁹² Manyaayi ne m'Bwikadi bwa Nzambi udi ne mwoyi, bwikàle bujaadika ne Nzambi mmuMujuule ku lufu bilondeshile Dîyi Dyende dilaya. “Mu mutanci mukese emu baa pa buloba kabaakuMmona kabidi to. Yeleko, Ejipitu, kabaakuMmona kabidi to. Kadi nwênù nenuMmone, bwalu Mêmè . . .” “Mêmè,” mupinganyi muleeji muntu, ngutubo anu baleedila misangu yônso, nwamonu's. “Mêmè nêngiikalè neenu. Mêmè ndi Cimanyinu aci. Dibiika Dyanyi dya ku lufu n'Cimanyinu aci. Byenzedi bîndi Mêmè ngenza mbyànùmanyishà nwênù, mbyâMmanyishà munda mwenu.”

³⁹³ “Anu mwakadibi mu matuku a—a Lota, ki mwikalabi kabidi ku dilwa dya Mwânà wa muntu, paapatuka Mukenji wa ib'a muloolo.”

³⁹⁴ “Bwalu nekwikale Bukênkè lwà pa dîbà dya diloolo. Anu lwà pa dîbà dya diloolo menemene apu, Bukênkè nebulwe.” Kaa, butumbi kudi Nzambi's we! Bidi bingenza ndyumvwa anu bu mufwanyine kukutula anu lubilu kupicila munkaci mwa cisumbu cya masalaayi kadi kutupikila pamutu paa cimano. Nwamonu anyi? Nwamonu anyi? “Nekwikale Bukênkè lwà pa dîbà dya diloolo.” Ncya bushuwa. Muprofeta ngwâkamba nanku awu.

³⁹⁵ “Ne Mêmè nêngiikalè neenu. Nêngiikalè mu cikondo cya Luther; Nêngiikalè mu cikondo cya ba-Wesléyens; Nêngiikalè mu cikondo cya beena Mpenta; kadi anu pa dîbà dya diloolo menemene apu, nekulwe Bukênkè.” Bya cyena mangumba abi nebijimine, ne dîbà adi Cimanyinu neciteekiibwe. Nenku bônso badi ne meeji matooke mu myoyi yabo aba, mwine mwônso amu, nwênù aba kanuyiku—kanuyiku to bôbô kabaakuvwijiibwaku—kabaakuvwijiibwaku bapwangane to. Kadi mu nwênù amu . . .

³⁹⁶ Bidi anu mudibi ne bidi bikengela bwa mutu kuyawu, bwa kwangata dikàsà. Bikengela bwa mutu kuyawu, bwa kwangata cyanza. Bikengela bwa mutu kuyawu, bwa kwangata mwoyi. Bikengela bwa mutu kuyawu, bwa kwangata mukana. Nwamonu's, bikengela bwa mutu kuyawu.

397 Nénku mpindyewu tudi mu cikondo civwa cimanyinu cilaabiibwe pa mukamba wa ciibi, nwamonu's, ne ku makunji. "Nénku díbà adi pânGààmònà mashi, miikàle cimanyinu, Nèmpicilè pamutu peenu."

398 Nèndwijakajè mpindyewu, lukasa ne mwanyi mwònsò mpindyewu. Anu tusunsa tukwabo tutwe ku tutaanu cyanaana, anyi dikumi, netwikale bajikije.

399 Cidi cijaadika ne Nzambi mmuMujuule ku bafwe. Nudi nuciitabuuja anyi? Yèyè udi ne mwoyi munkaci mwetu leelu ewu. Ne "Mémè" awu n'Kilisto. Ne "Mémè" awu udi neetu too ne ku ndekeelu wa. . . aci cidi cyamba ne *dikumbana dya maalu ónsò*, cidi ciswa kwamba ne, "nshiikidilu wa buloba." "Mémè nèngìikalèku too ne ku nshiikidilu wa buloba," bilondeshile Diyì Dyende dilaya. Yèyè ngwàkacilaya. "Ne byenzedi bìndì Mémè ngenza nenùbyènzè peenu." Kacyena lukutukutu kutudi twètù to. N'Cimanyinu. N'Cimanyinu aci.

400 Twètù tudi twitaba mulambu munsantu wa Mashi ewu. Tudi twitaba Mashi Ende malambula, pashiishe matupeeshe. . . Yèyè udi utupeesha Mwoyi, Cimanyinu awu, citampi cya mulayi Wende. Efeso 4.30, mmwambe ne: "Kanubungamiji mashi" anyi? To. "Kanubungamiji Nyuma Mwímpè to, unudi. . ." [Disangisha didi dyamba ne: "Batwibwe citampi."—Muf.] "Batèèkiibwe mwinshi mwa cipungidi, batèèkiibwe ku luseke." Nwènù nudi batèèkiibwe mwinshi mwa cipungidi. Ki munùdi batèèkiibwe. Cimanyinu, Nyuma Mwímpè, neikale Citampi. Padi cintu kampanda cikangila munda mwa citampi, kudidingiku wacikangula to. Kwèna mwa kucikangulaku to, wèwè, bwa Citampi cya Nzambi aci to. To. Nwamonu anyi? Bwalu nwènù nudi. . . "Kanubungamiji Nyuma Mwímpè wa Nzambi to, unudi batwibwe nende citampi too ne ku dituku dya bupikudi bwenu," piikalà mubidi mubiishiibwe ku lufu.

401 Ndimiinu, cimanyishilu cya ne dimiinu ndiimicishiibwe ne Mwoyi wa Cyendeleele, "Zoe, 'Mwoyi Wanyi Mémè mwine,' ne Mémè nèndibiishè cyakabidi ku lufu ku dituku dya ndekeelu." Nénku paudi wenda apu, udi ne dyeyemena dya ne Mwoyi wa Kilisto udi munda mwebe amu, ne wèwè udi munda Mwende Yèyè. "Ku Nyuma umwe nkutudi bònsò babatijiibwe mu Mubidi umwe, ne batwibwemu citampi kudi Nyuma Mwímpè," munkaci mwa beena kwitabuuja aba mushindu ewu, "too ne ku dituku dyatubiisha Yesu ku lufu." Kaa, ekelekele! Teeka Cimanyinu. Cyòci aci ki cidici cyumvwija bwetu twètù. Tudi bindile bwa Mulambu ewu utupeeshe Mwoyi, ne Wówò udi utupeesha. Díbà adi Wówò udi utupeesha Cimanyinu, ne twètù tudi tuteeka Cimanyinu, cidi ciikàle Citampi too ne. . . Biikàle—biikàle baabanyanganyi baa Cyòci eci, ncintu bunene kaayipu's we, biikàle baabanyanganyi, babatijiibwe ne Nyuma umwe ewu, mu awu Mubidi musok-. . . udi mufwikakaja awu.

402 Ndi mwambe mwaku aku bîmpè anyi, *mufwikakaja*? Musokome, Mubidi musokome, Mubidi musokome wa Yesu Kilisto. Nwamonu's, Nyuma Mwîmpè wămbi ne: "Udi munkaci mwa kucyamba bibi." Cintuntu bu mêmè ewu's, kadi Yêyè wămbi ne: "Udi munkaci mwa kucyamba bibi," pângăcibiikidi ne, "*mufwikakaja*" apu, paaci's mMubidi musokome wa Yesu Kilisto, nwamonu's, Mubidi musokome wa Yesu Kilisto. Mêmè ncyêna... Kabyena bitukengela dilonga dya tulaasa to; bidi bitukengela Nyuma Mwîmpè. Yêyè ki Udi utukengela. Nwamonu anyi? Yêyè ki Udi utukengela. Eyowa, nwamonu's, civwa... ncifwanyine kwikala cilendwishangane mwaba kampanda, mulongeshanganyi kampanda, mpindyewu ndi ntekemena ne mmucyûmwè bîmpè. Mubidi musokome! Neciikale cyenzeke mu kiipacila kampanda, bwalu nunku Yêyè kî mmucyâmbè to. Nwamonu anyi? Yêyè udi kaaba aka mene mpindyewu. Yêyè udi kaaba aka mene ku cyambilu eku. Yêyè udi kunudi aku mene. N'Yêyè. Nwamonu anyi? Yoyôyô!

403 Ne munda Mwende kamwena lufu to. Munda Mwende kamwena tunyinganyinga to. Munda Mwende kamwena maalu matonde to. Munda Mwende kamwena mpekaatu to. Munda Mwende kamwena disaamà to. Munda Mwende kamwena lufu to. Twêtù tudi munda Mwende! Sataana yêyè uteeta bwa kukupeesha cintu kampanda, bu mudi disaamà, angata wêwè anu Cimanyinu cyebe uCiteeke. Kaa, ekelekele! Angata wêwè anu Cimanyinu cyebe uCiteeke ne, wêwè udi cintu cisumba kudi Yesu Kilisto. Cimanyinu ncileejilu cya ne mushinga webe wa lwendu mmumana kufuta.

Yêyè udi wamba ne: "Paudi ufwa, udi mujimine."

404 Wêwè amba ne: "Udi mwambe cya cyanaana. Mêmè ndi ne cintu cimana kusumba. Mêmè ndi cintu cimana kusumba. Ndi ne Cimanyinu."

"Cimanyinu ncinyi's?"

405 Yêyè's mmumanye cidîCi. Kudidingi, kudidingi wakutakananganaku nende to. Yêyè awu mmumanye cidîCi. Mpindyewu, wêwè udi mufwanyine kwakula ne bamwe baa ku bayiishi aba, ne bôbò bafwanyine kukokangana neebe. Kadi kî n'Sataana yêyè to; yêyè mmumanye cidi bulelela. Nwamonu anyi? Kaa, eyowa's. Yêyè's wakalwa bwa kucilwisha, misangu yibidi anyi yisatu, nudi bamanye's, kadi mutupakane's, musangu wa diteeta awu. Sataana mmumanye cyûdi wêwè wamba aci. Leeja wêwè anu Cimanyinu aci, yêyè neaye lubilu. Eyowa's.

406 Bwalu, ncinyi ciine aci? Ncintu citwa citampi. Yêyè kêna mwa kucikangula, bwa kufila cintu kampanda muntwamu cidî kaciyi cilelela to. Amba wêwè ne: "Umusha byanza byebe kwaka wê! Mêmè ndi mutwa citampi." Kaa, ekelekele! Cintu citwa citampi! Eyowa's, mukalenge! Ukàadi musûmbiibwe. Ikalâ mukwate Cimanyinu cyebe aci citeekela pa diitabuuja

dyebe didi kadiyi dinyunga adi pa mulayi Wende apu, kadi mone muyaayaye. “Disambila dya bwenzeji dya kapa dya muntu mwakane didi ne musinga wàbûngì!” Nwamonu anyi? Nwamonu anyi? Angata Cimayinu aci. Ki mudimu waCi ngwôwô awu. Sataana udiku mbwa kukuteeta.

Yêyè’s uvwa mu Ejipitu, bwa kuteeta.

⁴⁰⁷ Mona’s, nudi bamanye’s, dituku dyakateeka Laahaba ndumba awu. . . Ndumba awu dyakalebelejaye mwonji awu adi, mwonji awu, ndi ndifwanyikijila ne amwe a ku masalaayi awu akaseka ne akacyelulwila, kwamba ne: “Mukaji mupâle wa kale udi kuulu kwaka wawa! Mutu’s wamunyunguluku. Monaayi anu bwalu, cidieye naaci munda mwamwa cyacya. Ha, ha, ha! Mona’s, kacyakacya nukaadiku peenu bumvwe cya nanku kwêpi? Mona’s, Docteur Jones lwà kuntweku, mmwambe ne: ‘Kacyena ne bwa nsongo to.’” Kadi’s civwaku, bwalu musanjeela wa kudi Nzambi ngwâkatwâla mukenji e kubambilaye.

⁴⁰⁸ Nudiku mwa kudifwanyikijila beena Ejipitu bamba ne: “Mbimweneke anu bu ne. . . Twânjibi kwamba, tangilaayi anu peenu wawa musumbâ wa bapâle babunguluki baa mu malaba baba, balaaba mashi! Ha, ha! Amba tûng mwabengabo kupeta bûcyafû, pa kusukulabo ciine cyacya mpindyewu! Kaa, ekelekele! Nzubu mine minene yaya ya bwalu bulengayi naka kadi milaabakaja yônsò ne mashi! Kaa, mpuuya mubole kaayi’s we! Kadi nêndye neebe lupiku ní kacyakushaala cyenze ne bwôwâ mu matuku makeke aa. Kacyakwikala ne cidici cyumvwija to. Nudi bamanye ne mbwa cinyi? Taatù wa bunsantu *Kampanda* ngudi mwambe nanku.” Kadi’s civwaku. S’civwa ne civwaci cyumvwija. Ncyâ bushuwa ne civwa ne civwaci cyumvwija.

⁴⁰⁹ Ncyâ bushuwa ne cidi ne cidici cyumvwija bwetu twêtù badi biitabuuja. Nwamonu anyi? Vuluka wêwè anu diitabuuja dyebe didi kadiyi dinyunga dyûdi naadi mu Dîyi edi adi! Mpindyewu, kûcyenà Eva kabidi to. Nwamonu anyi? Kwèna umwe wa ku beena mpatà aba to, ne, ee, badi badya cibanga kumpala kwa Sataana aba. Shaala wêwè anu kacya wâlama Dîyi dyônsò dya Nzambi. Nwamonu anyi?

Eva wakamba ne: “Ee, s’ki mudi Mukalenge mwambe!”

⁴¹⁰ Sataana kwambaye ne: “Kadi, udi mumanye’s, ncyâ bushuwa ne Mukalenge kaakwenzelaku muntu mulenga bu wêwè ewu cintu bu nanku to. Kaa, wêwè’s udi mulenga wa dikema. Yêyè kí mmufwanyineku kucyenza to.” Kaa, eyowa’s, Yêyè’s neâcyênzè anu kucyenza. Yêyè ngudi mwambe ne Neâcyênzè.

⁴¹¹ “Ee, tatwânysi’s uvwa mwambi. Mêmè mwine ewu’s ntu mwambi.” Ncyêna—ncyêna paanyi ne cya dyambapu to. Kwôkò kakuyi Cimanyinu to, udi mujimine. Ciiji cikole aci’s cidi pambidi peebe, wamonu’s, ki cyônsò cidiku ncyôci aci, padiku kakuyi Cimanyinu. Nwamonu anyi? Eyowa. Yêyè mmwambe ne

Neàcyènzè, ne Yèyè neàcyènzè. Aci, aci's ncyumbe cikose bwalu. Yèyè ngudi wamba ne Neàcyènzè.

“Kaa, mèmè ndi ngiitabuuja ne matuku a bishima . . .”

412 Eyowa, kadi Yèyè mmwambe ne kî mmajike to. “Mèmè ndi umwèumwè awu makeelela, leelu, too ne kashidi,” nwamonu's, anu cyôci aci ncidiYe ujaadika ne ki cididiYe.

413 Mpindyewu, bwetu twètù, tudi bacimanye. Bwabo bôbò, kabeena baCiitabuuja to. Kadi twètù kaayi tudi tuCiitabuuja. Tudi bamanye ne m'Bulelela. Nwamonu anyi?

414 Mpindyewu, mu kwikala mu cyôci aci, tudi tulwa citupa cya Dîyî. Nenuk dîbà adi angata Cimanyinu, Nyuma, pa mulayi wa ne: “Mèmè ndi Mukalenge udi ukwondopa.”

415 Mpindyewu dilongòlòlaku bwa mudimu wa dyondopa wa diloolo edi. Nwamonu anyi? Angata Cimanyinu, uCilembelejile pamutu paa Dîyî apu, pa diitabuuja dyebe didi kadiyi dinyunga mu Dîyî adi adi, neupatuke. Mpindyewu, Aci—Aci ki cintu cididi cimwela pambelu, bwalu munda Mwende Yèyè kamwena bya nanku to.

416 Mwawa mwa kujingaku kufila majaaniki ndambu mpindyewu, a bintu kampanda bindiku mumone byenzeke anu mu mbingu mikese mishaaale eyi. Nwamonu anyi? Nwamonu anyi? Kaa, cîndi mene mufwanyine kufidila bujaadiki's we!

417 Nudi bamanye's, ne Luuka mmwambe ne: “Bu byônsò byàkenzà Yesu mwa kufundiibwa mu mikanda, ya . . . kakuwwa mikanda bûngi bukumbane pa buloba bwa kubifundabo to.”

418 Anu bindi mumone mu mudimu wanyi mèmè mwine wa bwambi nkaayaabi, bindi mumone Yèyè mwenze, kanwenaku bafwanyine kwambakaja mishiki ya mikanda ya bibungu pa cibumba cya ku cyambilu eci to. Bu mèmè mwa kufunda ku kantu ku kantu bindi mumone Yèyè mwenze anu mu mudimu wanyi mèmè mwine wa bwambi nkaayaawu, bindi mumone Yèyè mwenze. Nwamonu anyi? Yèyè mmutuute dyakalenga mu mudimu wanyi mèmè wa bwambi kupita mwakadituutaYe mu Wende Yèyè mwine. Eci ncilelela. Eci ndikwata dya pa mikaba ya môyi. Mpindyewu, vulukaayi ne, Yèyè ngudi mutuute dyakalenga adi mpindyewu awu, kî mmèmè to; n'Yèyè. Butumbi's we! Aleluuyah!

419 Yèyè mmutuute dyakalenga mu Jeffersonville kutamba mwakadituutaYe mu Nazaleeta. Wakenza mu cimenga cya beena lwonji aci ne mu cimenga cya beena lwonji eci. Amen! Butumbi's we! Bwalu: “Yèyè kaakapetaku mushindu wa kwenza bishima muntwamu to,” kadi Yèyè mmupete mushindu awu muneemu. Ndekeelu wa byônsò Yèyè wâjikululu ngoma's, muneemu. Bwa muneemu kaayi Yèyè wafiki ku dicyenza. Nansha muvwaYe mufwanyine kwikala mwenzejiibwe bwa kutwala bantu buumukila ku myaba ya cyanaana, kadi Yèyè—

Yèyè mmufike anu ku dicyenza, nansha bishi. Pa nanku, Yèyè mmutuute dyakalenga muneemu emu kutamba ne muvwaYe mwenze mu—mu Kaapenuma anyi—anyi mu Nazaleeta amu, mu cyôci aci. Mmwenze bishima muneemu mu tabernacle ewu bûngi bupite byakenzaYe mu mudimu Wende mujima wa bwambi pa buloba apa. Ncya bushuwa ne, ncidiYe mwenze. Kadi twämbè bishi bwa myaba mikwabo ya pa buloba? Kaa, ekelekele! Mpindyewu aci's ncidiYe mwenze.

⁴²⁰ Mpindyewu nwavulukaaayi ne, “Yèyè” ngudi mwenze. Mpindyewu, kacya kabituku byambiibwe ne mèmè ngutu mucyènzè to, nwamonu's, bwälà bwanyi, bwalu kî mmèmè udi mucyènzè to. Ncyeña mucyènzèku mèmè to. Mèmè mvwa anu muMunange cyanaana ne mudilekelele kudiYe, ngamba civwaYe Yèyè wamba, ne Nyuma Mwîmpè uya kudi bakwabo bantu ne bôbô abu biitabuuja civwaYe wamba aci, ne dîbà adi Yèyè wenza cyenzedi. Ki cyônso cîdiku ncyôci aci.

⁴²¹ Yèyè wikalapu nanshà mwa kutufikisha twètù bônso aba ku diitabuuja's! CivwaYe mufwanyine kwenza mpindyewu ncinyi bu Yèyè mwa kutufikishaku twètù bônso aba ku diciitabuuja mpindyewu mene, s'mmwômò's? Nunku kî nkufwanyineku kwikala muntu nansha umwe ne butekete mu nyungulukilu mwônso mwa cimenga emu to. Ncya bushuwa. Bu Yèyè mwa kufikishaku bantu bônso ku diciitabuuja, nunku byônso's mbifwanyine kujika. Nwamonu anyi?

⁴²² Ikala mulame Cimanyinu cyebe pamutu paa diitabuuja dyebe didi kadiyi mwa kunyungishiibwa adi mu Dîyi Dyende dilaya, nenku Sataana neaye.

Mpindyewu nkaadi njikija mpindyewu.

⁴²³ Musangu kampana Nzambi wakapeesha baa pa buloba cimanyinu cikwabo; civwa mmwanzankongolo. Nudi bavuluke aci anyi? Misangu yônso, Yèyè utu misangu yônso mushaale anu ne lulamatu ku cimanyinu aci, bwalu Yèyè wakawufila bu cimanyinu. Binunu byônso bya bidimu ebi, Yèyè katuku mupangile bwa kuleeja patooke cimanyinu aci to. Ncya bushuwa anyi? Bwa cinyi? Udi ucitwa mushinga. Yèyè ngwâkacifila. Wâkapèesha baa pa buloba cimanyinu cya ne Yèyè kavwaku mwa kubutula kabidi buloba ku mâyi to. Nunku Yèyè misangu yônso, misangu yônso, kubangila anu ku dituku adi, utu anu mucileelejeje patooke.

⁴²⁴ Kudi tuubintu kampana mu lupeepele emu, tûdî twènza mwanzankongolo awu. Padi mvula uloka, ne dîbà dipatuka, aci cidî ciwuleeja. Dîbà didi dyumisha mvula awu, pa nanku Yèyè wakateeka mwanzankongolo mwaba awu bwa kujaadika ne kakwakumataku mâyi bûngi bukumbane pa buloba adi mwa kububutula cyakabidi to. Ki cipungidi Cyende ncyôci aci. Ncimanyinu. Yèyè wakamba ne: “Nènnûpèeshèci bu cimanyinu.”

425 Yèyè utu mutwe cimanyinu Cyende aci mushinga. Wàkatwà cimanyinu Cyende aci mushinga mu matuku a Noa. Yèyè ucitu anu ucileeja. Wàkatwà cimanyinu Cyende mushinga mu Ejipitu. Wàkacitwa mushinga mu Yeleko. Yèyè udi uCitwa mushinga leelu ewu. Ùtu misangu yònsò anu utwa cimanyinu Cyende mushinga padici cileejilbwa patooke.

426 Binunu byònsò bya bidimu ebi, Yèyè utu munange kuleeja cimanyinu aci. Katu ucipwaku mwoyi to. Katu upwa mwoyi cimanyinu Cyende to. Mpindyewu, nansha buloba mwa kwikala bushintuluka munyi, mwanzankongolo uciidi wòwò anuku. Nwamonu's, Yèyè udi utwa cimanyinu mushinga.

427 Ki mudiYe wenza kabidi patudi twakulangana apa, Yèyè udi utwa Cimanyinu Cyende mushinga. Nansha ekeleeziya ushintuluka munyi, nansha yèyè wenza *cikampanda*; Nzambi ucitu anu utwa Cimanyinu Cyende mushinga, anu cyòcì nkaayaaci. Bidi bituleeja ne Yèyè katuku upangila bwa kutwa mushinga bidiYe wenza ne bidiYe wamba to. Twètù tudi twitaba, tudi—tudi tuneemeka Cyòcì aci. Ntu mèmè ngenza nanku.

428 Yèyè mmuswe bwa twètù peetu kuleeja patooke Cimanyinu Cyende kumutu kwa diitabuuja dyetu, kudi Sataana ne tusumbu twende twònsò twa ntendeleelu twa bupidya ne mangumba, bwa ne tudi twitabuuja ne mulayi Wende mmulelela, ne Yèyè neenzè cidiYe mulaye bwa kwenza. Ki Ekeleeziya nyèyè awu.

429 Kabyena bikemesha to padibo kabayi mwa kufika ku ditumba dya ntwadijilu pambelu pààpa, mutudi tucibiikila; mfwilaayiku luse bwa dîyì adi. Kabyena bikemesha to padibo kabayi ne kudibo bakafika kadi baalukila ku dingumba bakenza musùmbà wa bantu bavwale ne ku mènù, baa mvwadilu wa kapelu, baa mamanya a mu mitu, balonge tulaasa. Kabayiku ne kudibo bakafika to, bwalu aci ki cidibo baleejangana ne: “Mèmè ndi Méthodiste. Ndi Presbytérien.” Ki cyònsò cidibo paabo ncyòcì aci.

430 Kadi beena kwitabuuja badi bangata Cimanyinu! Ne civwa Yesu mubange kwenza mu Ngalela aci, ki cidiYe mutungunuke ne kwenza mpindyewu ku dileeja Dyende dya patooke dya Cimanyinu, cya Nyuma Mwîmpè udi mwalukile pa Ekeleeziya. Bwalu, kacivwa byenzedi bya bapostolo to, civwa mbyenzedi bya Nyuma Mwîmpè munda mwa bapostolo, ne ciine aci civwa n' Cimanyinu.

431 Baakamba ne bivwa bikengela kuteya ntema kudi Peetelo ne Yakobo, pavwabo. . . Peetelo ne Yone, pavwabo babwelela ku ciibi civwabo babiikila ne Cilenga apu, bamòne ne bavwa binyonga. Bavwa bafwanyine kwikala bambe ne: “Hit, hain't, tote, tarry, fetch, carry. Nènkwambilè *cikampanda*.” Nwamonu anyi? Bavwa bafwanyine kwikala ne mwakulu wa mishindu yònsò uvwabo bòbò kabayiku mwa kuumvwa to. Bavwa bafwanyine kwikala kabayi bamanye dishiilangana to, byònsò

bya—bya...byònsò bya makumi a mu Mifundu abi. Kadi byakakengela kujingululabo ne bôbò bavwa ne Yesu. Bavwa mwa kuleeja Cimanyinu aci patooke, bwalu Nyuma umwèumwè uvwa pambidi Pende Yèyè, kumpala kwa dipoopediibwa Dyende dya pa nkuruse awu, ùvwa pambidi paabo paanyima paa dibiika dya ku lufu. Amen!

⁴³² Dìbà adi aci cidì ciMuvwija Ebelu 13.8 ne: “Yesu Kilisto umwèumwè awu makeelela, leelu, too ne kashidi.” Mushindu awu ngutudi twètù tumanya ne Yèyè udi ne mwoyi. Bwa cinyi? Tudi tumanya munyi ne twètù tudi ne mwoyi? Mbwalu Yèyè udi ne mwoyi. Nenku bwalu tudi bamanye ne twètù tudi ne mwoyi, mbwalu tudi bafwanangane Nende, ne tudi munda Mwende. Ne Yèyè wakamba ne: “Bwalu Mémè ndi ne mwoyi, nudi peenu ne mwoyi. Mémè ndi Yèyè awu,” mu Bwakabuulwibwa’s, “uvwa mufwe awu, ne udi ne mwoyi bwa kashidi ne kashidi.” Nenku twètù—twètù bafwe ku twètù biine ne balwe ne mwoyi munda Mwende, tudi ne mwoyi bwa kashidi ne kashidi. Nenku dìbà adi Mwoyi Wende munda mwetu udi anu mudi mwoyi wa cintu cikwabo kana cyònsò eci, Ùdi ùleeja patooke ciwvaYe Yèyè aci. Nenku aci ncidì ciMuvwija umwèumwè awu makeelela, leelu, too ne kashidi.

⁴³³ Mpindyewu mmunyi mudibi mwa kwenzeka bwenu nwênù, padibo bavila Cyôci aci? Kanwenaayiku numona, “byenzedi bifwe” anyi? Kwacilaayi Nzambi udi ne mwoyi mudimu, ku cya Cyendelele. . . Ndi njinga kwamba ne, cipungidi cya kashidi cya Mwoyi uvwa munda mwa Mashi a Yesu Kilisto. Mpindyewu ngenda ntungunuka, bwa kujikija, ndi. . . Ee, ngeela meeji ne, netwikale anu ne cya kwimanyika. Nwamonu’s, dileeja dya patooke dya Cimanyinu cya ngàsà Wende, dinganga Dyende! Mpindyewu, kakuyi Cimanyinu eci citeekiibwe to. . .

⁴³⁴ Mpindyewu, n’Cimanyinu. Cimanyinu ncinganyi? Cimanyinu ncimanyishilu cya ne dibanza ndimana kufuta. Mushinga ùvwa mulomba ukaadi mumana kufuta. Mushinga wa lupandu lwetu uvwa ndufu, nwamonu’s, nenku muntu nansha umwe kavwaku mwa kuwufuta to pa kuumusha Kilisto. Nenku kacyi nyu—nyuma wa dingumba kampanda to, kacyi nyuma wa paapà kampanda to, kacyi nyuma wa muntu kampanda anyi wa munsantu kampanda to; kadi Nyuma wa Yesu Kilisto, pa Ekeleeziya, n’Cimanyinu cya ne dibanza ndimana kufuta ne Yèyè mmukumbaje dilomba ne dilomba dyònsò divwa Nzambi mulombe adi, nenku twètù ne Yèyè tudi cintu cimwe. “Mu dituku adi, nenumanye ne Mémè ndi munda mwa Taatù, Taatù munda Mwanyi; Mémè munda mwenu, ne nwênù munda Mwanyi.”

⁴³⁵ Teekaayi Cimanyinu! Teekaayi Cimanyinu cya dibiika Dyende dya ku lufu. Cya ne, bwalu Yèyè wakabiishiibwa bwa dibingishiibwa dyetu, Yèyè mmutubiishe peetu pamwe Nende. Ne mpindyewu tudi basòmbe mu myaba ya mu Dyulu, mu Yesu Kilisto, mwinshi mwa bwobumwe bwa Cimanyinu.

436 Pavwa Izaleela musòmbè mwaba awu, ne mikunda yediibwa, pambelu mu mùsèsù apu, bôbò kabavwaku ne cintu nansha cimwepele cya kuditacishila to. Cintu cimwepele, anu kwikala batwishiibwe ne mashi, cimanyinu, avwa mamweneke.

437 Ki cintu cimwepele ncyôci aci citudi mwa kuditacishila patudi twakulangana apa. Kudi lutatu mu—mu njila, lùvuma's, balunda baanyi. Kakwakunengaku to, lutatu neludikume. Aci nudi bamanye. Ikala mutwisiibwe ne Cimanyinu ncimweneke. Ne Cimanyinu n'Nyuma Mwîmpè. “Bwalu ku Nyuma umwe nkutudi bônso babatijiibwe mu Mubidi umwe, ne bavwijiiibwe baabanyanganyi baa butumbi Bwende,” pa Buloba bwetu, Kwetu, twenda tuya mpindyewu batangile ku Buloba bulaya.

438 Nudi baMunange anyi? [Disangisha didi dyamba ne: “Amen.”—Muf.] Nudi nwitabuujja Cimanyinu aci anyi? [“Amen.”] Mbanganyi badiku baswe kwamba ne: “Kaa, Mwaneetu Branham, unsambidileku, bwa ndwe mwinshi mwa Cimanyinu eci”? [“Amen.”]

Twinyikaayaaku mitu yetu.

439 Mukalenge Yesu, Mutambe kwikala Wa Ngàsà awu! Pavwa baa pa buloba mu mpekaatu, ne muntu nansha umwe kayiku mwa kukwacishangana apu, Nzambi, mu luse, mwikàle udyanjila kuleeja, ku cimfwanyi, cya ne kuvwa kulwa Cimanyinu kampanda civwà mwa kuumusha mpekaatu; kacyi anu kumubwikila cyanaana to, kadi ciikàle mwa kuumumusha. Ki Yesu kulwa dîbà anu pa dyôdi, ne kwelaYe Mashi panshi, Mwoyi Wende Yêyè mwine, wàngata . . . ùtwènzela difuta dya cibawu bwa mpekaatu yetu, ne pashiishe uMwaluja mu mmwenekelu wa Nyuma Mwîmpè, udi mpindyewu Cimanyinu cidid cikengela bwa kulamiibwa kudi Ekeleeziya too ne paalwaYe. Bwalu Mupostolo Peetelo wakamba ne: “Mulayi udi kunudi nwènù, ne kudi bânà beenu balela, ne kudi aba badi kule, mu bûngi bwônso bwabiikila Mukalenge Nzambi wetu abu.”

440 Mukalenge, ku ngàsà Webe, ku dikwacisha Dyebe, ndi nnana ewu yônso udi uteeleja Mukenji ewu. Ndi mbananyina Nzambi, ndi nKulomba, Mukalenge, ne apa mu dinda emu ne bônso baatelejiya pa mukaba wa mêtî abu. Nenku kwôkò kwikàleku Dimiinu mwaba kampanda, didi didyànjiya kulongolola adi, Mukalenge, bwa kuumvwa Dîyî dya dituku dya ndekeelu edi, swaku bwa alwe mpindyewu, ne kalolo ne kudipwekesha kwônso, ateeke bitadi byende bya bucimunyi panshi ku nkuruse, anyi yêyè mwine, bu citadi cya bucimunyi cya ngàsà wa Nzambi udi mumubiikile awu. Nenku swaku bwa yêyè ujiibwe tente ne Nyuma Mwîmpè ne aleeje patooke Cimanyinu cya Mwoyi wa Yesu Kilisto mu dibiishiibwa Dyende dya ku lufu, piikalaye ucidi mushaale panu pa buloba apa. Enzaku nanku, Mukalenge.

441 Mêtî aa, Mukalenge, ndi mufwanyine kwikala nciyi muÂmbè mu mushindu mujaalame to. Ne pângiikalà nciyi

muãbè mu mushindu mujaalame to, ndi ndomba bwa Nyuma Mwimpè angateku Mèyi awu àÀfilè mu mushindu uvwabi bikengela bwa kufidiibwaWu, bwa bantu kuumvwabo ne kumanyabo, kakuyi budimu to. Nenku bamanyeku ne dinanga ditu dilongolola bilema. Ne bwa kumanyabo ne mbwa dîbà ditudi ne mwoyi, ne bwa dilwa dya Mukalenge dikaadi diseemene, ne tudi tumona makênkè makunze manene apodya, pa buloba bujima, bwa ne cikondo cikaadi pabwîpi.

⁴⁴² Swaku bwa bantu bapete Nyuma Mwimpè leelu ewu! Ndi ndomba, ne mbafila Kûdi Wêwè, mu Dînà dya Yesu Kilisto. Ne Yèyè awu ikale Cimanyinu kutudi cikondo cyònsò citwikala ne mwoyi aci, cyúvwa Wêwè mulaye ne ki ciikalaYe. Mbifwanyine kwikala bipepele bwa kulomba aci, bwalu Wêwè ngwâkalaya ne ki ciikalaYe, ne ndi mumanye ne ki ciikalaYe. Mu Dînà dya Yesu mmutudi tulomba emu. Amen.

Mpindyewu, ne mitu yetu miinyika, bwa katanci kakese cyenaana.

⁴⁴³ Ne diitabuujja, mwikàle ngiitabuujja, ngânúsambidìdì, mûndì paanyi mumanye amu. Ndi—ndi musambile ne meeji matooke ònsò, ònsò àndì paanyi mumanye bwa kusambidila naawu awu.

⁴⁴⁴ Tangilaayi, ndi mfika ku dyumvwa aci. Nudi bamanye mudi bwalu anyi? Byadiikumi byenu ne milambu yenu ki bitu bimpetsha mwa kudya. Ndikwacisha dyenu adi, ku ekeleeziya eku, mu mushindu wa ne ndi mpetaku muntu mwine wa mêmè kuyiisha. Ndinanga dyenu, ne “amens” yenu ayi, ne bwobumwe bwenu abu. Ne mèyi enu a musangeelu mu dipatuka dya pa buloba bujima panuyaaya apu, mu myaba mishiileshilangane ya mu ditunga dijima, mèyi enu awu ngadi akwacisha bwa kutwala Mukenji. Nnwênù aba. Tudi bakwacishanganyi mu cyòci eci, pamwe ne Kilisto. Tudi bânà baa muntu balume ne bakaji, ne Yèyè udi Mfumu wetu. Ne mêmè ndi mununange. Mêmè—mêmè—mêmè—mêmè, mwaba wûndì, ndi muswe nwênù nwikàlepù. Ndi ngendesha kashinyi nkosolola ditunga dijima, bwa kulwa kunuyiisha misangu bu yibidi cyanaana. Ntu ne dijinga dyàbûngì be dya kudisangishaku neenu mwaba ewu mu dyalumingu mu dinda. Ndi mununange. Ntu anu mununange misangu yònsò. Misangu mikwabo bitu bikengela bwa mêmè kwakula ne mèyi muumisha cyoncyoncyo, kadi adi anu mbwa kulongolola bilema. Nudi numona’s, cidi anu mbwalu ndi mununange, nwamonu’s, ne mêmè ncyêna muswe Cinupicile to. Nwênù, kanucipangidiku to.

⁴⁴⁵ Mpindyewu, anu ne kalolo ne kudipwekesha kwònsò, ne byònsò bidi munda mwa mwoyi webe amu abi, mu ndondo menemene mwamwa, Cîtàbè wêwè anu cyanaana. Amba ne: “Mukalenge Yesu, anu mpindyewu mene angata byònsò bidi munda mwanyi emu, bidi kabiya bifwanangane Neebe abi,

ne enzaku bwa nguumushe maditambishi aanyi ônsò, byônsò bida munda mwanyi abi, mbyèlè pambelu. Bucyafu bwônsò, bupidya bwônsò bùdì munda mwanyi abu, ndi—ndi mbuumusha mpindyewu, Mukalenge. Ndi mbitwa anu miseba mbyela pambelu. Nenku Nyuma Mwîmpè wa kalolo wa Nzambi awu, bu nyuunyi wa nkuci, atuulukeku abwele munda mwanyi. Ndi—ndi muswe kwikala ne mwoyi Cyendelele, Mukalenge, ne ndi—ndi muswe bwa Wèwè kunkwacishaku pa dîbà edi. Enzaku nanku mpindyewu.”

⁴⁴⁶ Panucidi nusambila, ne patwikala twimbila musambu ewu mu matama, anyi tuwimba bituulubituulu apu, cyapamwe, *Ndi MuMunangè*. Nenku, vulukaayi ne, cidi cilwa nku dinanga, bwalu Yèyè udi dinanga. Pâncidi muteeke byanza byanyi pa mishwala eyi apa, bwalu bantu mbafwanyine kuyipeta kumpala kwa disangisha dya bufuku.

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Ku mucu wa Kalvariyo.

Ndi muMunange, ndi muMunange
Bwalu Yèyè wakannanga kumpala,

Mpindyewu lekelela anu nsòmbelu webe kudiYe cyanaana.

Ne wakampetela lupandu
Ku . . . wa Kalvariyo.

⁴⁴⁷ Munangà, Munangà, Munangà Yèyè. Mona cidiYe mukwenzele wèwè aci. Nku dinanga. Dinanga ditu ditwala ditumikila. Dinanga ditu ditwala dyendelangana bwa dibaka. Dinanga ditu ditwala dibaka. Ne kwôkò aku nkutudi batangile twenda tuya: ku Didya dya Dibanji dya Mwânà wa mukooko. Ndi ngumvwa Musungidi wanyi ubiikila, wamba ne Yèyè munnange pende.

. . . mêmè paanyi, bya mwomumwe.

Ndi . . .

⁴⁴⁸ Anu ne mwoyi webe wônsò, umvwa anu Cintu kampana cya kalolo menemene cyenda cibwela munda mwebe amu. Ki Nyuma Mwîmpè nyawu.

Bwalu Yèyè wakannanga kumpala
Ne wakampetela lupandu
Ku mucu wa Kalvariyo.

⁴⁴⁹ Bu . . . Nêngèlè byanza byanyi muulu, pamwe ne bateeleji, ne mijiki. Pângiikalà mwenze mpekaatu, pângiikalà mwenze cintu kampana cya cibi . . .

Ndi nsambila mpindyewu bwênù nwênù, ne bwanyi mêmè mwine.

⁴⁵⁰ Pângìikalà mwenze cintu kampanda cya cibi, cyanza cyanyi cituma Kùdì, Mukalenge, nciswe kwamba ne ndi nyingalala. Cyanza cyanyi Kùdì, Mukalenge, nciswe kwamba ne ncyêna—ncivwa muswe kucyenza to. Nenku ndi mumanye ne ndi munkaci mwa kupunga ne lufu, Mukalenge. Nebikengele bwa mêmè kuumuka pa buloba ebu, mu mmwenekelu wa mubidi. Ndi muswe kutuutakeena Neebe. Cyanza cyanyi nciswe kwamba ne, cyângatèku, Mukalenge. Nguujeku ne Nyuma. Mpeesheku Cimanyinu cya dinanga Dyebe pambidi paanyi, Nyuma Mwîmpè awu, wîkala mwa kumfikisha ku diikala ne nsòmbelu wa kalolo, wa musangeelu, kumfikisha ku diikala ne nsòmbelu wa Mwoyi uvwa munda mwa Kilisto awu; bwa mwoyi wanyi walakukaku kapyà bwa bakwabo, bwa ncishaadi anu mwikishe anu bipeepele nunku to, muunya ne bufuku, too ne pângìikalà mwa kupeta bantu bônso bândi mwa kupeta abu. Nêngìikalè bu muvwa baamusanjeela baa ku Yeleko abu; nênye kudi muntu ne muntu kùndi ne mushindu wa kuya aku, ne kumona ní ndiku mwa kubafikisha mwinshi mwa cipungidi cya Mashi, mwinshi mwa Mashi a Mwânà wa mukooko, bwa baamonaku mwa kupeta Cimanyinu aci.

⁴⁵¹ Nwamonu's, Mashi ngadi akezula. Nyuma n'Cimanyinu cya ne Mashi akaadi malaabiibwe. Nwamonu anyi? Nyuma n'Cimanyinu cya ne Mashi akaadi malaabiibwe. Padi anu Mashi kaayi malaabiibwe to, Nyuma kêna—kêna mwa kulwa to. Kadi padi Mashi malaabiibwe, dîbà adi Nyuma n'Cimanyinu, ùcipingaja kùdì wêwè ne, diitabuuja dyebe mu Mashi dyamanyi kwitabiibwa, mushinga webe wa lwendu ukaadi mufuciibwe. Mushinga wa lwendu lwebe ukaadi mufuciibwe. Byônso bikaadi bimane kujika. Cilumbu cyamanyi kujika. Wêwè udi mwena Kilisto. Udi mwena kwitabuuja. Kilisto udi munda mwebe, ne wêwè udi munda mwa Kilisto.

. . . wakannanga kumpala
Ne wakampetela lupandu
Ku mucu wa Kalvariyo.

⁴⁵² Ne myoyi yenu miinyika mpindyewu kumpala kwa Nzambi; mpaasata wenu, Mwaneetu Neville, ne mèyi ende a dijikija naawu ne ciikalaye mwa kwamba aci.

⁴⁵³ Nwawulukaayi masangisha a diloolo edi, mudimu wa dyondopa. Nwâlwayikù kumpala kwa dîbà. Tubangaayiku pa dîbà mwandamutekete, bwa byampicishaku mu cyambilu pa dîbà mwandamutekete ne tusunsa makumi asatu. Mbikumbane nanku anyi, Mwaneetu Neville? [Mwaneetu Neville udi wamba ne: “Abi mbîmpè.”—Muf.] Mpindyewu netwikale mwa kwangata meesa a Mukalenge, nudi numona's, diloolo edi. Nwâlwayi!

⁴⁵⁴ Mu mappingaja emu, nushaalaayi anu naaCi. Kanulekedi Mukenji ewu unushiya to. Vulukaayi ne, kanulekediku Mukenji ewu unushiya uya to!

⁴⁵⁵ Mashi neikale Cimanyinu cya ne Mwoyi mmufidiibwe. Nwamonu anyi? “Nenku pâNgààmònà mashi, Nèmpicilè pamutu peenu.” Nyuma Mwîmpè n’Cimanyinu cya ne Mashi akaadi malaabiibwe ku mwoyi webe, ne Yèyè n’Cimanyinu cya ne Mashi akaadi malaabiibwe. Ôwò kaàyikù malaabibwe kacya to, dîbà adi Cimanyinu kacyakulwa to. Nudi nuumvwa anyi? Ambaayi ne: “Amen.” [Disangisha didi dyamba ne: “Amen.”—Muf.] Mashi adi ne cya kulaabiibwa, ne pashiishe Cimanyinu cidi cilwa. N’Cimanyinu cya ne Mashi a bupikudi akaadi malaabiibwe ne mushinga webe wa lwendu mmufuciibwe. Nzambi anubeneshe. Mwaneetu Neville.



CIMANYINU LUA63-0901M

(Token)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu dituku 1 dya ngondo wa citeema, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtî ne dituuta ku cyamu mu kaabujima kâàdî mu Anglais. Nkudimwinu wa mu Ciluba ewu mmutuuta ku cyamu ne mwabanya kùdî Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org